

MWAHA KIKHALENLYAACA

Oovirikanya Etiini

Yootthokihwa



Kooxukhuru, Munna Neville.

Mukilaathiki. Yoopacerya, nkaareere muteko olelo mpakha waahaleela ooraami kamosa-kamosa a aretta. Yaahikhala atthu kamosa-kamosa mwa miyaha s'omeekha wira evekeleliwe, yaatthuneya wira kikumanane. Masi vano akina wa...nimosa wa makhuru, kookupali wira Billy ohimnye wira naari na oCanada, mapuro maili wala mararu oovirikana. Vano, awo anoorwa nno, moosuwela, ni okhala mooteelini ni mmoteelini voohihyererya okathi wothene. Nto miyo kinoorowa okumana ni yaawo, okumana ni yaawo ni waavekelela anrwa ekhumaka mapuro othene molumwenkuni, ni wAsiya, Europa ni mapuro othene. Nihiku ti nihiku, hiyo nakhala va, atthu animoorwa. Eyo ti yooreeraxa ovikana imiya thanu na mosa valiistani, elipelelaka o...mivaanelo s'omeekha, nto siiso ennikhaliha yoolipa vakhani. Masi atthu anwereiwa vekeekhai ni myiha soowaakuveya wira evekeleliwe, vano, kinniilipiha wira kikumane ni yaawo.

² Paahi, ahe, okhuma okathi waary'aka weiwo ni nikhuru na maatiministaratoore, voowiriyani vakhani nnikhuru naka na maatiministratoore va okereja, naahaana okumana okathi vakhani ovinre. Nto okathi ene yoowo yaahikixeleliha ntoko ewoora emosa ni nuusu, ni yaahikhala atthu kamosa-kamosa yaatthuneya wira ekhale va okathi yoowo wira evekeleliwe. Vakhala wira awo ari vaava, kaatthuna kaavekelele yaawo okathi yoola. Tivo, awo yatthuna vale, atthu ale yaari wira avekeleliwe, ahe, awo yaattamelaru nno paahi naanaano okathi mulipa-onooa epiyaano, onakhaleru pani, onrwaawe ni—ni anirumihela vakhani “Meetiku muulupale vano ori vakhiviru, Yesu oohupanyerya.” Vano ale ari wira avekeleliwe, yatthuna vale, yaari akavi miyo nkisuwene. Nto nyuwo mwa axinna, wona waka. Axinna, miyo nkireere ohaawa mw'erutthuni mwaka. Yesu aahivilela mw'erutthuni Mwawe, ohaawa, wira Owo okhale enamuna ya Mulipa-oolapelela eekeekhai, okhala wira Owo oryeene Muluku aahiipaka erutthu wira Owo awerye ohaawa. Owo aaniwerya wona owereya wa eretta. Nto mwaha wa yeeyo Owo aarwenly'awe opaka ettipiheryo ya itampi. Nto mwa yeela Owo ooruma Ekereja Awe wira etthikele muteko Awe.

³ Ni kihaana—kihaana nttittimiho muulupale wa muteko wa omeetiku, wooperari ni sikina, yaawo—yaawo ni irattelo Muluku aavanhe-awe wira yiiriheke itthu khata erutthu, wira wooperariki ni okumiha maino ahikhanle saana, ni sikina. Miyo kinnixukhurela yeeyo. Masi onniphuya okathi awo aankhalaaya woovikana o—osuwela waya, awo—awo ahinsuwelaaya etthu yo wira. Munnona? Nto miyo kinoona wira, nto, hiyo nookhalana ehaakhi yooreera, ntoko naarowaahu okhalana mw'erutthuni, vaakhanle wira naarowa wa meetiku ahu a mw'emusini, khino me—meetiku okuluttuni wu, meetiku mmosa mulweene oosuwela onkuxa muthuko ni weetta mukuluttuni ohiyu, wira oophwanyeni, wira oocaleleni. Nto owo avonya vale osuwela, owo onoomurowela mutthu okhanle musulu vakhani onvikana owo. Owo onimoorumani orowa wa muratti a muteko. Nto vano vakhala wira muratti oomeekha khonsuwela, miyo—miyo kinnitthapa okhalana ntthyawelo nikina, Meetiku muulupale.

⁴ Ni Owo khonivonya, Ola khonivonya, okhala wira Owo ti Mpattuxa Mwaneene. Ni Owo oonipakela ephiro. Vano, waakhanle owerya wo ovoniha mwa miyo wira kiire, miyo—miyo kaamurowa iwe kiire. Miyo—miyo kaamutthapela paahi wira. Masi, owerya wo ovoniha, nkirina hata mmosa, khaavo hata mutthu mukina orina owerya wo ovoniha. Masi hiyo noorumwa, moone, wa Kristu, wira naavekeleleke aretta, Yoowo opwenhe esukeryo ya owerya wo ovoniha. Munnona? Nto hiyo nnimoorwa paahi, ntoko saaryaaya, wira nilepe exeke ya yeeyo. “Ni sothene sinrowaanyu waavekela Atithi mwa Nsina Naka,” eyo exeke yoohikal'etthu, “sothene sinrowaanyu waavekela Atithi mwa Nsina Naka, Miyo kinimwiira.” Natiri xeeni! Vekeekhai khokhanle ovonyaka. Ni kinnaakhaliheryaka axinn'aka alopwana n'athiyana, mulaponi mothene, opweha isukeryo iya . . . ahiiso okumiha inoota iya Mpanko mwa Muluku, Mphomeni mwa Yesu Kristu. Ni ennikhalka yoottotteleya muraarelo saana. Owo okathi wothene ooliva, ni okhala wira esukeryo eri vaavo, moone. “Owo—Owo—Owo *ti* onyakatteliwe sootheka sahu, makhwatta Awe *ti* anivoninhe.” Moone, sothene soomala. Nto hiyo ninnitteeliwa murima ohiy'ula mwaha wo waamini wanyu.

⁵ Kookupali wira Billy aakileela wira munna mmosa onoorwa okhuma oCanada wala nipuro nlo. Nto eyo ekeekhai? Nyuwo mwa munna a oCanada? Nto—nto nyuwo mwa a yayi, munna? [Munna oniira, “Epantte onkela epeheyo wa oFort Wayne, oKendallville.”—Mol.] Kendallville, Indiana, a oFort Wayne. Miyo kithenle oFort Wayne. Kinnuupuwela oratta-ene. Naahikhalana mithukumano sinci-ene iwe oRediger Tabernacle. Kinoona wira nyuwo munnisuwela vary'aya. Ni kinnuupuwela, kiryeene mwammiravo, kikilanthi-ene munawoni mwa Paulo Rader, muRediger Tabernacle, ntoko murumeyi mmiravo aaxutta. Owo mutthu muulupale, Munna Paulo aari, ni Munna

Rediger, atthu a waamini. Minepa saya siithyuuwe ohiy'ula. Nto vano, okhala wira kaari mwammiravo, kimpavela otthikela ele awo ahiyanse-aya, ele Yesu ohiyenryaawe Ekereja Awe mukwaha wothene.

⁶ Vano, ni waamini wothene orinaaka, kinoorwa woovekelelani. Nto miyo—miyo nkinrwa piswapiswa paahi. Hiyo khinnatthuneke waattamela siiso. Nnari, eyo kahi yoolikana. Hiyo ninoorwa, naaminiki wira ninoorowa waakhela ele nivekenly'ahu, moone, nisuwelaka wira Muluku oolaiherya. Ni ninoorwa ni nrromelo mmurimani mwahu wira Kristu oommana natiri, ni nyuwo axinna moophavela ohela waamini wanyu waltaari, muhiira sothene sinwery'anyu, miyo kinrowa ohela wawaka ni nyuwo ohiy'ula. Munnona?

⁷ Nto, vano, nookhalana altaari muulupale onaataleleya wirimu wothene, ni valtaari vaavo omphwanyaneya Mukuttho ahu, Mwaana a Muluku. Munnona? Ti Mukuttho yoowo onvuuva ephome. Muluku khonwerya oweha eyo ohittittimihaka Yeeyo, moone, maana Awo Masu Awe, "Ola Mwan'Aka onimphentexaaka, mmwiiweleleke Yoowo."

⁸ Miyo kinrowa onvekela Munna Neville, humu ahu, owo orwe ohoolo nno naanaano va ni miyo okathi onrowaahu. Kintthuna wira ekereja yothene. . . Ankhi ula aari munn'inyu, aiy'anyu, mwan'inyu, atithi anyu? T'a mutthu, muupuwele. Nowe, n'ixariya yothene hiyo nrin'ahu, nimwaattamele Muluku vano mwaha w'axinna ala.

Nuuramihe muru ahu.

⁹ Tithi ooreera murima a Wirimu, hiyo ninruuha Ohoolo Wanyu vano, waltaari wa mahala, ninaamwi neemenle-ene vakhukuluni yaamukhaani ya mwiri, p'uhimya wene, elapo ela ya vathi, masi waamini wahu woowela mpakha waltaari muulupale onivarela iwe, weiwo Yesu (Yoowunkhela yoosivela ohoolo wa Muluku, Mukuttho wa Ephome wa oKalvario) Yoowo oxinttale iretta sothene, ikwerere sothene, okhwa, omooroni, ni mahiye, khuhihimuwa khuwela Wirimu, khukilaathi moonoo woolopwana wa Omwene Awe. Nto hiyo, mwaha wo waamini, ninnoorwa, niwelaka osulu wu mwa mahala a Muluku, wira nihimye vasulu valtaari va, wa Mpattuxa muulupale a Wirimu ni vathi, "Munaakhele, Pwiya, okathi onaattamel'ahu mwa Nsina na Pwiya Yesu."

¹⁰ Va ari axinn'ihu, nto mmosa aya a oFort Wayne wu, nno mustaatu, ni mukina okhuma oCanada nno, orweela okathi ula woottittimiheya saana. Ori eriyari ya okhwa ni ekumi, Pwiya. Va aakhala alopwana aili, akhanleru amiravo, woohala muteko munci-ene mw'awo wa Nyuwo, Pwiya, anakhotto aili, aKristu aniwaaminini Nyuwo. Nto nwanani ohoopa ntthere, ni ntthere nle na eveneno noovara nipuro nlo mw'erutthuni mwaya, ni awo aathika, aathikelasa oxipiritaali ya mahala a Muluku, wira

yaataanihiwe, wira evonihiwe, wira ewerye waattamela ohoolo emaaara ekina, ni nikula nowiisaakiha-no, arowaka okhottoni. Awo ahoorwa wira etakanihe ikuru sa mavekelo ni hiyo, Pwiya. Nto hiyo ninrowa okumana ni nwanani.

¹¹ Mwa Nsina na Yesu Kristu, mwaataphule. Hiyo ninnoovirikanyani mwa Nsina na Yesu Kristu, mwaahiye erowe.

¹² Awo t'anakhotto a mukhottoni. Nto, ntoko murumeyi Anyu, kinnirowa vano owiixaatherya matata, ni waamini, kaaminiki wira, "Ithoonyeryo iya sinimwaattthara ale anaamini," ohimmye Pwiya'ahu, Mukhulupale ahu Oomalela a ekhotto, "awo yawiixaatherya matata aya aretta, awo anoopenuwa."

¹³ Ela miyo kiniira mwa Nsina na Yesu Kristu. Owerya w'eretta ontthuka erutthu ila ya munn'ola, omuhiye, mwa Nsina na Yesu Kristu.

Owerya w'eretta ontthuka erutthu ila ya munn'ola, omuhiye. Mwa Nsina na Yesu Kristu, okhume.

¹⁴ Muluku Oowerya sothene, Mpattuxa a Wirimu ni vathi, Mwaneene Ekumi ehinimala, ni Nanvaha a yoovaha yothene yooreera, mwaaruhele iparakha Sanyu ala hiyo naareerihaly'ahu. Ni yoolepwa mwa Soolempwa, wira, "Mwairela mwaak'ola, 'Othaame-vo,' muhioveriyaka mmurimani mwanyu, masi mwaaminiki wira ehimaly'anyu enimwiiraneya, munimwaakhela ehimaly'anyu." Miyo kinnaamini wira iretta saya sookhuma mw'erutthuni mwaya. Vano yoohimmwa; vano yiiraneye. Amen.

¹⁵ Mwa Nsina na Pwiya Yesu miyo kinnaaminini wira mootaphuwa. Mwa Nsina na Yesu Kristu kinnaaminini wira nyuwo mwa ootaphuwa. Amen.

Ekereja ennaamini siiso? [Muthukumano oniira, "Amen." – Mol.] Vano yiiraneye.

¹⁶ Vano, yaamukhala akina mu yaatthuna paahi wuupuweliwa mmavekeloni, munnitthuna ovenxa ntata? Vaareera, nrowe nimwaattamele Yoowo vano okathi muniixaatheryanaanyu matata mmosa ni mukhw'awe. "Ithoonyeryo iya sinimwaattthara ale anrowa waamini."

¹⁷ Muluku oowaaryaxa, mwaha wo waamini hiyo ninnimoona Yesu, hiyo ninnaamini wira Owo ori vaava. Owo onnikhapelela Masu Awe. Ni Owo ohimmye wira, "Nipuro nintukumanaaya aili wala oovikana mwa Nsina Naka, Miyo kiri eriyari aya." Vano, Tithi a Wirimu, muhiye owerya wa Muluku Oowerya sothene waakwannye atthu ala, Pwiya, ntoko yitakaninh'aya matata mmosa ni mukhw'awe, yiixaatheryanaka mmosa ni mukhw'awe. Oruma wookiserya Nyuwo muhimenryaanyu Ekereja, "Ithoonyeryo iya sinimwaattthara ale anaamini. Awo yawiixaatherya matata aya aretta, awo anookhala...awo anoopenuwa." Nyuwo moohimya, ni hiyo ninnaamini yeeyo.

Nto vano ehiiriwa, ni hiyo nni moottotopelani Nyuwo mwaha wa yeeyo, mwa Nsina na Yesu Kristu. Amen.

¹⁸ Ni mwa Nsina na Yesu Kristu owerya wa Muluku ottikitthele maleeso ala w'aretta n'ale oothoiwa. Ni okathi anvelelihiwaaya ni opweheriwa aretta, yiiraneye wira anoovonihiwa. Hiyo noosoma mBibiliani wira yaanikuxiwa mwa Paulo Oowaarya, maleeso, ikuwo; irooho sootakhala saanaahiya athu, ni iretta saanivonihiwa. Nto, Tithi, hiyo noosuwela wira khanihiyo Paulo Oowaarya, masi hiyo noosuwela wira Nyuwo nlelo mwa Yesu. Nto hiyo ninvekela wira Nyuwo munivahe yoovekela ela wa ovuwa Wanyu. Amen.

¹⁹ Nkisuwenle sinto yookhala...ifiita nlelo soothukuliwa, wala nnari. Sootthukuliwa? Vaahikhale siiso, kaatthuna wira awo athukule okathi ula. Kookupali wira epattihelo yoothukuliwa. Vano, kinwehererya wira nkiniwoocihani ohiy'ula. Kimpacerya ntoko ewoora nuusu ni munuutu miloko miraru vahinatthi. Nto miyo...Nla nisomi na exikola ya Ttiminku, ni kihupuwela wira khino yaamukhala yooreera kaarina ela yookaravariwa eri vamurimani vaka. Ni nihanle okela e—enamuna esya, etapernakulu esya, sothene isya.

²⁰ Nto vano kaatthuna kisome kamosa-kamosa sa Soolempwa. Nyuwo mwaatthunaka osoma ni miyo, kintthuna kisome mwa Samuweli Oopacerya, kapiitulu 8, ni nintthuna opacerya versiikulu 4 mpakha 10; nto nuumala, wira nikhalane okathi, 19 mpakha 20. Ni miyo kookhalana ipaphelo sinci-ene sa Soolempwa ni ihimyelo silempwe va, wira nyuwo mwakhalana ekaneta ni elaapi, wala etthu, epaphelo, mwaatthunaanyu ohimyana seiya wala okweretha, mulepeke, wala, Mwenye Maguire onookhalana e—e—efiita.

²¹ Ni kintthuna wira efiita ela evahereriwe arumeyi, axinn'aka, arumeyi ahikiwale oratteene, vanci-enexa axinna a ikereja sa muromolelo. Ni kiireke sothene miromolelo.

²² Nto mwaha aka ohiy'ula ti: *Mwaha Kikhalelyyaka Oovirikanya Etiini Yoothokihwiwa*. Nto kinrowa osoma vano wa mulipiheryo, wala osoma Yoolempwa, wira kikhalihe vekeekhai ya Yoolempwa, kintthuna kisome mwa Samuweli Oopacerya 8:4-10, nuumala 19-20. Wa muthukumano aka onooneya, kinniroromela wira mwarowa owaani munoolepa Soolempwa iya n'usoma oratta-ene. Nto w'axinna anrowa wiiwa efiita, kinroromela wira ni nyuwo khamunrowa omaaliha efiita yahimmwa etthu khino muhinrowaanyu wiiraana-no, masi munomphavela Muluku mwa yeeyo, moone vakhala wira ti Yoolempwa. Kinoona wira nihaana wa hiyo ni Mutthaka wa nihiku.

²³ Miyo kinnaamini wira ikereja sothene sookhalana aKristu mwemmo, ni miyo vekeekhai nkinlavula vowaapwapwela aKristu. Masi mwaha miyo kiirenlyyaka etthu kiiralyaaka, ni

ohimya ele ehimaly'aka, mwaha wa muupuxeryo wa Eroho Yoowaarya mwa Masu.

24 Vano nrowe nisome mwa Samuweli Oopacerya, kapiitulu 8, opacerya eversikulu 4, nisomaka versiikulu 10, nave, toko.

Siiso makhulupale othene a wIsarayeli yaahikumanela, enarowa okumana ni Samuweli oRaama,

Vano emuleela wira, Moone, nyuwo muhuuluwala, nave an'inyu khaneettela...khaneettela ephiro: vano munithanlele mwene onrowa oniphukaka ntoko ilapo sothene.

Masi etthu iyo khiyaamusivenle Samuweli, okathi awo yaahimale-aya wira, Munivahe mwene onrowa oniphukaka. Nto Samuweli aahaavekela APWIYA.

Vano APWIYA yaahimuleela Samuweli wira, Mwiwelele nsu n'atthu mwa sothene anooleelaayani: okhala wira khahiyo anookhoottani nyuwo, masi anikikhootta miyo, wira kihikhale mwene aya.

Voothariha miteko sothene sivanre-aya okhuma nihiku miyo kaakuminhe-aka wEjitu mpakha olelo, aakihya miyo, enaarumeela amuluku akina, ti siiso-tho awiirenlaayani.

Vano tivo mwiwelele nsu naya: nnya mwaalopole toko, ni mwaalakiherye enamuna mwene owo onrowaawe oweettiheryaka awo.

Vano Samuweli aahaaleela moolumo ala othene a APWIYA atthu yaanvekela mwene.

25 Vano eversikulu 19 ni 20 mpakha omaliha.

Nnya atthu yaahikhootta wiwelela nsu na Samuweli; nto khwira, Nnari; masi ninookhalana mwene ahu;

Wira hiyo-tho nikhale ntoko ilapo sothene; ni mwene ahu onrowa oniphukaka, ni onrowa...oneettiheryaka, ni owana ikhotto sahu.

26 Apwiya yincererye iparackha Saya osoma wa Masu Aya. Vano, ntoko nisomi na Ttiminku, miyo kaatthuna kihimye wira ninthuna niphavele okhala ntoko—oowiriyana saana ntoko sinweryaahu Masu.

27 Ni hiyo noosuwela wira—wira imaara sikina itthu sinnihimmwa, (ni ikereja kamosa-kamosa), simmukwattula mutthu oixuttihiwe voovirikana ni ele awo arinaaya... aniiwaaya. Mwa nlikanyiho, mulopwana mmosa aahikileela nihiku nlo, yoowo okhanle mpatthani aka mmosa okilante vaava naanaano, owo khwira, "Okathi mwaahimme-anyu, Munna Branham, ni waamini wunci-ene kinkhalanakaaka wa nyuwo, ni kinnaamini, okathi nyuwo muhimaly'anyu wira

khiwaakhanle ‘omooroni Ohinimala,’” khwira, “Kaahala omora vakhaterani vaka. Nto miyo khwira, ‘Vekeekhai mulopwan’owo oovonya.” Vano nto khwira, “Nyuwo munihin’ye siiso okathi munci-ene. Vano nto nyuwo muhimmye wira, ‘Eri enamuna emosa paahi y’Ekumi Ehinimala, nto eyo enkhuma wa Muluku.” Ni eyo t’ile hiyo othene nimphavelaahu, moone.

²⁸ Ni khiivo hata Yoolempwa enihimya wira wookhala omooroni Ohinimala. Okhala wira, Ehinimala khenatoko opacerya, ni khenkhalakhala emalaka. Vano Bibilia ohimmye wira “omooroni opattuxeriwe xetwani ni malaikha awe,” vano owo khuhiyo Woohimala. Waahikhala okathi wahaakhale-aya, ni onookhala okathi ohinrowaaya okhala, emaraa ekina. Masi awo pooti ohukummwa mmwe, mmooroni ni esoofiri, ni moowiixani mwa mooro, mwa ivirelo sa okathi, masi vookiserya onoomala okhala wira omooroni khuhiyo Woohimala. Ni waakhanleru omooroni Ohinimala, mwaamukhalana Ekumi Ehinimala wira mukhaleke omooroni Ohinimala. Ni waakhanleru Woohimala, vaakhanle wira kweekwe waari siiso, ni nyuwo okathi wothene mwaari omooroni nto kweekwe munookhala omooroni. Moone, tivo khiivo etthu ene eyo.

²⁹ Tivo, moone, *Ehinimala* ti “khenatoko okhalana epacerelo wala emalelo.” Ni eri enamuna emosa paahi y’Ekumi Ehinimala, nto eyo eri mwa Muluku, enrwa mwa nuulumo n’Ekereku *Zoe*, yeeyo enihimya “Ekumi ya Muluku Mwanene.” Nto okathi oniyariw’ahu vasya ni Erooho ya Muluku, hiyo ninkhala Oohimala ni Muluku, okhala wira nookhalana epantte y’Ekumi Awe, yeeyo ennikhaliha hiyo aana alopwana n’athiyana a Muluku, nto hiyo nookhalana Ekumi Ehinimala. Nto Ekumi eri mwa hiyo, Muluku onooohimuxa erutthu ni Ekumi nihiku nookiserya, masi eyo Erooho ya Muluku eri mwa hiyo enivenya, okhala wira eyo Erooho ya Kristu yaari mwa Kristu, enkhaliha ekumi irutthu sahu ni onivenxa nave, ni Yoowo, wira nikilaathi mo—mo—Moovuwani ni oruma ni Yoowo.

³⁰ Vano nikelele mwaha, vano, kinnikhalaka mwa iyaakha iya, ni etapernakulu ila ennikhalaka. Kinaamwi, miyo kikhalihiwe mulaleyi ekereja Patista Misiyonaariya, ni Totori Roy E. Davis, miyaakha soophiyaka miloko miraru ni miraru sivinre, oJeffersonville nno. Vano miyo, okhuma vaavo, miyo kaari mmutthenkesoni okathi vakhani paahi, miyeeri vakhani, mpakha etthu emosa okhumelela yaari yoohipempwa ni ekereja, vano miyo khimuleela wira nkaakhanle wiiraka yeele. Nto siiso, tthiri, khuvekeliswa wira “kaamwiira wala nnari,” nto miyo khwira nnari. Tivo eyo yaari etthu emosa kinaamini aka, wira ala Masu a Muluku. Nto miyo kaahimuleela mulopwana aari mu—mwiixuttihi mukhulupale, “Nyuwo mwakooniharu iyo muhina mwa Masu a Muluku!”

“Masi waari,” owo khwira, “owo mwiixuttiho ahu.”

Miyo khwira, “Masi kinthhuna ekumihiwe Mmasuni, moone, Masu a Muluku.”

³¹ Ni kahi mwaha wo wira nkiniira mpantte wa mutthenkeso kinikhalelaaka oovirikanya mutthenkeso, okhala wira miyo kinnaaxukhuru axinna aka, yaawo kinlavulaaka-no olelo, kinkhalanaaka olattuliwa wa yaawo, kinoona wira, ntoko khula muromolelo, vanci-enexa mwa makhuru a Ehapari yooreera Yoomalela, ni hata mwa anci-ene a ikereja sikina. Koovekeliwa wira kikele mopatthanani mwaya ni wiitakanxa ni yaawo, masi kinnikhalaka ootaphuwa. Okhala wira, okupaliha orin’aka, miyo nkinthhuna ohelela nikhuru nimos a n’atthu. Kintthhuna kihelele ele Muluku okivahalyaawe, waavekelela aretta, wira ottotteliwe muraarelo ni aana a Muluku othene mwa khula mutthenkeso. Owo khonakikoheke wira kihivekele, wala *ola* okhala wira oniira mpantte wa *Lexe ni elexe*, Muluku onnilamula murima wa mutthu.

³² Nto vano, voopacerya, etthu kihiniirelaaka mpantte wa awo ni olavulaka kivirikanyaka, ti, voopacerya, okhala wira nkinaamini wira mutthenkeso w’oKristu ti Yoolempwa. Kinaamini wira ti yoohilempwa. Nto ti yeeyo enrowaaka ophavela, ohiy’ula, wiilipiha ni mahala a Muluku, wira kiwooniheryeni wira ti yoohilempwa, kahi yoolikana okhalana mutthenkeso.

³³ Vano, voopacerya, hiyo nniihana “etiini.” Nuulumo *etiini* ti “ekhuneelo,” enihimya okhuneela etthu. Vano, Atamu aahikhalana etiini, masi vekeekhai owo aapanke mmansawe, ya makukhu a efiiku, nave khiyaavanr’etthu. Owo aapanke eyuupuwelelo awe mmansawe khweererya opaka ephiro ya ntthyawelo, wira ophwanye woopowa mwa etthu owo aapanke-awe mmansawe, nto Muluku aahikhootta, okhuma Atamu mpakha eyeettiheryo ya mutthenkeso wookiserya. Khenakhaleke, nto ni mahala a Muluku hiyo nnimooniherya olelo ni Bibilia. Etiini yaari ekhuneelo. Atamu aaipakenle ekhuneelo mmansawe ya makukhu a efiiku, khupaka, mmansawe, wira eererye opaka etthu mmansawe.

³⁴ Masi Muluku aatthuna okhwa, elivelo. Vano, wookhala ovirikana wuulupale wa etiini ni woopowa, moone, woopowa. Etiini ekhuneelo. Munnona? Woopowa Oyariwa, yoovaha ya Muluku. Woopowa Oyariwa, yoovaha ya Muluku, ni khivanweryaneya ophwanyiwa ni mutthu wala hata nikhuru n’atthu. Ti mutthu mmosa Muluku onimuruuhelaawe yoovaha ela. Ni soovaha iya sa Ekumi Ehinimala sikhalihiwe ni Muluku wa khula mutthu hiyo nihinatthi hata okhalana olumwenku, voothariha Soolempwa. Bibilia oohimya, mwa Wiisuupulula, wira nwanani a Kristu aarowa orwa mulaponi, aarowa owootoha othene ankhala mulaponi, yaawo masin’aya ahilempwe muLiivuruni mw’Ekumi ya Mwaapwittipwitthi ohinatthi opattuxiwa olumwenku. Munnona? Muluku, mwa

osuwela Wawe khalayi ene, aahoona t'ani aarowa orwa ni t'ani ahaarowa orwa, Kristu khukhuruwa wira akhalihe ephiro w'ale yaarowa orwa. Moone, aasuwelaka akina.

³⁵ Vakhala wira Owo Muluku, voomalela, Owo ohaana okhala oohimala. Ni vakhala wira Owo t'ohimala, Owo khokhanle okhalaka oohimala ohikhanle oowerya sothene. Owo khokhanle okhalaka oowerya sothene oohikhanle ookhala mapuro othene. Owo khokhanle okhalaka ookhala mapuro othene ohikhanle oosuwela sothene. Tivo, moone, sothene iyo sinnimukhaliha Owo Muluku.

³⁶ Tivo, Owo aanisuwela emalelo okhuma woopaceryani. Owo aanisuwela t'ani aarowa ni t'ani ahaarowa, ni Owo aanisuwela wira yaahikhala anci-ene yaarowa orwa, tivo Owo khunveleeliha Kristu wira okhalihe ettipiheryo w'ale yaarowa orwa. Vano, khiivo eniiraahu erina-vo etthu ni yeeyo. Yesu ohimmye wira, "Othene Atithi akivanh'aya," aki, okathi ovinre, "onimoorwa wa Miyo. Ni khaavo onwerya orwa vahikhanle wira Atithi Aka anoomuruuha." Munnona? Vano, moone, sothene siri mwa osuwela wa Muluku.

³⁷ Nyuwo muniira, "Munna Branham, miyo kiri muhina?" Miyo nkisuwene. Miyo kinwehererya wira kookhala. Hiyo ninvarela muteko woopowa wahu ni nttittimiho ni woova. Vano, Ekereja ti yoothommwa wira ekumane ni Muluku ehirina nlepa wala ninnyaari. Vano, hiyo nakhala Mukereja mwemmo, hiyo nitthommwe ni Ekereja yeeyo. Vano mwiiwehe mmansinyu ni Masu, vano munoowerya oweha ottaiwene xeeni oryaahu.

³⁸ Vano, vano, oKristu wootthokihwiwa khonwerya ovaha elipelo eyo. Nnari. Akina wa awo aniira, "Nyuwo murwe muhimye wira Yesu ti Kristu ni mpatisiwe mukereja." Xetwani onniira etthu emosaru. Owo onnaamini, mmansawe, wira Yesu ti Kristu, ni onnithukumela. Moone, eyo ekeekhahi.

³⁹ Muluku khonarumeke, hata nipuro mwa Soolempwa, wira okhalakhale mutthenkeso. Khanivo hata nipuro mBibiliani wa yeeyo. Atamu aahipacerya mmosa nto khuvonyeya.

⁴⁰ Nto nuumala Nimurodi aaheererya opaka mutthenkeso. Nyuwo mwakhala mulipa-oolepa ihantisi, ni munamusuwela wahala a Papilooniya, musome *aPapilooniya Aili* a Hislop, munoophwanya waarya wowaatta wuulupale. Wira, Nimurodi, mulopwan'ola a etampi, aamukunxe Papilooniya ni ekerej'aya yothene yaamukhaani y'oxinna, wala mapuro vakhiviru, yeeyo yaari muthinto wa—wa oKristu ula wookhootta waamini wa nihiku nookiserya, khupaka nipuro nuulupale n'ale othene akina a yaawo khurukuneya...khuliva mpoosito wa yeeyo. Nto mwemmo owo aamutenke namukattha ni khweererya waatthokiha athu vamosa, masi khuvonya. Yaahivonya. Eyo yaahivonya.

⁴¹ Kore, Mothakoni 16:1, mwaatthunaka osoma, Kore aaheererya etthu emosaru. Owo aathukumannye aLevi othene vamosa, ni aahithukumanya e...amosa-amosa w'atthu oottotopeliwa, atthu a mukhalelo muulupale, atthu oowaarya, vano owo ni Datani khutakanxana khwira, "Khelikanne, mutthu mmosa weereryaka okhala vasulu va hiyo othene." Nto siiso awo khweererya opaceriha mutthenkeso vamosa, nto awo khurwa wa Moise ni Aroni, yaawo Muluku aathanlenly'awe muteko, ni khuwiirela wira awo khiyaareere wiihelana mmansaya, wira muthukumano wothene waari woowaarya, ni awo yaahikhalana ehaakhi ya... "Variyari va muttitthi wa akhulupale wookhala olipa," tthiri, awo annihimya. Eyo khenihimmwa oKristu. Eyo enkhala mukhottoni. Nwehe, khereere ovirikana.

⁴² Nyuwo pooti okuxa Yolempwa, ni wira, "Yuta aahirowa wiihophu," nto "murowe mwaire siiso," mwaatthuna vale, masi eyo kheniiraha okhala oratta-ene.

⁴³ Muluku aamuthanlale Moise ni Muluku aamuthanlale Aroni, ni waari mutthaka wa nihiku. Nto khivancala oreera xeeni wooneyaaya epantte ekina, yaari yoovirikana ni muupuwelo wa Muluku. Ni nihaana ohiya muupuwelo wa Muluku okhala muupuwelo ahu. "Muhiye muupuwelo waari mwa Kristu okhala mwa nyuwo." Ni Bibilia ola onnuupulula muupuwelo wa Kristu. Ni Eliivuru yothene ya Wiisuupulula, eniihaniwa Apokalipise, ti Wiisuupulula wa Yesu Kristu. Ni hiyo ninoowerya woona moota Owo onipwapwel'awe etthu iyo, moota Owo oniroihelaawe epantte emosa, ni hiyo ninoophiyerya yeeyo okathi vakhani. Vaareera.

⁴⁴ Kore, kookupali wira aari naxariya mwa yoowiira awe. Kookupali wira mulopwan'owo kha—khaatthuna wira etthu yoonanara. Kookupali wira waari ohisuwela wa mulopwan'owo wahoonale ntata na Muluku neetteettaka ni osuwela Soolempwa, nto mwaha wa yeeyo aaruhenlyaaawe mootthokelelani.

⁴⁵ Ni eyo eri ipursento soophiyaka miloko mithanu na mixexe wa mulattu olelo, wira hiyo nineererya okeliha-mo mmuthokiheryoni mwa Muluku, akhili ahu. Ni khivanthuneya hiyo wuupuwela, nnakhala. Owo t'onuupuwela mwa hiyo. Entthuneya hiyo ovahererya muupuwelo ahu wa otthuna Wawe. Munniiwa saana vano?

⁴⁶ Kore, ni etthunelo yooreera, aaheetta ni mwiixuttiho woowootha, aahimeeryaka axinna ala, ni owooniherya mwaha wo otthokelela, wira Muluku khaamureerinhe Moise paahi, profeta, namitthaka, ni wira aamureerinhe yoowo paahi, masi wira, "Muthukumano wothene waari woowaarya," owo iirale, "nto vano muthukumano wothene ohaana ehaakhi yo wira *yeela*, ni muthukumano wothene ohaana ehaakhi yo wira *ele*."

Nto siiso awo yaahaaphwanya axilopwana ooloka, aLevi. Vano, iwo p'uthanla wa Muluku, yoowo waarowa wiihaniwa olelo, "arumeyi," muLevi aari murumeyi a mpaani m'olompa. Moise khaapwapwenle mwaha wa yeeyo? Nto, va, owo khonatoko wira oh-...voohittittimiha. Owo aahimeenrye wira ekuxe muhaasa woopahiwa-mo erupani, ni ahele mooro wooreerihiwa, ni ahele muhasa wa erupani vasulu vaya, ni wira attikinye muhasa ola wa erupani, yeeyo yaari yooruma ya Muluku. Vano awo khuphiyerya opaka nikhuru n'atthu wira yeettiheke ekereja, vaavo Muluku aamurumme-awe mththu mmosa wira aire siiso.

47 Nto, okathi awo yiiralyaaya yeeyo, Moise aahuuramela vathi wiitho wawe maana owo aanisuwela wira Muluku aahimuruma wira avare muteko ole. Nto Muluku khwira, "Nwiirihe awo erwaane mihasa iyo sa erupani ohoolo wa muxaaxa nno." Nto siiso awo vapacenryaaya ottikinya mihasa saya sa erupani soosareya mooro, erupani epattaka, Muluku khimuhimeerya Moise ni Aroni, "Mwiivalaanye n'awo! Mukhume eriyari aya!" Maana, ohoolo waya Owo aawiihanne "anatampi, oohaamini."

48 Nto etampi ohaamini Masu a Muluku. Nyuwo muniya okhala wira khimunaamini. Nyuwo munootha okhala wira khimunaamini. Munraruwa okhala wira khimunaamini. Nyuwo mwaari mulipa-owaamini, khimwaarowa wira etthu iyo. Ari malaya maili paahi, okhanle waamini wala ohaamini, nyuwo muneettiheriwa ni emosa wala ekina.

49 Vano, Muluku, woopaceryani, aari Nsu, nto Owo khwiipaka erutthu khukhala ni hiyo. Owo aari Masu, Owo ti Masu! Nto okathi Muluku onkhal'awe mwa nyuwo, awo Masu a Muluku ankhala mwa nyuwo, vaavo munweryanyu omaliherya sothene Owo onihimy'awe ni "Amen." Owo ti Muluku onkhala mwa nyuwo.

50 Vano nyuwo mwaweha vale, atthu ala oohittheke ni mihasa sa erupani mmatatani mwaya, mooro wooreerihiwa mmatatani mwaya, Muluku aahihula etthaya khwaamira, khwaavalaanya ni Moise okhala wira Moise aahiivalaanya ni yaawo. Nto Moise aahilopola mthukumano, "Muhirukuneye nnikhuru ntoko nlo. Mukhume eriyari aya!" Vano, nyuwo munnisuwela Soolempwa, musome 16, 17, 18, hata, ekapiitulu, nto munoophwanya. "Mwiivalaanihe ni anatampi ala, anatampi oohaamini. Mukhume eriyari aya, okhala wira awo aneetta arowaka opweteya, ni sothene awo arin'aya." Nto okathi awo... etthaya yaahikurumuwa khumora n'atthu ala yaavarenle mooro wooreerihiwa. Atthu oohittheke yootothiwe n'atthu.

51 Vamosaru olelo! Aakhala atthu anci-ene oohittheke ammorela matapha a ilimalelo, evarenle Masu Oowaarya mmatatani mwawe, ni yaanyiheriwaka wira anlaleya Yaawo. Miyo kihoona ekhalelo emosa wiitho wa murumeyi mmosa okathi ene yoowo, murumeyi mmosa Metotista, aari murumeyi

Metotista mpakha Ettiminku evinre ohiyu. Nto vawehalyaawe, kinooona wira ennihimya ethhu vanci-ene wa nyuwo, munna, okhala ota.

⁵² Vano, moone, ovarela mihasa sa erupani, wowunkhela woopahiwa woosivela ohoolo wa Muluku, nto matata ale evarenle-ene yeeyo, nnakhala vo yaahipweteya ni muhasa wa erupani mmatatani mwaya, okhala wira awo yeererya wira ethhu mwa exariya, nnakhala vo, voovirikanya Masu a Muluku, yeereryaka opaka mutthenkeso. Khwira, “Nyuwo khamunreere wiihimya mmansinyu. Nyuwo mw’ani wira muhimye wira murina Masu othene a Muluku?”

⁵³ Awo yaahivonya woona wira Moise aari na—namitthaka a okathi ule. Moone, owo aarina SIISO ANIHIMYA T’APWIYA. Khaakhanle hata mutthu elapo ya vathi ntoko yoowo. Owo aahikhalana Mutthaka, nto atthu khuvonya woona Yoowo. Ni Moise aari volikana ni SIISO ANIHIMYA T’APWIYA. Vekeekhai. Vaareera.

⁵⁴ Vano ninniphwanya ethhu emosaru olelo, atthu ooreera murima, atthu aalupale, atthu ooreerexa murima aneererya olaleya Masu a Muluku (mmatatani mwaya) mwa ikano kamosa-kamosa soopakiwa ni mutthu. Ethikilaka *va*, ni ethikilaka *va*, ni ekhalihaka *ela*, ni “murwe mwiitakanxe ekereja ni murukunxe omempuru anyu,” ni okhwa muroohoni ni Masu awo mmatatani mwaya! Munnona?

⁵⁵ Awo khiyaawerya omwaamini namitthaka a Muluku wala Mutthaka Awe wa nihiku nle. Awo khiyaawerya osuwela mwaha wa xeeni Muluku muulupale ahaavaraawe muteko nnikhuru nothene n’atthu, nto khuhela mwa mutthu mmosa paahi.

⁵⁶ Akavi a yaawo kilavunlyaaka-no olelo, “Ninrowa wira exeeni, Munna Branham? Hiyo noosuwela wira mookhalana exariya, masi ninrowa wira exeeni? Mutthenkeso onooniikara, hiyo khanaarowa okhalana nipuro nikina n’orowa.” Kinniwoonela othunku; masi nookhala Nipuro. Nyuwo muniira, “Ahe, naamookhwa etala.”

⁵⁷ Davidi oohimya, “Kaari mmiravo, nto vano kihuuluvala, nkinamoone naxariya onyanyaliwe, hata osuulu awe ovekelaka esimola ya yoolya.”

⁵⁸ Eyo vekeekhai eri mwa mulipiheryo mmosaru awo yaamukhoottale-aya Yesu. Awo yaari ooputaputeleya mmurormoleloni mwaya, ni anamukuttho oowaarya ni ipa soowaarya, ni ikereja soowaarya ni ipa moolompa-mo soowaarya, awo yaahivonnye-aya omoona Muluku mpaani mw’Awe ya mutthu. “Nyuwo, muryeene mutthu, muniikhaliha Muluku.” Moone, awo yaari ooputaputeleya mwemmo! Atthu ala yaari ooputaputeleya wira Datani n’akina yaahikhalana exariya. Nimurodi aari ooputaputeleya wira aamuwerya opaka ethhu yaarowa waaviriha atthu vasulu va oviruwa wa Muluku.

Atamu aahikupali wira aakhunenle-ru epwitipwiti awe Muluku khaawerya woona. Khamunwerya okhuneela, Muluku ohaana okhuneela. Munnona? Munnona? Mutthokiheryo wa Muluku onnikhuneela, kahi wawinyu. Kweekwe enikhalaka siiso, awo anoovonya omoona Yesu mpaani mwAwe moolompa, Muluku owiisooniherya mw'erutthuni.

⁵⁹ Olelo moota enikoonihaaya owereya koonaka wira Masu a Bibilia aathikilasiwa vanci-ene ni ilimalelo. Ni atthu a murima wa xariya aneemela vale ni wiiwa Masu awo, ni ansuwela wira Eyo Ekeekhai, masi awo khaniileva wira yiittikinye, okhala wira ilimalelo saya siniwiixuttiha vovirikana. Murapihe miyaapu ni makapu, nto, axinna, mukeleleke ohoolo. Masi wa hiyo, ni wa miyo ni etthoko aka, hiyo nimmukuxa Kristu, Masu. Munnona?

⁶⁰ Nrowe nimukuxe Yohani 3 okathi vakhani paahi, Nikotemo, mwiixuttihi ni mulipa-ooruma a muromolelo mmosa muulupale onihaniwa Sineetriyu. Awo yaahithukumana vamosa, khupaka ilimalelo saya. M—mmosa a aFarisi ni mmosa a aSatukhi, nto awo yaahikkhalana muromolelo aya okathi uwo, ivirikanelo saya, nto siiso awo... Mulopwan'ola aari mwiixuttihi, mulipa-ooruma a Esineetriyu ila yuulupale, mulopwana mmosa oosuweleya mwa mwiixuttiho. Owo aanisuwela Soolempwa, owo uupuwela siiso. Owo aasuwela eyo ni elimalelo aya. Yesu khohimye wira, "Nyuwo, mwaha wa ilimalelo sanyu, moohonona Sooruma sa Muluku"?

⁶¹ Moone, mwaha wa ilimalelo saya! Exeeni iyo? Ohelamo otaphulela waya mmansaya mwa Masu, ohikhanle ohiya Awo, etthu Awo anihimy'aya. Awo aniira Eyo khenihimya *yeela*. Nyuwo mooweha wira, nlo nsu nimosaru xetwani aarumeenlyaawe wa Hawa, wira opacerye mutthenkeso woopacerya, moone. "Vekeekhai yaarowa okhala *sa*. Muluku khaarowa wira eyo, nyuwo moosuwela." Moone, eyo etthu emosaru. Eyo etthu emosaru olelo.

⁶² Vano hiyo ninniweha, mulipa-ooruma ola aahirwa wa Yesu. Etthu woopacerya, vano, owo aarweenle ophavela Ekumi Ehinimala, owo aarweenle ophavela woopowa. Nnakhala vo, mutthu a mukhalelo awe, mwiixuttihi wIsarayeli, masi mwiixuttihi wIsarayeli aarwiye wa Mutthu hiyo nihirinaahu yoolempwa wira ootoko okhalana nihiku nimosa oxikola. Mulopwana mmosa oowuuluvala, namukuttho oowuuluvala, oosuwela, aarwiye wa Mmiravo. Awo yaari atthu oosuwaneyeya, mulopwana thaaciri aarwiye wa Mulipa-oolola ahaarina nipuro wira uuramihe muru Awe, wira amukohe Yoowo ephiro yo woopowa ni Ekumi. Yoopacerya, awo a Esineetriyu ile, siiso aahihimya Nikotemo, awo yaahoona etthu mwa Yesu atthu akina a mutthenkeso aya yaahaarin'aya. Awo yaahoona wira yaahikkhala etthu mwa Yoowo, okhala wira owo iirale, "Rabbi, hiyo noosuwela wira Nyuwo..." "Hiyo," ayo, awo

khayaahimya eyo, okhala wira awo yaamoomoliwa. Munnona? “Hiyo noosuwela wira Nyuwo mwa Mwixuttihi mukhumme wa Muluku, maana khaavo aakhanle wiiraka itthu iya Nyuwo siniir’anyu ehikhanle wira Muluku ori ni yoowo. Hiyo noosuwela eyo!” Oh, wulu! Mutthenkeso!

⁶³ Vano, hiyo ninnoona wira Yesu aari wiisooniherya wa Muluku. Vano, “Khaavo onwerya wira itthu iya Muluku ahikhanle ni yoowo.” Awo yaanisuwela wira yaahikhala etthu yoovirikana mwa Mulopwan’ole. Owo aari Waarya wa nihiku. Owo aari Namoonna a Muluku.

⁶⁴ Siiso-tho Kore aahoona etthu emosaru mwa Moise. Awo khayaarina mutthu nihiku nle ntoko Moise. Owo aari namoonna a oMuluku a Muluku, a nihiku nle, wa owerya wa Muluku. Kore nnikhuru nawe naahoona eyo mwa Moise. Awo yaahisuwela wira khivaaweryaneya okhala Moise; Moise khaawerya otthukula Ephareya Yooxerya, Moise khaawerya oveleliha ihasara mulaponi. Aari Muluku mwa Moise, nto, okhala wira Muluku aahiisooniherya Mmansawe mwa namoonna wala waarya wa nihiku, awo khuvonya wona Yeeyo. Kore aatthuna opaka nikhuru nimosa nothene n’atthu, okeliha-mo etthu p’itthu.

⁶⁵ Ti yeeyo ereerelo ya mutthenkeso, omukeliha-mo khula mutthu oohureya okhanle, ni wiihana “oKristu.” Animuroiha mmiravo oxikola ohinsuwela-tho etthu ya Muluku onvikana Hotentote aarow’awe osuwela ohiyu wa wEjitu, anoomuroiha iwe ni onvaha esomelo ni omwixuttiha pisikoloxiyya, ni onvaha Ph.D., ni ekharawu ya etotori wala ekharawu ya erattelo, wala etthu wala ekina ntoko yeeyo. Ni omuruma olaleya Ehapari yooreera, ohinatoko hata woopowa, onrowa okhootta eyareliwo ni harusi ni ohihimuwa, okhootta ovoniha wa Muluku, okhootta Owerya wa Muluku, okhootta ipacerelo sene seiyo Yesu okhwenly’awe, okhootta wira Marku 16 t’owuupuxeriwa ni Muluku, okhootta “ithoonyeryo iya sinimwaatthara ale anaamini” Yesu ohimnye-ene Masu Mwaneene, okhootta Miteko 2:38, onnikhootta khula emosa wa Soolempwa wira ti soowuupuxeriwa ni Muluku. Ni weererya okuxa elimalelo ya mutthu awo ahinsuwel’aya hat’etthu ya yeeyo, ni onyaanya ni yeeyo. Nto mwaaleela-ru Ekeekhai ni owooniha Ekeekhai, awo annuuliwa muru wiitikinya, mwaha wa mutthenkeso aya.

⁶⁶ Kore aairale etthu emosaru. Owo aahimoona Muluku mwa Moise. Owo aahoona wira aari Nanvara muteko a Muluku avaraka muteko mwa yoowo. Ni Nikotemo aahimoona Muluku mwa Kristu, “Khavo mutthu onwerya wira itthu iya ehikhanle wira Muluku ori ni yoowo.” Nikotemu aari mmutthenkesoni, ophavelaka okhuma. Kore aari ota, eereryaka opaka mukina wira okele-mo. Eyo ti yaari evirikanelo. Nikotemo aaphavela ophwanya woopowa, wira akhume mw’etthu iyo; owo aahikhala mmo okhuma mmiravo, owo aahooceya n’iyo. Owo

aathuna woopowa. Masi Kore eererya wiipakela ni—nipuro owo aakhanlyaaawe okhalaka muulupale.

⁶⁷ Ti siiso eryaaya n’atthu olelo. Owo ti mulattu ni oKristu, hiyo khinreerane itakiheryo sinci-ene soowootha. Nto atthu ahu aPentekosite, kileveleliwe nuulumo nlo, ari oonanaraxa ni yeeyo, elikanyiheryo ya mw’erutthuni! Muluku anvenxe mutthu anvahе etthu, nto atthu othene mulaponi animweererya omutakiha mutthu uwo. Khamunsuwela wira nyuwo muniiva nikhuru nanyu? Mwaamuttikhaka mphira. . . “Nto mahala,” ntoko Paulo saarow’awe ohimya, “nrowe nitthimakele mutek’owo ni ovilela.” Mutthu orina mphira, muhimukumihe mmatatani mwawe, mphavele omukhapelela. Masi ohiya vo, okhala wira owo khoniira mpannta wa mutthenkeso anyu, nyuwo muneererya omwaakha yoowo. Mutthu mmosa okhanle oohikasooa, owo khaawerya, aamwiikwattula ni maluwa vatapetini, vano nto ophavela okumiha Nenlo mwa nyuwo. Ti yeeyo. Vano, olavula wa muroohoni, kinihimya. Kileveleliwe, miyo. . . Ahe, owo onimwiikwattula mw’etthu emosa yaamukhaani ntoko Miteko 2:38, owo vekeekhai onoomora. Owo akhalakhaluru aikwattulaka mwa Marku 16, owo onrowa owerya sayi? Munnona? Ha. Masomi ooyevaxa a Kristu. Nto etthu ene yeeyo yaavaanyihaniwe Omuthukumanoni w’oNicea, awo nlelo anniikwattula mwa yeeyo nuuvira miyaakha iya sothene.

⁶⁸ Yeereryaka, Kore eererya opaka mutthenkeso, wira okele-mo. Nto Nikotemo aahikhala mwemmo, aphavelaka okhuma-mo. Nikotemu aahikupaliwa, khukhuma. Kore aahipweteya, ni ikuru sawe, owo aahipweteya mwa ikuru sawe. Oh, wulu!

⁶⁹ Mutthenkeso Nikotemo waary’awe-mo, waanisuwela wira Kristu aaveleelihiwe ni Muluku, ohimye siiso. Nikotemo, ekapiitulu 3 va, onnihimya, “Rabbi, hiyo noosuwela wira Nyuwo mwa Mwixuttihi oveleelihiwe ni Muluku, maana khaavo onwerya opaka miiriirya iya Nyuwo mumpakaanyu ehikhanle wira Muluku ori ni yoowo.” Nto nikhuru nimosaru, mwaha wa mutthenkeso aya, naamwiihanne Owo “Pelizepuli,” mwaha w’owerya Wawe wo owoomola axetwani, nto khwira, “Owo oniwootoha atthu ahu ni Mwiixuttiho Awe.” Eyo etthu emosaru olelo. Woottha exeeni?

⁷⁰ Yesu ohimye wira, “Miyo kiniira paahi itthu sinaasivela Atithi, Miyo kinsuka Masu a Muluku paahi,” okhala wira Owo aari Masu. Owo khaakhanle wiiraka etthu ekina woohikhala Masu.

⁷¹ Masi, mwaha wa mutthenkeso aya, mwaha wa enamuna aya, awo yaahikhalana atthu ootthukiwa. Mmurimani mwaya awo yaanisuwela, masi mutthenkeso aya khuwaahiya osuka. Vano, opaka ephiro y’ovuluwa, wira yaakhottiherye atthu ohiya mutthenkeso (“atthu othene ehimutthare Yoowo”), wira yaakhoottiherye atthu ohiya mutthenkeso enatthara Ekeekhai

ya Muluku (yeeyo Owo aary'awe Ekeekhai "Miyo ka Ekeekhai, Waarya"), wira yaakhoottiherye awo ottihara Yeeyo, awo yaahimya wira Owo aawoottha atthu. Nkuupuwelani yeeyo! Mutthu, mmurimani mwawe aasuwela wira Owo aari Muluku, wira Muluku aari mwa Yoowo ("khaavo onwerya ohimya itthu iya, wala wira itthu iya, vahikhanle wira Muluku ori ni yoowo"), asuwelaka yeeyo ni ahimya yeeyo ni alipiheryaka yeeyo, vano nto khunarukunuwa ni omwiihana Owo "Pelizepuli, ni namaawoka atthu," atthu aya, "ni Mwiiixuttiho Awe." Oh, wulu!

⁷² Nikotemo aanisuwela wira Ole aari Profeta. Vano, owo aari mmosa mmutthenkesoni aamphenta Muluku voophiyerya ni aamoova Muluku voophiyerya, ni aasuwenle ni Waataana wa Khalayi wira Mulopwan'ola aahikhalana soophaveleya ni aahooniheriwa ni olipiheriwa, Profeta aaveleelihiwe okhuma wa Muluku. Mulopwan'owo, miyo kinoomuttittimiha vakhala wira owo aarwiye ohiyu, owo aahiphiya vale. Owo t'ophwanelaxa waavikana anci-ene wa awiixuttihi ahu olelo, awo kharwa nnakhala. Nikotemo vookiserya aahiphiya. Vano, muhimulamule, vakhala wira nyuwo khimunaphiye nlelo. Nikotemo aanisuwela wira Ole aari Profeta, tivo owo aanimoova Muluku. Owo khaarowa omuhiya Mulopwana ole omuhiya owo, Waarya wa nihiku nle. Khivancala moota xeeni Eyo yaary'aya yoovirikana, moota xeeni mutthenkeso awe waahimyaaya wira Eyo yaari yoovirikana, owo aahimoona Muluku amulipiheryaka Mulopwana ole ni aanisuwela wira Ole aari Profeta. Nto vakhala wira Owo aari Profeta, Masu a Apwiya animurweela profeta, ni Owo aanisuwela etthu Owo aahimya'awe. Munnona? Vano owo aahirowa wa Yesu, owo aatthuna osuwela moota w'ophwanya woopowa. Vakhala wira Mulopwan'ola aari Profeta, Masu a Muluku yaari ni Yoowo, ni Owo aamusuwela ephiro yo woopola.

⁷³ Masi ele Nikotemo arinaawe wiixutta t'ile atthu anci-ene olelo, a miromolelo sa nihiku nla, arinaaya wiixutta. Nikotemo yaarinaawe wira osuwenle, t'ile atthu olelo anthuneyaaya wira esuwenle, a miromolelo iya. Owo aahinvikana Profeta. Owo aarwiye wa Yoowo wira osuwele, omuleela Owo wira amuhimeerye ele ekhanle ephiro y'Ekumi, nto Yesu Mwaneene aari Ekumi. Ole orina Mwaana ohaana Ekumi. Tivo owo khaa, khaarina orwaaka ophavela wiixutta mwiiixuttiho, owo aahaana orwa omukupali Mutthu uwo. Eyo t'ile ekhanle ohiy'ula! Nluku Nikhulupale Noolipiha ninookhoottiwa-tho. Exeeni Nluku Nikhulupale Noolipiha? Awo ti Masu, vekeekhai. Kristu, Owo ti Masu.

⁷⁴ Owo aahaana wiixutta etthu. Owo aahuupuwela, "Ahe, vano, Mulopwan'ola Profetaa, Owo Profeta paahi."

⁷⁵ Vano, nyuwo mooweha wira, Yesu khaakhunle yookoha awe, Owo aarompwapwela paahi mwaha w'ohoona wawe. Oonvikana Profeta, Owo aari Masu ni Muthuko wowaarya wa Masu! Owo aari Muluku aaryaka ovira muhina mwa

ekaruma, ooniheryaka wira aari Muluku mwa Mutthu. Owo aari Masu. Yohani Oopacerya, kapiitulu 1 . . . Yohani Oowaarya, kapiitulu 1, kiireke, onnihimya “Wopaceryani naari Nsu, nto Nsu naari ni Muluku, ni Nsu naari Muluku. Vano Nsu nihiipaka erutthu, khukhala ni hiyo.” Nto va yaari Masu a Muluku yaaryaka mwa erutthu ila yaamukhaani ni yootteettheya ya Mutthu, nto Eyo yaahiiriha mutthenkeso ohoona. Masi Owo aarwiye wira aakuxe atthu v’omeekha. Oonvikana Profeta, Owo aari Masu! Owo Ekumii. Kahi. . . Owo khaarina owiixuttihani w’Ekumi enoorwa, Owo Mwaneene aari Ekumi yeeyo! Owo aari Ekumi. Owo aari Waarya. Owo aari Ekumi. Owo aari Ekumi Ehinimala, yaari mwa Yoowo, ni Owo paahi t’ori Nanvaha Ekumi Ehinimala. “Ole orina Mwaana ohaana Ekumi.” Tivo muhaana. . . khamukhanle okhalanaka Masu paahi yiixuttihaka sa Yoowo, muhaana okhalana Yoowo.

⁷⁶ Nyuwo muniira, “Oh, atthu anookilaathi ni omwiixutta Bibilia owo ni moolumo othene a Ekereku, ni iye sikhanelle itaphulelo, ni imaliheryo, ni sikina.” Ni ohisuwela hat’etthu ya Muluku ovikana hat’etthu! Munnona? Nnari! Ole orina—ole orina mu—mu—mukhalelo, ole orina ethhokiheryo? T’ule orina Mwaana, orina Owo, Mutthu ene. Owo ti Ole orina Ekumi.

⁷⁷ Nikotemo aanisuwela wira Owo aanisuwela ya Ekumi, masi owo khatonko osuwela wira Ole aari Ekumi Ehinimala. Ti yeeyo, Mutthu aalavulanaawe, Namithaka, Waarya wa nihiku, Waarya wa mulaponi. “Waarya ommwaleela mw’epiphini, vano epiphi khuhisuwela Owo. Owo aaveleeliheriwe Awawe nto Awawe khuhimwaakhela Owo.” Mwaha wa xeeni? Mwaha wa xeeni? Okhala wira awo yaari oowitthokiha, oowikhaliha n’urapiha miyaapu ni makapu, ni ilimalelo, mpakha awo yaavonyale-aya wootta Masu oowiiipaka erutthu.

⁷⁸ Eyo yootthikela. Eyo yootthikela-tho. Ehantisi iyo enootthikela imaara kamosa-kamosa. Ayo, owo aanisuwela wira Owo ahi—Owo aanisuwela sa Ekumi, masi Nikotemo khaasuwela wira Ole aari Ekumi. Ti yeeyo ekhanle olelo. Atthu anci-ene aneererya omukhaliha Yesu, oh, Mwiixuttihi muulupale, awo hata aneererya ohimya wira aari Profeta. Masi nyuwo mweereryaka ohimya wira Owo aari Muluku, eyo ti yoowaattaxa. Munnona? Masi Owo aari Muluku, ni Owo Mulukuu, ni Owo okathi wothene onookhala Muluku. Ti yeeyo. Ti yeeyo.

⁷⁹ Nwehe, Owo khaamuhimenrye Nikotemo, vano, okathi owo orwiye-awe wa Yoowo, Owo khaahimye wira, “Vano, Nikotemo, Miyoo kookhalana ntittimiho muulupale wa nyuwo, wira nyuwo mwa mu—mu—mwiixuttihi wIsarayeli. Kinimooleelani wira, nyuwo mumphavela Ekumi Ehinimala, khino mwaahaana olokiha osoma wanyu. Nyuwo khamunihimya moolumo anyu oratteene.” Ethiru. Wala, “Khino nyuwo

muhaana ophavela muteko muulupale mmuromoleloni mwanyu, wira mukhalane Ekumi Ehinimala.”

⁸⁰ Ti yeeyo atthu anci-ene aneerery’aya wira olelo, uh-huh, muteko muulupale, awo anthuna okhala okhuma pa—pastore ekhale humu a estaatu, wala—wala wa pixipu wala etthu ntoko yeeyo. Eyo kherina naata ni Muluku.

⁸¹ Nkawehani etthu Owo iiraly’awe ohoolo wa mutthu uwo. Owo aahimpwapwela mwaha w’ohisuwela wawe okathi owo aakhalaawe, “Muntthuna okileela wira nyuwo mwa mwiixuttihi wIsarayeli nave khamunwerya osuwela ithu iya, okathi,” Owo iiralyaawe, “mutthu ohaana oyariwa vasya?”

⁸² “Vano,” owo khwira, “miyo mulopwana mmosa owuuluvala, okela mmirimani mw’ame aka?”

⁸³ Owo khwira, “Nto nyuwo mwa pixipu, karteyaale, humu a estaatu mukereja ya Pentekosite,” wala mutthu mukina tho, “mutthu mmosa muulupale mmutthenkesoni, nave khamunsuwela Yoolempwa?”

“Oh, hiyo nookhalana Moise.”

⁸⁴ “Mwaamusuwenle Moise, mwaamukisuwela Miyo, okhala wira owo t’ule olavunle sa Miyo.” Munnona? Masi kahi vootthariha ilimalelo saya, wawaya—mutthenkeso aya, owo waari woovirikana. Masi Moise aahilavula sa Yoowo, ni Owo aari Ole Moise aamuhimyaawe, nnakhala vo awo khayaasuwela. Mwaha wa zeeni? Awo yaarimwiitthukaxa ni ilimalelo, awo khayaasuwela.

⁸⁵ Nto axinn’aka ansoma, ankuxa efiita ela, muhittipihe vano. Minuutu mmosa paahi, rowe niwehe ni etthu ila wiitho wene. Miyo kinnoophentani, nyuwo mwa makhampusi. Ni nkineererya okhala oosuwela sothene. Kaaruuhelaka moonelo owo, weeso mmaalihe efiita mukivekelele. Miyo kimpavela paahi wooruuhelani etthu ekhanle Ekeekhai. Muhihye eyo woovirani.

⁸⁶ Vano, miyo kinnittitimiha nlamulo na mutthu, ni sikina, masi nyuwo mwaapakaka mitthenkeso iya...Nkaaweheni aFarisi, khiyaarina nnata ni aSatukhi, okhala wira aSatukhi khiyaamini ni—hata nlaikha wala—wala erooho, wala ohihimuwa, wala etthu, ni aFarisi yaanikhalana soopiili, nto awo yaari mukhottoni mmosa ni mukhwaawe. Vano Maunisista anaamini etthu emosa, Oraru onaamini ekina, ni Metotista ekina, nto aPrespiteriyaano ekina, ni nyuwo munikweretha mikaano sikhaani. Nto murina exeeni? Ovalaana wa oxinna. Mwa vaavo, ninoophwanya nipuro nenlo mBibiliani okathi vakhani paahi, etthu ekhanle, ni etthu Muluku onihimy’awe eyo okhala.

⁸⁷ Vano, nnari, Owo khonamuhimeeryeke wira airattelihe. Owo aamumpwapwela paahi mwaha wo ohisuwela etthu y’ekeekhai.

“Nyuwo mwa mwiixuttihi wIsarayeli, nave khamunsuwela itthu iya? Vakhala wira kooleenleni itthu sa vathi, nave muhinawerya osuwela saana...” Muupuwele! “Mwiixuttihi, a enamuna yuulupale mukereja Ortotookisa, pixipu, karteyaale, nave khumunwerya hata osuwela mwa enamuna y’enamwane ya itthu sa erutthu Miyo sinooleelaakani, munrowa osuwela sayi itthu sa erooho sinkhuma Wirimu?”

⁸⁸ Masi mulipa-oototha ihopa oohisuwel’etthu mutokweene ahaawerya hata olepa nsina nawe, aahisuwela Eyo, moone, ni aahikhalihwa muru wa ekereja oYerusalemu, Petru. Munnona? Oh, “Othene ole Atithi akivahaly’aya, onimoorwa.” Munnona? Awo annoona Eyo. Awo annaamini Iyo. Awo anniira ettharihaka Yeeyo, esuwelaka wira khiivo etthu enrowa waakhoottiha.

⁸⁹ Siiso ntoko mulimi. Kehiyo yoothuneya ohimya eperwa, masi ohelela eyooniheryo. Ehimmwe wira mulimi mmosa aahimuhela mwalyakhu, nto khiyaarina mooce oophiyerya, owo khuhela nooce na nrattha vathi wawe. Okathi nrattha naamukhaani nitothonle-aya, nlo naari etthu yootheihaxa alyakhu ale yaatonko aya wona. Nlo naarina wiitho wootheiha worakama, ni naarowa nirettehaka ohiya wiipa, ni—ni alayakhu othene yaanilya ni oworokhola mweehilini. Nto iwo khiwaari olya wawe, vekeekhai. Nto nihiku nimosu muhore khumweettiherya mpakha wiithela wa ehili, wira aattotte anasope kamosa-kamosa, nto vasulu vantumuxa naahikhala n—ntthiya. Nto khwiiraneya wira etthekeu yaavekhulela epantte ya ntthiya, nto nlo naahoona wunkhela maasi. Eyo ti ephattu awe tu. Muhore khwira, “Koo, koo, koo, koo, hokolowa!”

⁹⁰ Owo khwira, “Kwa, kwa, kwa,” mpakha mmaasini. Mwaha wa xeeni? Owo aari nrattha, opacerya wene. Voohicala moota xeeni mwalyakhu aarettehaawe, ole nlelo aari nrattha.

⁹¹ Nto ti siiso ery’aya wa mutthu othhomeliwe Ekumi Ehinimala. Okathi onoonaawe Waarya wa Muluku, khasivo mitthenkeso soophiyerya molumwenkuni wira simurettehele simuhokoloxeryaka mwemmo. Nnari. Mwaha wa xeeni? Ti ephattu awe. Owo pooti aakhanle olyaaka n’awo okathi munci-ene, ni olya ikokhola saya ni ipatthanelo, masi owo onniphiyerya nipuro owo ophwannyaawe etthu yoovirikana, vano owo onnisuwela. “Ipwittipwitthi Saka sinnisuwela Nsu Naka,” ohimnye ti Yesu, “mmalapo iyo khasimmutthara.” Siiso iyo saakhanle sittharaka etthu yootikiniha, masi muhina mwaya yookhala etthu yoovirikana. Mwaahiye yiiwe Ekeekhai emaara emosa, nto nwoonase. “Othene ole Atithi akivahaly’aya onimoorwa.”

⁹² Ayo, Owo aahimpwapwela mwaha w’ohisuwela. “Nyuwo mwa mwiixuttihi wIsarayeli, nave khamunsuwela itthu iya? Muhaana oyariwa vasya!” Vano, mutthu eephattu, miyo kintthuna o...nyuwo nwehe etthu emosa va, “Nyuwo muhaana oyariwa vasya.”

⁹³ Vano, ekumi y'ephattu, vakhala wira nookhalana ekumi y'ephattu, wira nikhale ookhomaalela mwa ekumi ila y'ephattu, mwa itthu s'erutthu, nihaana okhalana oyariwa w'ephattu. Awo khanookumihani paahi vamwirini nipuro nlo, moone, khaniweemexani vaavo mwa enamuna emosa. Awo yaahiilipiha, masi khuhivar'etthu. Ohaana okhala oyariwa wa vano, oyariwa w'ephattu, wira wookhaliheni ookhomaala wira mukhalane miyoonelo mithanu, weetta, olavula, woona, olawiha, waapapela, woona wunkhela, wiiwa, wiitikinya, sikina, okhala wira nyuwo vo mwa mutthu, ni nyuwo mwa—nyuwo munikhala oovahereriwa itthu iya sothene okhala wira iyo sinkhala epantte ya ekumi y'ephattu.

⁹⁴ Nto, mwa eyareliwo yeeyo, imaara sikina hiyo ninkhala oosuwelaxa mwa osuwela wa molumwenkuni wala itthu sa molumwenkuni, nimphiyerya okhala Akhulupale ni—ni asomi aalupale, ni mamekaaniku aalupale ni anasiyensiya, ni sikina. Ni nyuwo kweekwe munnisuwela, okhuma woopaceryani wene, yaari aana a Kayini yaarina enamuna yeeyo yo osuwela; kahi a Sethi, awo yaari amakhampusi oowiiyeviha. Masi aana a Sethi yaari atthu oothunku. Masi aana a Kayini kweekwe yaari oosuwela, oosulu, a siyensiya, matothoro ni atthu aalupale. Ti yeeyo. Bibilia ohimnye siiso, nyuwo moosuwela, Owo onniixuttiha eyo. Ni anatiini saana, masi yaahipweteya wookiseryani. Hiyo ninkhala aakhili mwaha wo orowa oxikola, okuxa isomelo, ni sikina, hiyo ninkhala oosuwela saana, oocencerya, ni ninniwerya wira itthu ni ohimya itthu, ni imaara sikina olavula onvikana mutthu osareyiye Erooho. Yesu khohimnye wira, “Aana a olumwenku ula t'osuwelaxa waavikana aana a Momweneni”? Tthiri, okhala wira awo, ni isuwelelo saya awo anniwerya—anniwerya olavula ni okhala oolavilavixa ni ooweryaxa olavula, ni okuxa Soolempwa n'urukunxa Iyo ni wiiriha Iyo ohimya itthu sihinihimyaaya.

⁹⁵ “Oh, Eyo khenihimya siiso vene.” Mutthu aahimya yeeyo, mmuhuluwe. Muluku onnikhapelela Masu Awe, nyuwo moosuwela, Bibilia oohimya. Awo alempwe voolikana ene enamuna yaathuneyaaya wira Awo ekhale. Munnona? Vano, Awo aniheliwa mwa enamuna emosa wira yootothe, wala emukwattule mulipa aakhili mwa Yaawo. T'okhweyaxa, tivo awo anikwattula aya Vaavo. Munnona? Vaareera.

⁹⁶ Osuwela nno wothene ni itthu awo anweryaaya othukumanya, nnya, masi ti mwa . . . oyariwa iwo ti wa vathi, elapo ela. Owo ti wa vathi, ni ti woovirikanya Erooho ya Muluku. Oyariwa woopacerya, wira onikhalihe ookhomaala mu, onnikhaliha atthu ankhwa, mwaha wa mwiirelo wa etampi omatta, yoomwiiriha mutthu orwa molumwenkuni oviraka mwa muthiyana. Nto mutthu oniyariwa ni muthiyana t'a mahiku vakhani, masi mutthu oniyariwa ni Kristu t'Ohimala. Yobi iirale, “Mulopwana oniyariwa ni muthiyana t'a mahiku vakhani

ni oowaatta mikattyamiho.” Nwehe, masi mutthu oniyariwa ni Kristu, ohaana oyariwa okhuma Osulu. Vano, masi mutthu oniyariwa elapo ya vathi, oniphiyerya okhala oosuwela ni onnihalela okhala oolavilavixa.

⁹⁷ Nkawehani moota xetwani aaryaawe oocencera, owo aanimoototha khula namukuttho orwiiye mulaponi. Tthiri owo ohiira. Owo aanimoototha, owo nlelo onniira. Ayo, vekeekhai ohiira. Owo aari oocencera, masi owo aahiivirikanya ni musewe awe, nihiku nimosa, Yoowo aamuxintale. Nto etthu emosa paahi erinaahu wira omulipana Yoowo paahi, Owo oomuxintta. Munnona?

⁹⁸ Masi ti okhuma vathi, ni eyo, osuwela nno mutthu onthukumanya-awe wira alipiherye ni wooniherya itthu iya sothene mwaha wa xeeni mutthu aarinaawe wiiraka *ela* ni mutthu aarinaawe wiiraka *ele*, ti yoovirikana ni owanani (muupuwelo w'erutthu) wa Muluku. Yoolempwa ehimnye siiso. Ekeekhai. Voohicala moota xeeni, awo anwery'aya ohonyokola. Kintthuna wira mutthu okoonihe vatthu Muluku otonko awe okhalana mutthenkeso wala otonko awe orumiha mmosa, woohikhala opwapwela mu mBibiliyani. Voohicala moota xeeni awo anweryaaya wererya okhala anaakhili, ti yoovirikana! Moota xeeni osuwela okhanlyaaya ovenyaka ni woovirikana ovaanyihana ni nyuwo, ni owiirihani nyuwo wiisoona okhala mukhaani *siiso* mwaha wo wooleelani sa yoowo, masi ti woovirikana ni Soolempwa.

⁹⁹ Ookhala aakiirenele, “Munna Branham, yookhala etthu emosa miyo enoovirikanyaakani.” Khwira, “Nyuwo mwa Yesu Paahi.”

Miyo khwira, “Miyo nkihiyo. Miyo nkiniira mpantte wa hata mutthenkeso.”

¹⁰⁰ Humu mmosa a estaatu emosa aarummwe, nihiku nlo, nto khwira, “Ookhala okihimenrye wira nyuwo mwaari Yesu Paahi, Munna Branham.”

Miyo khwira, “Eyo ti yoovirikana. Ti yovonyeya.”

¹⁰¹ Khwira, “Awo akileenle wira nyuwo munnaamini ophenta wootaphuwa, wira alopwana yaahaana waahiya axaar'aya n'uphavela...” Vano, moone, iwo wootha paahi wa xetwani. Nyuwo moosuwela eyo.

¹⁰² Miyo khwira, “Vekeekhai kinnivirikanya itthu iyo soohilempwa! Miyo kinnaamini ereerelo murima ni oloka. Kinaamini wira mulopwana t'ophitaana ni mwaar'awe awo yaakhalakaru wira akumi.” Khimwaakhanle omukuxaka muhivekenle toko.

¹⁰³ Nto Yesu Paahi, nikhuru na Yesu Paahi, hat'etthu ya nthowa n'awo, awo t'oloka saana ntoko khula nikhuru, wa miyo. Masi awo anipatisa voovonyeya, awo ampatisela oyariwa

waneenli. Kinnaamini wira hiyo niniyariwa vaneenli ni Erooho Yoowaarya, kahi ni maasi. Miyo kinrumeela Nsina na Yesu Kristu moopatiisuni, ni khiivo hata Yoolempwa ekina mBibiliani wira elipiherye. . .wira yiire voovirikana. Khaakhanle hata mutthu mBibiliani aatonko opatisiwa ni nsina “n’Atithi, Mwaana, Erooho Yoowaarya.” Kintthuna mutthu orwe okoonihe nipuro nimosa mutthu mmosa otonko awe opatisiwa siiso. Vano, vakhala wira ti yoohilempwa, muhiye wira yeeyo!

Nyuwo muniira, “Eyo khenvirikana hata vakhani.”

¹⁰⁴ Eyo yaahivirikana wa Paulo. Owo aahaaruma opatisiwa emaara ekina, ni Nsina na Yesu Kristu, vano nto waakhela Erooho Yoowaarya. Nto Paulo ohimnye wira, “Nakhala nlaikha ninkhuma Wirimu,” aKalasiya 1:8, “ninrwa, wiixuttiha ehapari yooreera ekina,” ohiya ele owo iixuttihaly’awe, “nitakhaliwe.”

¹⁰⁵ Moore, eyo elimalelo. Miyo kaalavula ni mulopwana mmosa muulupale woohikhala khalayi. Khwira, “Munna Branham, nkinwerya. Miyo koosuwela wira Eyo ekeekhaii,” owo khwira, “masi kiireke exeeni wa Yeeyo?”

Miyo khwira, “Mwiiwelele Yeeyo!”

Owo khwira, “Vano, miyo—miyo kookhalana nttittimiho eriyari y’atthu ahu.”

¹⁰⁶ Miyo khwira, “Masi kintthuna nttittimiho ni Muluku, tivo miiwelele Masu Awe. Nyuwo muhaana okuxa ethanlelo anyu, nyuwo munrowa omurumeela Muluku wala mutthu?”

¹⁰⁷ Masi awo amphwanya mutthenkeso aya, okhaliha-mo ihimeryo iya mwemmo, khunatthara. Emaara yoopacerya otonko aya orumeeliwa waari mukereja Katolika y’oRooma. Ti yeeyo. Kimmutthuna mutthu onrowa okooniha etthu ekina yoovirikana. Miyo kinnimusoma wahala, nave, nyuwo moosuwela. Vano muupuwele, owo opatiiso w’Ekatolika, ni atthu othene ampatisiwa siiso ampatisiwa mopatthanani w’Ekatolika. Miyo kinimooniherya ohiyu ohinatthi ovira, Apwiya yatthuna vale. Ti yeeyo. Mwaha wa yeeyo murin’anyu otthika.

¹⁰⁸ Kahi Yesu Paahi. Vano, aakhala atthu anci-ene ooreera murima mukereja Yesu Paahi. Atthu anci-ene ooreera murima a Asempeleya a Muluku, Ekereja ya Muluku, Metotista, Patista, Prespiteriyaano, ni Katolika. Masi khiivo hata emosa wa seiyo Ekereja, hata emosa wa seiyo. Aakhala atthu mmwe aniira mpantte wa Mukereja. Masi kuhiyo muromolelo owo onaakhaliha awo Ekereja, ntoko atthu aneererya okhaliha eyo siiso. Ti yoovonyeya. Minuutu mmosa paahi hiyo ninoorowa woovahani Yoolempwa emosa mwa okathi vakhani.

¹⁰⁹ Ayo, wira mukhale ookhomaala mulaponi, muhaana oyariwa veephattu wira mukhale ookhomaala, nto eyareliwo eyo enninkhaliha oosuwela ntoko sihimaly’aka. Munnona?

Ni hiyo ninkhala anaakhili, osuwela wahu onninivaha yeeyo. Masi muupuwele wira eyareliwo eyo, woopaceryani waya, ti yoovirikana. Ti ya vathi ni yoovirikana ni Masu a Muluku, ololo vamaithoni va Muluku ni etthunelo Awe, woohisuwela etthunelo ya Muluku. Vaahaari siiso, Nikotemo aamwiira ousuwelanxe onvikana Yesu saasuwelaawe wa Yeeyo. Munnona? “Nyuwo mwa mwiixuttihi wIsarayeli?” Munnona? Munnoona vatthu miromolelo sanyu sinrowaaya, vatthu athu anyu aalupale ni anaakhili anthukumanaaya n’upaka itthokiheryo saya, ni okhaliha?

¹¹⁰ Mukihiye kooleleni ila. Khula okathi Muluku oniveleelihaawe Waarya elapo ya vathi, wa etthu emosa mwa Soolempwa, awo anootthimaka naanaanoru ni yeeyo. Nto mutthu uwo omalakaruru orowa, awo ampaka mutthenkeso wa yeeyo. Ni emalakaruru otthokiha, kintthuna kinvekele khula nammulepa wahala (vaava naanaano, wala ori mufiitani) orwe okoonihe. Khula okathi mutthu otonko awe otthokiha ekereja, eyo ekhwiye vaavale vene ni khenatthikele ovenya-tho. Eyo ti yoovirikana ni Muluku. Eyo ti yoovirikana ni Soolempwa. Tivo miyo kiry’aka oovirikanyana ni yeeyo. Etthu p’itthu Muluku okhanlyaawe oovirikanya, vakhala wira Muluku ori mwa miyo, vano miyo kinvirikanya ele Muluku envirikany’awe. Nwanani Awe ti nwanani aka. Ekereja Awe ti Ekereja aka. Ekumi Awe ti Ekumi aka. Owo oovaha Ekumi Awe, Owo ohiikhaliha miyo wira mwa mahala Awe kiwerye okhala ntoko Yoowo. Munnona? Hiyo noorukunxa mapuro. Owo ohiikhaliha natampi ntoko miyo ni ookikhwela, nipuro naka, wira kiwerye okhala mwaana a Muluku siiso Owo saary’awe.

¹¹¹ Vano munnoona vatthu miromolelo sanyu siphin’ye-aya? (Hiyo khinnapacerye.) Oosuwela mwa akhili a molumwenkuni masi ookhwa wa etthunelo ya Muluku! Vano nrowe niwehe ottuli, neemele vaava okathi vakhani paahi.

¹¹² Atamu aari oovirikana ni etthunelo ya Muluku, okhala wira owo khaaiwelenle Masu. Eerenrye wiipakela ekhuneelo, etiini. Eyo khuvonya, ni kweekwe ennivonyaka, etthu mutthu oneereryaawe opaka. Nimurodi aahivonya. Kore aahipweteya. Exeeni awo yeereryasaaya wira? Opaka mutthenkeso.

¹¹³ Nto nuumala yeeyo, vookiserya awo vaitthokihalyaaya, Yesu aaphwanye, ookhwa ene! Khwira, “Mookhalana maitho nave khamunwerya woona. Mookhalana maaru nave khamunwerya wiiwa.” Munnona? Khwira, “Nyuwo mw’alipa-oohoona, muniweettiherya alipa-oohoona. Mulipa-oohoona amweettihaka mulipa-oohoona, owaili aya khammorela mulittini?” Owo khwira, “Nyuwo mwa mwiixuttihi wIsarayeli, nave khamunwerya hata osuwela ele ekhanle oyariwa vasya? Okathi, nyuwo mwaakhanleru ottaiwene wa ilimalelo saya, khuvarelela Masu, nyuwo mwaamwiira musuwenle wira Miyo kaarweenle waavaha athu oyariwa vasya. Mwaamusuwela

nihiku Naka. Mwaamusuwenle Moise, mwaamukisuwela Miyo. Moise aahilavula sa Miyo ni aahihimya wira Miyo kaamoorwa, nto Miyo kiri va! Nto kaahiireke itthu Moise ni maprofeta ahimye-aya wira kaamwiira, weeso muhikaaminiki. Kaahivareke miteko sa Muluku, weeso muhikaaminiki. Masi nyuwo mwaahiwerye okaamini Miyo, kiri-ene Mutthu, nto mwaahiwerye okaamini Miyo okhala wira Miyo ka Mutthu ni kinvara miteko sa Muluku, mwaamini miteko maana seiyo sinnikhalela onamoona etthu Miyo kiniir'aka." Munnona?

¹¹⁴ Masi nto, ntoko olelo, Owo aakhanleru elapo ya vathi olelo, Asempeleya a Muluku yaamukhalana mmosa, Maunisista yaamukhalana mmosa, nto atthu othene yaamukhalana Yesu mmosa. Vekeekhai, muromolelo aya ohaana omukuxa mphira. Munnona? Waahikeleleke ohoolo, nto awo khanrowa. Ovalaaniha oxinna.

¹¹⁵ Kinnimuupuwela mwammiravo mmosa onihaniwa "Davidi mwaamukhaani." Owo mulopwana, oothela vano, kinoona wira ookhalana emusi. Miyo kinnuupuwela okathi owo opaceny'awe tu. Miyo kaahirowa oSt. Louis. Miyo kinniiwaka sa aximiravo alaleyi, yaaphiyaka iwe ni wira, "Yesu, mwammiravo, aayariwe mwaalelya inama. Maama, t'evi ehanle ya yeeyo?" Masi kahi mwammirav'ole. Owo aarihela ekhasako awe, khukuxa yoosoma khulaleerya. Masi owo aari exeeni? Yaarimwiiraneya owo okhala Yesu Paahi. Atith'awe, Mwenye Walker, yiira mpantte wa Yesu Paahi. Vano, Asempeleya khayaawerya ovilela eyo. Awo yahaana omukuxa David mwaamukhani. Vano, akina aya yaahaana omphwanya Davidi mwaamukhaani. Nto emaara emosa okathi mwammiravo aarinaawe muthukumano oFlorida, owo aahikihana wira kirwe kimukhaliherye. Nto Munna Moore ni miyo naahisoma makukhu maili epantte y'ohoolo w'epaphelo ya ihapari, ni hat'etthu woohikhala Davidi mwaamukhaani, khula ekereja yaahikhalana Davidi mwaamukhaani. Oh, Muluku aka! Vano, vaakhanle wira nikhuru n'ahumu a Muluku yaahisuwela yoovaha mwa mmirav'ole mwaamukhaani, owo aamukeliha minepa ikonto sene Momweneni, moone; omuleela wira oliyale elimalelo awe ya mutthu ni ela siiso. Muluku aahikhalana yoovaha mw'ekumini mwawe, murumeele!

¹¹⁶ Okathi ovoniha wa Muluku okumiheriwaaya emaara yoopacerya, atthu othene yaahikhalana moonelo mmatatani mwaya ni yaaniwerya woona wunkha iretta. Nto, oh, wulu! Mwaha wa xeeni? Awo yaahaana wira yeeyo, mutthenkeso aya waari ottuli mmutekoni. Moone, nyuwo munikhalana mitthenkeso sanyu ohoolo wa etthunelo ya Muluku, nyuwo munuupuwela wira ti yoowo. Masi Muluku ookhalana Ekereja Awe ekelelaka ohoolo mwa inamuna sothene, Eruthu ya siiri. Nyuwo khamuniitakaniha Mmo, nyuwo munooyariwa-Mo.

¹¹⁷ Anaakhili mwa osuwela wa molumwenkuni, masi ookhwa mwa itthunelo sa Muluku. Kileeleni, nto. Kileeleni, nto. Nyuwo

pooti waahimeerya ni owooniherya wira awo aavonya, ni Masu a Muluku ni natiri, nto nnakhala vo awo khanrowa woona. Miyo pooti okilaathi n'ukuxa Masu ni owoonihani wira muromolelo ti woovonyeya. Miyo pooti owoonihani wira iyaaminelo sirin'anyu olelo ti soovonyeya, moone, iyaaminelo iya sa ekereja. Owoonihani wira ti yoovonyeya, nto awo aniira, "Ahe, hiyo nixuttihawe wira naaminiki *yeela*." Moone, wa wuupuwela waka, awo—awo malaxi oowuuma, mwaasuwelaka vale enihimyaaka, malaxi oowuuma a musika. Ayo, ti yeeyo. Awo khanwerya woona. Yesu iirale, "Nyuwo, nyuwo—nyuwo khamunwerya woona, wira murwe wa Miyo mukhalane Ekumi."

¹¹⁸ Aahikhala Nikotemo, mutthu oottittimiheya, mutthu muulupale, pixipu mukereja mwawe, mulopwana mmosa oohimmwa, oophentiwa ni atthu othene, nto aarwiye wa Yesu ni ahaasuwela hat'etthu ya Ekumi ovikana—ovikana hat'etthu. Owo aari oohisuwela saana etthu ya Yeeyo okathi Yesu omuulumenly'awe mwaha wa yeeyo, masi aari naxariya voophiyerya orwa. Akina aya nnakhala khiyaarwiye. Awo yaatthikenle okhala ottaiwene ni aakhulupale a anamukuttho ni Pixipu *Lexe ni lexe ni Lexe ni lexe*. Munnona? Awo yaatthikenle okhala ottaiwene ni yaawo, yaapunti okuxa ilimalelo saya s'ahumu ohiya wiiwa Masu a Muluku.

¹¹⁹ Vano, nyuwo pooti waahimeerya, awo khanrowa wiiwelela yeeyo. Nyuwo pooti vekeekhai... Mwaanwerya otthokelela... Miyo kintthuna kookoheni etthu emosa. Miyo nkinihimya ela vooveeha. Vano, axinna aniwa efiita, miyo nkinihimya ela vooveeha. Mwaanwerya okitthokelela miyo kirowaka nno, nto—nto ephutu vamwirini enawerya okikoha, "Muneettelani siiso ntoko sineettaanyu? Kookhalana ekumi, miyo ka ephutu vamwirini va"? Owo onoowerya wooniherya wira ookhalana ekumi, masi ti ya muthinto woohiloka. Owo watthuna vale weetakasa, enamuna emosa paahi aarow'awe okhalakhala eettaka, woona, olawiha, waapapela, woona wunkha ni wiiwa, vaakhanle wira owo waaniwerya olavula ni okikoha yeeyo, enamuna emosa paahi, owo waahaana oyariwa enamuna emosaru miyo kiyariw'aka. Amen. Owo khunkhalakhala osuwelaka eyo mwa enamuna ekina. Masi owo wayariwaru enamuna emosaru miyo kiyariwaaka, nto owo onoosuwela itthu sinsuwelaaka. Amen. Oh, wulu! Ayo, mulopwana. Khamukhanle olelaka ephutu vamwirini moota hiyo oneettaahu ni okhala ookhomaala, waahaana waakhela muthinto ahu w'ekumi wira osuwele saana. Vamosaru ni Erooho! Etthu emosaru t'eryaaya ni Erooho, ahiiso khamunwerya osuwela saana Eyo. Khivantthuneya weererya osuwela saana Eyo yothene, murwe paahi wa Yoowo toko. Maana, "Vahikhanle wira mutthu onooyariwa vasya, owo hata khonwerya woona Omwene," Owo ohimnye wira, eyo ti, "osuwela saana Yoowo." Muhaana oyariwa vasya wira musuwele Owo.

¹²⁰ “Ahe,” nyuwo muniira, “Miyo kooyariwa vasya.” Nto khunakhootta Masu? Vanweryaneya sayi nyuwo oyariwa? Makhalelo anyu annoolipiheryani yeeyo, nikhuru nanyu nene muntakanxanaanyu, axipalame a mapururu mamosaru. Munnona? Mulipelele mpakha niphierye itthu iyo minuutu vakhani, moone.

¹²¹ Enoorwa ni Erooho. Munwerya sayi waaleela atthu itthu sa Erooho ahiyariwe ni Erooho? Muhaana oyariwa ni Erooho wira musuwele saana itthu sa Erooho. E. . . Yesu ohimmye wira, “Ettheke enoopela onthunaaya-wo, nyuwo khamunsuwela onkhumaaya-wo wala onkelaaya.” Munnona? Ti siiso aryaaya atthu othene ooyariwa ni Erooho, khanwerya wooleelani. Mutthu oniyariwa ni Erooho khonuupuwela, owo onimuhiya Muluku wuupuwela.

¹²² Munuupuwela wira kaamuwerya weemela vaplataforma va, okhalana muupuwelo mmosa n’umuleela mulopwana mmosa ottuli iwe, “Nsina nawe ti *John Doe* ni owo onkhuma nipuro *khata*, owo ohiira *ela*. Ni owo oomuthela muthiyana mukina ottuli iwe, miyaakha miloko miili sivinre, ni aahikkhalana aana ni muthiyani’ola. Owo ohaana okuxa etthu *ela* ahokoloxe, ni wira *ele*,” nyuwo munoono wira, miyo kuupuwelaka, kaamuwerya wira yeeyo? Khuuvo osuwela siiso mwa eyariweliwo ela nno elapo ya vathi wa yeeyo. Ti yoovikana eyo. Ehaana orwa okhuma Osulu. Vano mwayariwaru ni Erooho, Osulu, Ekumi yaari mwa Ole oirale itthu iyo, ohimmye wira, “Miteko Miyo sinvar’aka, nave-tho nyuwo munoovara.”

¹²³ Oyariwa wanyu ohaana orukunxiwa. Muhootothiwa. Khino nyuwo munnilavula ilavulelo, nyuwo pooti wira mutumphe-ene osulu ni vathi, nyuwo pooti wira mukhuwenle-ene, nyuwo pooti wira mwiirale-ene yothene *ela*, *ele*, *ekina*, nyuwo pooti mukhanle-ene me—mempuru ooromeleya. Nikotemu aari siiso, moone, masi waanimuhaleela oyariwa. Nto nyuwo mwaakhootta Masu, ophavela ohela Awo nipuro nikina ni wiiraha etthu Yaawo, ni omwarya Awo siiso, nto. . . Yesu ohimmye wira, “Ithoonyeryo iya sinimwaatthara ale anaamini. Murowe mulaponi mothene mwalaleerye Ehapari yooreera soopattuxiwa sothene.” Vakhalaru wira Ehapari yooreera ennileiwa, ithoonyeryo iya sinoottharela. Mukileele nipuro Owo otonko awe okumiha eyo mukereja. Mukoonihe Yoolepwa vaavo Owo ohimmy’awe wira, otonko awe ohimya wira, “Ti ya okathi khata paahi.” Owo ohimmye wira, “Mulaponi mothene ni soopattuxiwa sothene!”

¹²⁴ Ayo, nyuwo mwaahaana waakhela muthinto w’Ekumi Owo aarin’awe, wira mukhale Ekumi Awe. Nto moonaru Ekumi Awe, vano munoosuwela Masu Awe. Ti yeeyo. “Okathi Owo,” nsina na mutthu, kahi muupuwelo, kahi waanyiherya, kahi eyoonelo wii, masi “okathi Owo, Erooho Yoowaarya, enrwaaya, Eyo enookuxa itthu iya Miyo koohimenryaakani, ni enoowuupululelani, ni

enoowoonihani itthu sinrowa orwa.” Iwo ti oyariwa. Iwo p’umaliherya wira Awo Masu. Nto mutthu aahimyaka wira ookhalana Erooho Yoowaarya, nave khunakhootta Masu a Muluku ni okhaliha Awo nipuro nikina, vanweryaneya sayi Erooho Yoowaarya okhootta Masu Awe Yoowo? Vano mukoonihe mutthenkeso Mmasuni. Eyo eri vo. Munnona? Vaareera.

125 Mwaanwerya omuupuwela mulipa a nakoso... Vano va ti enamuna ekereja ahu eryaaya ottuli. Mwaanwerya omuupuwela mulipa a nakoso ompacenrye nakoso nno, ti e...vekeekhai owo nakoso oninnuwa, ni ohaana ophwanya mukhaliheryo voowaakuveya, nto khunarowela nikuttha n’atthu akhwiiye, mirutthu, nto khunaira, “Mwaamutthuna orwa okivarela muteko?” Khaarowa ophwanyerya hat’etthu.

126 Mwaha wa yeeyo mutthenkeso ohinkhalakhalakaaya ovenyaka-tho. Munnona? Nikhuru na ohaamini nookhwa nithukumanaka vamosa ntoko Nimurodi, ntoko Kore, ntoko moovirani m’okathi. Enweryaneya sayi...Owo khonavareleke muteko, khonavareleke muteko mutthenkeso. Owo khokhanle wiiraka. Eri ota wa otthuna wa Muluku, woovira ovikana eyo. Eri voohiphwanyaneya, eri ota woophavela.

127 Mwaarowa owerya sayi orowa wa mutthu ohinwerya wittikinya, muru, ntata ni nnawu soorakala, omuleela wira munthuna wira owo otthimake ni inawu wa nyuwo, otthimakele muteko n’uvilela, ohiya...Munnona? Owo aarowa owerya sayi wira mutthu uwo ohiweryaka wiittikinya, owo t’orakala? Nyuwo muhaana okumiha orakala iwo mwa yoowo, toko, nto owo onoowerya otthimaka.

128 Ti yeeyo mutthenkeso ontthun’aya, ovoniha wa Muluku. Oh, wulu! Kinroromela wira nkimphwanya...kheniiweya ntoko wuulumela. Moone, nkinuulumela, masi epereku yaahikhomakeliwe enookhuma vookhweya-vo. Munnona? Mwaha wa yeeyo Erooho Yoowaarya ehinwery’aya orumeela muromolelo. Owo omalakar... .

129 Muupuwele, kinnaamini wira Martinho Lutero aahikhalana Erooho Yoowaarya. Vekeekhai. Khino kahi mwa ekapatti Eyo ery’aya olelo, okhala wira Eyo khiyaavahiwe. Ninniviraka mwa yeela, nyuwo atthu a otapernakulu, wa vakwaaturu. Masi owo aaniwaamini Muluku, “ni ole onaamini ookhalana Ekumi ehinimala.” Miyo nkinatoko wuupuwele wira aahikhala mutthu aamini iyo ntoko miyo, mpakha voosiis’ula, kimwiiwalyaaka Charles Fuller okathi waarowaaka. Owo onnaamini, nave, wira oyariwa vasya khuhiyo opatiiso wa Erooho Yoowaarya. Oyariwa vasya onkhala oyariwa. Erooho Yoowaarya ti opatiiso. Munnona? Vaareera.

130 Vano ninniphwanya wira mulopwan’ola aahaana oyariwa vasya wira okhale ookhomaala. Vaareera, oyariwa wa erutthu, nto munkhalana osuwela wa mulaponi. Nto osuwela wa

mulaponi onimwiiwelela mwiixuttihi aya a erutthu. Khweeli. Vekeekhai mwaha wa yeeyo mutthu ohirina oyariwa vasya, ni omuleela Masu a Muluku, awo anrowa omwiiwelela pixipu aya, humu aya wala mutthenkeso aya, ohiya Masu a Ekumi. Mwaha wa xeeni? Khonsuwela hat'etthu ekina woohikhala yeeyo. "Vano, moosuwela, nihiku nlo miyo pooti okhala humu." Vano, Nikotemu aari mwiixuttihi. Eyo yaari yoonvikana humu, owo waari onvikana pa—pa—pastore, eyo yaari ovikana, owo aari mwiixuttihi wIsarayeli. Munnona? Ayo, ni owo aari mutthu muulupale, owo aaniira mpantte wa nikhuru nla nave khaasuwela hat'etthu ya Muluku. Munnona? Sothene owo aasuwelaawe aari wahala vakhani.

¹³¹ Oniphwanyihani yooreera Muluku a ehantisi Owo aahikhale mmosaru olelo? Oniphwanyihani yooreera Muluku a Moise vaari wira Owo kahiyu Muluku mmosaru olelo? Oniphwanyihani yooreera Muluku aawerya omoopola mutthu vamwiikimanyo ahaawerya omoopola mmosa a mukhalalo mmosaru olelo? Ntoko kweekwe sinihimyakaaka, "Eniphwanyihani yooreerya onvaha xirikhu anyu inuku sooreera ni ivitamiina, wira mmwiirihe owo okhalana mapupha a ikuru ni ooreera, nave khinamuhela mukayelani?" Nkinsuwela. Ophavela omuleela sa Muluku oowerya n'itthu siiso, vano omukeliha mmutthenkesoni hata ohinaamini etthu iyo. Munnona? Eri ota voomalela. Mwaha wa yeeyo enivonyaaya, ohookhwa. Khivanweryaneyaya ovarela muteko. Muluku khonavareleke muteko.

¹³² Muupuwele paahi, Erooho Yoowaarya khenaireke, hata okathi mmosa, khenavareleke muteko mutthenkeso, hata nipuro mwa Soolempwa wala hata nipuro mwa wahala. Akhala mutthu mfiitani mu, wala ori vaava, onwerya okooniha nipuro Erooho Yoowaarya ekunxe-aya mutthenkeso khupaka mweettelo mulaponi, orwe okileele. Kintthuna wira nyuwo mukileele elivuvuru ya wahala okhummyaaya-mo. Nyuwo moosuwela wira khekhanle muhina mwa Soolempwa, vano miyo kintthuna nyuwo mukoonihe wahala owo okhummyaaya-wo. Muluku khonavareleke muteko etthu ntoko eyo. Owo onimurumeela mutthu mmosa, kweekwe.

¹³³ Vaareera, oyariwa ni Erooho. Vano, oyariwa wa erutthu, ni okhalana osuwela wa molumwenkuni, osuwela onrowa omwiiwelela mwiixuttihi a erutthu. Oyariwa ni Erooho onkhala waamini ni wiiwelela mwiixuttiho wa Bibilia, ni Erooho Yoowaarya. Nto mutthu oniyariwa ni Erooho onimwiiwelela Masu a Muluku voohicala etthu xeeni elimalelo enimuleelaaya. Ti yeeyo paahi. Nyuwo munooyariwa-tho, mwaha wa yeeyo munoon'anyu. Wira mpantte wa mutthenkeso, ohela miroromelo sanyu sothene mwemmo. . .

¹³⁴ Vano, miyo nkinihimya wira atthu mmutthenkesoni khayariwe vasya. Vano, kinoophiyerya yeeyo muhina mwa minuutu vakhani, Apwiya yatthuna vale. Vekeekhai, awo

aayariwa, masi awo t'atthu v'omeekha. Mutthenkeso khoyariwe vasya; atthu mme aayariwa vasya. Masi mutthenkeso onoonvalaaniha paahi ni Muluku, ti yeeyo tu onii'r'aya: ovalaanya. Vaareera. Vanaamwi erutthu, muromolelo wiixutthihaka erutthu, okathi wothene ti woovirikana ni otthuna wa Muluku.

¹³⁵ *Oyariwa vasya* enihimya okhala "ooyariwa okhuma Osulu." *Vasya* enihimya "okhuma Osulu." Kinoona wira munnisuwela eyo, moone. *Oyariwa vasya* enihimya okhala "ooyariwa okhuma Osulu." Vano, moone, musomeke mwaatthuna vale, eleexiku. Moone, enihimya "oyariwa okhumme Osulu." Okhala wira, nyuwo muyariwe *nno*, vano oyariwa vasya muhaana oyariwa okhuma osulu *Nno*, wira muyariwe vasya. Vano Omwene ole ori osulu saana ovikana omwene ola, muulupalexa ovikana omwene ola, mpakha omwene ola okhanlyaaya ololo wa Ole, ni Ole ololo wa ola.

¹³⁶ Ntoko sinihimyakaaka imaara sinci-ene, miyo n'amwaar'aka nno woohikhala khalayi naarowa othuma soolya kamosa-kamosa, miyeeri vakhani sivinre, nto naahimoona muthiyana mmosa aawanre esaaya. Nto eyo yaari etthu yootikinihaxa naatonko ahu wona mwa okathi munci-ene.

¹³⁷ Ahe, voosiis'ula, miyo nkinihimya ela ntoko oveeha, kihiiwa mmosa wa mitthenkeso suulupale soosuweliwa. Nto mwan'aka mwamuthiyana ni miyo naamwiiwa raatiyu okathi waarowaahu ovahererya ekereja. Nto nsipo awo yiipaaya, muthinto mmosa wa etthu ekina ni *Lexe ni lexe*, wiipa iwe vakhani w'oratta oniiweya wa miyo ntoko athiyana anttiyaaya iphumu mpakha awo oripelela wiitho, vano nto ni wuupuwela wira iwo wiipa. Iwo osonya. Okisivela wiipa wooreera wa Pentekosite, okhuma mmurimani mwan'anyu. Mwaahiweryeke okuxa nsipo mmucomani wa makhala, masi nnakhala vo munimwiipa, mwiipaka ni waatthapela Apwiya. Kinoona wira eyo ti ya erooho. Okisivela eyo. Masi ottiyela iphumu sanyu iwo mpakha okhala ooripelela wiitho, ni okhwa vano nto otthika, t'ani...Nyuwu hata khamunsuwela mmansinyu etthu muniip'anyu. Munwehererya sayi mutthu mukina osuwela? Ti yeeyo. Yesu ohimnye wira, "Hiyo ninlavula ithu iye hiyo ninsuwelaahu." Eyo ekeekhahi. Ti yeeyo. Etthu yaatthuneya hiyo wira wiipa etthu ensuwel'ahu mmurimani mwahu, ele enoon'ahu.

¹³⁸ Nto vamaalinde-aya, mwan'aka mwamuthiyana onsoma muusika, nto owo khwira, "Munna," owo khwira, "ole vekeekhai waari wooratta."

¹³⁹ Miyo khwira, "Ayo, masi akavi wa nikhuru nle noowiipa n'atthu oophiyaka miloko mithanu munnuupuwelaanyu wira yaahikhalana asikaro moomumulani mwaya? Akavi a nikhuru nle noowiipa munuupuwelaanyu, wira nsana ohiyu okhalaka ohiyu wa Saapatu, khiyaawunrye yoowurya y'epathhani?"

Athiyana akavi mmwe jaarina maihi oometthiwa? Akavi yaaipintanri, okathi pastore a ekereja aahimmy'awe mahiku vakhani avinre, 'Muluku aahipaka olumwenku wooreeraxa okathi Owo opakaly'awe opintari?'" Hiyo, nisuwenle-ene wira ori muthiyana mmosa mBibiliani aapintanri wiitho wawe, nto Muluku khimukhuuriha alapwa. Nto hiyo, khula mutthu onsuwela etthu ya ekereja ni w'apakawu, onnisuwela wira opintari enamuna y'epakawu, kweekwe ennikhhalaka. Nave, nnakhala vo, athiyana anniira. Ni alopwana envuraka sikaro, awuryaka, yiiraka itthu soonanara. Nto yeemelaka vale ni wiipa, masu ntoko yaawo. Ninoophiyerya yeeyo minuutu vakhani vaava va. Vaareera. Wiira mpante wa mutthenkeso, okathi, onoorowa okhala ovirikanyiwa Woolamuliwani, wuupuwela waka.

¹⁴⁰ Oyariwa ni Erooho, onkhala waamini ni wiiseettiha mwa Erooho, onkhala osuwela ni waamini ni murim'anyu wira Yesu ti Kristu ni Ala Masu Awe, wira khaavo moolumo makina akhanle waacereriwaka-Mo wala okumihiwa-Mo nsina nanyu nihikumihwe Muliivuruni mwa Ekumi. Eyo yaari yoolipa. Mwaacereraru etthu emosa Mmo, mwa ilimalelo sanyu, wala okumiha etthu emosa Mmo, ahe, Kristu oohimya, Mwaneene, "Nsina nanyu ninoofuciwa Muliivuruni mwa Ekumi." Vano, mphwanye mutthenkeso, muromolelo mBibiliani. Nyuwo munoothyawa! Vaareera. Voohicala erutthu, wiixuttiha wa muromolelo ti woovirikana ni Bibilia. Ayo. *Oyariwa vasya* enihimya "Oyariwa vasya okhuma Osulu; ooyariwa Osulu." Vano hiyo ninkhala ookhomaala mwa itthu sa Osulu. Oh, wulu! Okhala wira Awo ti Mwaneene airaka muhina mwa Masu Awe mwa nyuwo, erintta Awe, wa Mwiri.

¹⁴¹ Mwaha wa yeeyo Yesu ohimmy'awe wira, "Kaahivareke miteko s'Atithi Aka, muhikaaminiki." Oh, vekeekhai! Owo ohimye wira, "Khaavo owenle Wirimu ohikhanle Ole okhurunwe Wirimu." Nkanweheni Owo omureherya Nikotemo va, okathi Nikotemo...Nyuwo moosuwela, awo yuupuwela wira, Owo oryeene Mutthu, khivaaweryaneya Owo okhala Muluku. Nto Owo khwira, nto vale Owo khwira, "Khaavo owenle Wirimu ohikhanle Ole okhurunwe Wirimu, ori Mwaana a mutthu okhanle vano Wirimu." Eyo yaahimutepela owo. Vaaweryaneya sayi Owo, Mwaana a mutthu, okhuruwa Wirimu, *okhuruwa* Wirimu, aari mmosaru yoowo *owenle* Wirimu, mmosaru Yoowo eemenle va vasulu v'empa ela, aalavula ni Nikotemo, aari vano *Wirimu*? Ahe, owo aahaana wira oonne wira aari Muluku. Owo t'okhala mapuro othene, mapuro othene! Munnona? Masi owo, mwa ilimalelo sawe, khaasuwela eyo. Owo khaari a mupuwelo wa murohoni. Muupuwelo wa mw'erutthuni, nto khaawenrye ovara eyo.

Owo onihimya wira, "Atthu aniira wira Miyo Mwaana a mutthu ki pani?"

"Akina aniira, ahe, 'Owo Mwaana a Davidi.'"

142 Owo khwira, “Vano xeeni Davidi mwa Erooho aamwiihanenle-awe Owo ‘Apwiya,’ wira, ‘Apwiya ahaahimeerya Apwiya’aka, “Mukilaathi moonoo Aka woolopwana, mpakha waakhaliha awan’Inyu ntthatto na inawu”?” Owo onkhala sayi oowaili Yoophuwa ni Osuulu wa Davidi; Owo aari Davidi ahinatthi, Owo aari Davidi, ni nuumala Davidi. Munnona? “Owo ti Yoophuwa ni Osuulu wa Davidi,” Bibilia ohimnye siiso, oowaili Yoophuwa ni Osuulu wa Davidi. Vaaweryaneya sayi Owo okhala Mwan’Awe nto? Vaaweryaneya sayi Owo okhala Apwiya’awe? Bibilia ohimnye wira, “Okhuma vano mpakha ohoolo awo khiyaamukonhe Owo hat’etthu.” Kinoona wira yaari etthu yooreera, nave. Ayo, mulopwana. Vaareera.

143 Ooyariwa vasya okhuma Osulu. Vano ninkhala ookhomaala, ookhomaala mwa itthu sa Osulu, nto, maana Ekumi Awe eri mwa hiyo, akhanle Masu Awe alipiheryaka Masu Aneene. Erooho eri mwa nyuwo ti Masu oowiipaka erutthu mwa nyuwo. Erooho ennikhapelela Masu, ni ti yookhomaala elipiheryaka Masu.

144 Vano, Erooho khenkhomaala mwa hata muromolelo. Eyo khencaliwa ni opaka mutthenkeso, okhala wira Erooho Eneene ti yoovirikana ni mutthenkeso. Mitthenkeso simphavela itthu sa molumwenkuni, muupuwelo wa molumwenkuni, ni awo ampaka ipa moolompa suulupale ni itthu sooratteliwa, ni mitthenkeso suulupale sooratteliwa, alaleyi ooratteliwa, ni sikina siiso, ni muxovo w’atthu woomalela oreera mpooma. Vaavo, Erooho eamphavelaaya ophwanya ophwanya mirima sa xariya vaavo Erooho eryaaya yoophavelaxa wooniherya ni olipiherya wira Masu othene a Muluku t’ekeekhai. Munwerya sayi nyuwo, vanweryaneya sayi Erooho ovara muteko mmutthenkesoni owo okhoottaka, okuxaka iyaaminelo ohiya Masu? Khekhanle wira. Tivo, moone, ohookhwa. Muluku khonrowa muthinto owo wa mapuro ophwanya Yawawe, ni—nikhuru n’atthu wira envarele muteko Yoowo, okhala wira awo ahookhwa. Awo t’alipa-oohaamini Masu, ahiiso khiyaarowa okhala mwemmo. Munnona? Vano, hiyo nookhomaala mwa itthu sa Osulu. Vano, Erooho ennikhapelela Masu. Vano, eyo ekeekhai, okhala wira Erooho ennivaha Ekumi Masu. Munnona? “Yoolempwa enniiva; Erooho ennivaha Ekumi.”

145 Vano, miyo kaamoora olelo, kiwehaka miri suulupale sooreera mutakhwani mmwe, matumuxa maalupale, ookhwila, a ncano, makukhu ooripelela oohimora oomwaramwareya mwemmo. Miyo khwira, “Nyuwo moosuwela exeeni ile?” Miyo khwira, “Ninoomalaru ophwanya okhwa, vano Muluku khukumihya ehupu Awe ya ithutu, khuhela mmatumuxani. Awo maluwa a woosikhani. Ekumi yooththikela mutthayani. Muluku oroosikha ipyo Sawe sothene sa maluwa ni itthu, oroosikha-tho, nto Owo khuphuwiha ehupu Awe ya ithutu. Owo onweha elapo ya vathi okhala wira awo maluwa a woosikhani. Masi nsuwa

naaphattuwaka-tho, epyo eyo enookuxa-tho ekumi.” Amen. Vaareera.

146 Erooho ti yoocaliwa olipiherya Masu. Nto vakhala wira nyuwo mukupanli elimalelo ohiya Masu...Vano, nyuwo muniira, “Ahe, hiyo ninnaamini Awo othene, masi, Munna Branham, koosuwela wira hiyo khinnaamini *Ila*.” Nto vaavo vo ti nipuro muneemelaanyu.

147 Nakapela aahikileela emaara emosa wira owo...wira ka—kapitawu mmosa iirale, ahiiso kookupali wira aari mukhulupale a anakhotto, iirale, “Nakapela, murowe iwe, ookhala kapitawu mmosa onkhwa. Owo orimoopeliwa.”

148 Owo khurwa iwe, nto kapitawu amwiilipiha. Awo khumpurulela muheemani ya Mwiikimanyo Wooxeerya, nto owo khwira, “Kapitawu.”

149 Owo khuwaha opwaphwaruwa wa ephome, nto owo khwira, “Ayo, mulopwana.” Nto owo khwira, “Nyuwo mwa nakapela.”

“Ayo.” Owo khwira, “Nyuwo munookhwa, kapitawu.”

Owo khwira, “Miyo koosuwela.”

Owo khwira, “Nyuwo mwa muKristu?”

Owo khwira, “Miyo kaanikhalaka.”

150 Khwira, “Nyuwo mmuhin’ye vayi Yoowo, kapitawu?” Owo khwira, “Munomphwanya Owo vaavale mmuhin’ye anyu.” Voolikana.

Kapitawu khwira, “Nkinwerya wuupuwela.”

151 Nakapela khwira, “Vannireerela, khamurina woohikhala minuutu miili-tho, moota muniilipihaanyu.” Eyano etthukuwaka, ephome ekhumaka mwaano mwawe ni mmaaruni, ni ipholovolo sa kapwitthi siryeene mwa yoowo. Khwira, “Vanreerela mwaakuve, masasu anyu anoosarya.”

152 Nto kapitawu khupacerya weettasa, ommaathale-ene vale okathi owo aailipih’awe. Otheya khurwa owiitho wawe, khwira, “Miyo koosuwela vano.”

Khwira, “Nyuwo mmuhin’ye vayi Yoowo? Mpacerye vaavo.”

153 Owo khwira, “Vano kinimumpaathi kirupe.” Ti vaavo aamuhin’yaawe-vo Owo, ti vaavo owo aampchwannye-awe Owo.

154 Mutthenkeso anyu waaixuttihaka etthu yoovirikana ni Masu, nyuwo munimuhiya Owo vaavo. Mutthike, okhala wira Owo onikhomaala olipiheryaka ni okhalihaka Masu ekeekhai. Ti yeeyo Yesu aary’awe, okathi wothene airaka otthuna w’Atithi. Munnona? Vaareera.

155 Vano, moone, osuwela wa mutthenkeso wa Nikotemo khiwaahimya hat’etthu wa Muluku. Vano, khivancala vakhala wira aari mutthu muulupale, ntoko siniihan’ahu, mmutthenkesoni, mwiixuttihi wIsarayeli, osoma wawe wothene

ni akhili khiyaahimya yeeyo [Munna Branham onrumiha ikatha sawe—Mol.] okathi owo eemenly'awe ohoolo wa Kristu, opwapweliwa omosa paahi wa yoowo. Vano, miyo kinnitthokelela atthu othene wira “Tiithi Oowarya, Nikotemo. Tiithi Oowarya, Nikotemo. Hiyo ninnuurama ohoolo wanyu, mulopwana.” Masi okathi Yesu, owo eemenlyaawe ohoolo wa Muluku, Owo aahimpwapwela mwaha w’ohisuwela wawe. Tivo, munnoona vammalelaaya yothene eyo, muliyale! Rwaani, nirowe wa Muluku. Ti yeeyo. Vaareera.

¹⁵⁶ Nnakhala osuwela wuulupale wa Kore khiwaahimya etthu, wala wa Atamu, khula mmosa okhoottaka Mutthaka woolipiheriwa wa Muluku. Vano nrowe niwiryane oratteene vano, ninrowa okela mmaasini moorakama muhina mwa minuutu mmosa. Moone, khula mmosa a yaawo, etthu awo yaakelenlyaaya mmulattuni, Nikotemo, Kore, Nimurodi, ni akina, okhala wira awo khiyaamusuwenle namitthaka a Muluku ni Masu oolipiheriwa a nihiku nle. Vano, khula mutthu onnisuwela eyo. Vano, naamuwerya okhala vaavo okathi munci-ene. Masi Muluku onoohimya khalayi ene ni ohimya etthu enrowa wiiraneya, mutthu ompaka mitthenkeso, onoomukhalaha mutthu wiivarela voolikana. Awo yaanaamini wira aahikhala Mesiya aarowa orwa. Oh, aYuta ale, oh, wulu, vekeekhai! Masi okathi Yesu oruuly'awe enamuna Owo iiraly'awe, awo yiirale, “Khivanweryaneya okhala Yoowo.” Awo anoovonya osuwela saana Masu. Vano, Yesu khaarwiiye vooirikana ni Masu (Owo aahirwa?), masi Owo aarwiiye vooirikana ni otaphulela wa mutthenkeso wa Masu. Moise khaarwiiye vooirikana ni Masu, owo aarwiiye voolikana ni Masu; masi Kore khuvonya woona. Nto mwa evirelo y’okathi yothene enkhalaka siiso.

¹⁵⁷ Vano nkawehani. Mutthak’ola wa nihiku khivanweryaneya paahi okhala etthu yiiraka “nookhalana Ekeekhai ni nookhalana *ela, ele,*” ehaana ohimmwa khalayi ene mwa Masu Awe! Vano nto Masu vanruuhiwaaya, ehaana okhala yoolipiheriwa oratta-ene ni Masu.

¹⁵⁸ Yesu aahilipiheriwa oratta-ene ni Muluku, ni Masu. Owo iirale, “Mwaamusuwenle Moise, mwaamusuwela nihiku Naka.” Maprofeta yaahilavula saana sa Yoowo, maprofeta othene yaahihimya saana etthu Owo aaryaawe. Nave nnakhala vo eyo yaahaakhaliha oohoona, awo khiyaawerya osuwela. Munnona? Masi Yesu aari. . . Ni miyo nki. . .

¹⁵⁹ Kintthuna kihimeerye ela efiita, ni nyuwo, nave. Moone, namitthaka ni Mutthaka wa nihiku!

¹⁶⁰ Vano, nyuwo mwarowa vale, Ativentista A Seetimu tiiya aniira, “Hiyo nookhalana, musukeke nihiku na Saapatu paahi!” Mukoonihe yeeyo mwa Soolempwa. Muhano Eddy Baker ohimye wira aahikhalana. Mukoonihe yeeyo. Anamoona

a Yehova ahimye wira awo yaahikhalana. Mukoonihe. Munnona? aMetotista anihimya wira awo aakhalana yeeyo. Mukoonihe. aPatista anihimya wira aakhalana. Mukoonihe yeeyo. Mukoonihe khula mitthenkeso. Miyo kiniwooniheryani wira awo ari, khula mmosa, ota wa otthuna wa Muluku. Khula mmosa wa seiyo soovirikana, siixuttihaka ilimalelo s'atthu ohiya Masu a Muluku. Miyo nkinsuwela hata mmosa wa seiyo waarowa okupali itthu silempwe mBibiliani vekeekhai ntoko Owo silempwalyaawe. Ti yeeyo. Masi mutthu aarwaaka ni wira, "Miyo kookhalana Mutthaka wa nihiku," owo ohaana woooniwa oratta-ene toko ni olaleeriwa khalayi ene orwa.

¹⁶¹ Okathi Yohani Mpatisa aaphiyalyaawe vale, awo yiirale, "Nyuwo mwa Kristu?"

Owo khwira, "Nkihiyo."

Khwira, "Mwa—mwa—nyuwo mwa Eliya?"

Owo khwira, "Nkihiyo."

Owo khwira, "Nyuwo mw'ani?"

¹⁶² Owo aaniwerya wiisuwanyeiha mwaneene, owo aahikhalana Mutthaka w'okathi. Owo khwira, "Miyo ki nsu na ole onikhuwela mothakoni, ntoko saahimme-awe profeta Yesaya. Vano, vakhala wira oyariwa waka ni makhalelo aka khanlikana ni yeeyo, muhi—muhikaakhele."

¹⁶³ Okathi Yesu orwiiyaaawe, yaari etthu emosaru, etthu emosaru. Namitthaka orina Mutthaka, ohaana okhala Mutthaka w'ohimmwa khalayi ene ni Muluku. Vano nto Muluku, alavulaka mwa namitthaka ola, onnilipiherya wira eyo Ekeekhai. Munniwa saana? Munniwa saana? Mwiiwe saana! Ehaana toko okhala SIISO ANIHIMYA T'APWIYA, woohimmwa khalayi ene. Vano nto namitthaka orina Mutthaka, ohaana okhala yoolikana ele Muluku aahimaly'awe wira yaamwiiraneya okathi yoowo.

¹⁶⁴ Ti siiso Moise aary'awe. Mwaha wa yeeyo owo aamonryaawe aipopheelaka vathi ohoolo wa Muluku, khwira, "Muluku, Nyuwo mukirumme."

Owo khwira, "Mwiivalaanihe nnikhuru nle."

¹⁶⁵ Munnoona entthunaaka ohimya? Eyo kweekwe t'enkhalaka etthu yaavirikannye muupuwelo wa mutthu, khwaakumiha mwa otthuna wa Muluku. Vano muupuwele, yoohimmwa khalayi-ene ni Masu Awe ni yoolipiherya oratta-ene ni Masu Awe. Vano, Yesu ohimye wira, "Kaahivareke miteko...sa Muluku, weeso muhikaaminiki. Moone, Miyo kaavonyaka...Khwira, t'ani a nyuwo onwerya okihimyana etampi Miyo? T'ani a nyuwo onwerya okooniha wira Miyo ka mulipa-ooaamini?"

¹⁶⁶ Nikotemo iirale, "Hiyo noosuwela wira Nyuwo mwa... Rabbi, Nyuwo mukhumme wa Muluku, okhala wira khaavo aarowa owerya wira itthu iye ehikhanle wira Muluku ori ni

yoowo.” Munnona? Vano eyo yaahooniherya wira Owo aari mulipa-oowaamini.

¹⁶⁷ Vano, hiyo nimmusuwela wahala a ekereja. Vano nwaraye ixapheyo sanyu so wupuwela. Khivaxiye nlelo, moone, vano nwiriyane oratteenexa vano nto kinimwiilipiha wira kikhale oowaakuva ntoko sinwery’aka. Miyo—miyo kintthuna... Nwiriyane oratteene efiita. Vano, khula mutthu otonko omusoma wahala a ekereja, onnisuwela wira emaara yoopacerya oKristu otonko aya otthokihwa, yaari ekereja Katolika y’oRooma. Vano, yaatonko ene okhala eyo ehinatthi, kintthuna wira mutthu amuruuhe wahala ene akoonihe. Miyo ka mpatthani a vatthirima a Paul Boyd, atthu oomusoma wahala anci-ene aalupale. Miyo kookhalana moosoma waka vale, *Muthukumano wa Ohoolo w’oNicea, Muthukumano w’oNicea, Axitithi a oNicea*, soolempwa sothene sooreerihwa sa ekereja, kinsuwel’aka. Miyaakha miloko miraru ni miraru koosoma iyo, kihuuluula oweha. Khonakhaleke mutthenkeso mmosa. Ekereja Katolika ti mai a mutthenkeso. Hiyo noosuwela wira eyo ekeekhai. Khenakhaleke ekereja yoothokihwa, okhalana murumolelo, mpakha ekereja Katolika. Nto nuulumo *katolika* nnihimya “ya elapo othene.” Nto awo aakhaliha etiini ya ekereja ni ya estaatu, ni khukhaliha vasulu va oruma wothene wa oRrooma, ni yaarina voophiyaka e—epantte yooreeraxa ya molumwenkuni yooxinttiwa okathi uwo. Yaari ekereja ya estaatu, nto ale yahaarowa wiiwelela yaaheliwa mookhwaani. Muthukumano w’oNicea, mahiku muloko ni mathanu a ekhotto y’oyeehi ephome, okathi maprofeta eekeekhai a Muluku, okathi awo yeemelenly’aya osulu iwe mmwe...

¹⁶⁸ Ekereja Katolika, vano eyo yaaroopacerya toko, vano, hiyo othene noosuwela eyo, miyo kihixuttiha vaava. Moota, vekeekhai, Akila ni Prisila aari pastore, Akila aari pastore a— a ekereja y’oRooma. Okathi Erooho Yoowaarya yaakhurunwe-aya oPentekositeni, Eyo yaakhuruwenle aYuta a wakhula elapo vathi v’erimu. Masi mahiku vakhani nuumala yeeyo, Petru aahikhalana yoowoona vataratoni, wira orowe owannyawe Kornelio, muRooma, mulopwana mmosa naxariya, nto owo khuvekela vano Erooho Yoowaarya khimukhuruwela. Nuuvira okathi vakhani atthu oottittimiheya khupacerya waakhela Yeeyo. Akila ni Prisila khurawasa o—oRooma vano awo khutthokiha, ahiiso, khanatthokihaseke, masi okhaliha oratta-ene ekereja yoopacerya y’oRooma. Nto, awo vairanse-aya, awo yaahikhalanasa a—axinn’aya alopwana n’athiyana.

¹⁶⁹ Ni Klawutiyu, moomwene awe, aahiwoomola aYuta othene oRooma. Nto owo p’ukathi ene yoowo ekereja Katolika y’oRooma yaahimye-aya wira Petru aari oRooma. Mukoonihe Yooolempwa emosa vaavo Petru otonko awe okhala oRooma, wala khula wahala onihimya wira owo aahikhala. Owo khaakhanle, vootthariha Masu a Muluku, ni Ti yeeyo kinaamini

aka. Ni vaaweryaneya sayi Petru, muYuta, ovilela okokhorela w'ethiru ni itthu awo arinaaya, so waakokhorela a muluku eethiru ni itthu? Vaavo. . . Munnona? Owo aarowa orowa sayi avirikanyaka mwixuttiho awe yoowo va? Ethiru. Voohivikana ele akhanlyaaya aPrustante nave. Mulipelele, ninoophiyerya yeeyo nuvira okathi vakhani, ohoolo, Apwiya yatthuna vale. Nwehe. Nwehe vano, hiyo ninnoona wira okathi ene yoowo ekereja enihimy'aya wira Petru aari oRooma, wahala onihimya wira Klawutiyu (ni Bibilia oohimya) aahiruma wira aYuta othene ekhume oRooma.

¹⁷⁰ Nto Paulo aahivira wEfeso khurwa mpakha muttethe w'osulu iwe, owo khwaaphwanya awiixutti ala, nto owo aahikhala weiwe omuxekuryaka Akila ni Prisila. Nuumala orowasa, nto axinna a oRooma ekereja ela khupacerya okhaliha miyuupuwelo saya axineene, vano awo khwaacererya okokhorela w'ethiru. Vano nto Kostantino, yoowo ame awe yaari muKristu eekeekhai ni yaaroromela wira mmiravo aya aamukhala, masi owo aari mulipa a poliitika. Ni owo aahoona wira epantte yoowaata ya Rooma, wala epantte yuulupale ya weiwo, y'athu oohaawa, yaahaakhela woopowa mwa Kristu. Vano nto awo yaahipacerya okhala oosuweliwa, okhala wira yaamukuruxa Veenusi ni onweliha Maria, ni omukuruxa Yupiteri ni onweliha Petru, n'akina siiso n'a—n'awiixutti, nto eyo yaari etiini yoosuweliwa saana. Ni awo yaari oominyala. Awo, aKristu ale yaamukhwa!

¹⁷¹ Nto ekereja Katolika khwira, “Hiyo naari epacerelo.” Eyo ekeekhai voolikana, ekereja Katolika epacenrye Nihiku na Pentekosite. Masi ela t'ile ekumihale: eyo erimwiitthokihi ni khukeliha (mwa Masu) makano. Nto nikano nookiserya, nyuwo athu oovikana miyaakha muloko munoowerya wuupuwela nikano nookiserya: owela wa Maria, miyaakha soophiyaka muloko sivinre. Nikano nikina naacereriwe mukereja. Ohiya Yoolempwa, nlo nikano! Nto awo animoosuwelihani naanaano va, awo “khancala ele Yoolempwa enihimy'aya, t'ile ekereja enihimy'aya.”

Awo, namukuttho ole aahikilela, khwira, “Muluku ori mukereja mw'Awe.”

Miyo khwira, “Muluku ori Mmasuniwe mw'Awe.”

¹⁷² Owo khwira, “Ahe, Bibilia owo wahalaa paahi a ekereja Katolika yoopacerya.”

¹⁷³ Miyo khwira, “Vano miyo ka muKatolika oopacerya.” Miyo khwira, “Eyo ennikikhalihaxa muKatolika woovikanani nyuwo, mukhanle phaati.” Munnona? Miyo khwira, “Yaari yeeyo, weeso miyo ka yoowo.” Miyo khwira, “Moone, miyo kinaamini v'eekeekhai etthu arummwa yiixuttih'aya. Nyuwo munaamini etthu mutthu okelinh'awe-mo.” Nto eyo vekeekhai t'inamuna

eyo yiireiye-aya. Tthiri, ti yaaryaaya. Yaari yeeyo, vekeekhai enamuna yeeyo.

¹⁷⁴ Vano nwehe, wahala, nto awo khupacerya waacererya makano, nikano, nto okathi Paulo oruuly'awe, hiyo noosuwela, voomutthariha wahala, wira owo hata khaaxekunrye ekereja ele yoopacerya, okhala wira owo khaakhanle ovilelaka okokhorela w'ethiru. Ni owo aaxekunrye ekereja ya neenli yeeyo awo yaakhalihalyaaya, ekereja ya neenli ya oRooma.

¹⁷⁵ Nto orwiiyaaya Muthukuman'ole wa oNicea, weiwo Kostantino oonalyaawe akhili wo wiiraaniha omwene awe. Etthu ene emosaru Akhabi iiraly'awe ni Yesapeli, athelaka iwe. Munnona? Nto voonalyaawe okathi wo owiiraaniha athu awe ni opaka elapo yuulupale yoowerya wa yeeyo, owo uupuwela wira awo yaamphwanya etiini aya, tivo owo aakhalinhe-awe awo etiini ya ekereja ni estaatu. Nto okathi awo jaarinaaya Muthukuman'ole w'oNicea, nto sookoha iya khukhumela sinto aari Muluku mmosa, wala araru; sinto yaahaana opatisa ni Nsina na Yesu Kristu, wala Tithi, Mwaana ni Erooho Yoowaarya; sookoha iya sothene sikina khuruuha e—eyooniheryo vale. Nto, vairaly'aya siiso, amosa-amosa wa maprofeta ale a khalayi jaarwiiye vale ni hat'etthu woohikhala esapala ya epwittipwitthi yiivitikelenle-ene, elyaaka malaxi. Khweli! Masi athu ale aalupale oottittimiheya yaahiikelihla mukereja, khwaamaaliha ni akhili a molumwenkuni. Masi awo yaahikhalana SIISO ANIHIMYA T'APWIYA. Eyo khukela mw'epiphini w'epakawu mwa miyaakha soophiyaka ekonto emosa.

¹⁷⁶ Masi eyo khuphuwa-tho, wira ethapuluwe. Ti yeeyo. Khamukhanle wiiva Eyo. "Miyo kinoohokoloxa, anihimya t'Apwiya, miyaakha sothene itthu iya silyiye-aya."

¹⁷⁷ Miromolelo iyo saacerenrye nikano. Nto wira yeela, waacererya nikano, enamuna emosa paahi ekereja, enamuna emosa paahi vanweryaney'aya khula muromolelo wiihuluxa Masu a Muluku, onkhala waacererya nikano ohiya Soolempwa sooreerihwi, onkhala weererya okhaliha ilimalelo sanyu wala mwixuttiho wa ekerej'anyu, onaamwi oryeme woovirikana ni Soolempwa. Vano munwerya sayi wuulumela ekereja Katolika, nyuwo mwiiraka etthu emosaru awo yiiralyaaya? Munniiwa saana? Vaareera. Okathi, vano muupuwele paahi, Soolempwa khasikhanle ovonyaka! Makano woothaa, opacerya wene. Nto okathi munikupalyaanyu muromolelo, muhaakhela nikano, okhala wira eyo etthu yaacereriwe. Eyo khekhanle mwa Soolempwa. Eyo khekhanle mwa Soolempwa.

¹⁷⁸ Khiivo etthu ene eyo ntoko mutthenkeso. Yesu khonahimyeke wira, "Miyo kinoorumani orowa mulaponi mothene, mwapake mutthenkeso." Nnari, mulopwana, khiivo etthu iyo! Wira yeela, onkhala okhootha Soolempwa

sooreerhiwa. Okathi ela yiiriw'aya, yaahirukunxiwa "Ekereja mwaha wo oyariwa" khukhala "ekereja mwaha wa makano ni iyaaminelo." Kahi *ekereja*, mukitthuniherye oveka muswammaha; elooca! Nyuwo muniyariwa Mukereja, masi muniitakanxa mulooa. Kahi ekereja Patista, ekereja Metotista, ekereja ya Pentekosite. Eyo elooca Patista, elooca ya Pentekosite, ni elooca Metotista, nyuwo munniitakanxa. Khamukhanle wiitakanxa Mukereja. Khiivo etthu ene eyo. Nyuwo muniyariwa Mwemmo. Nikotemu aahileeliwa yeeyo. Vano nyuwo munnoona vatthu vary'anyu? Oh, wulu!

¹⁷⁹ Mwaha wa yeeyo miyo kiry'aka oovirikanya eyo. Kahi nthowa n'atthu mwemmo; miyo kinvirikanya eyeetiheryo. Okhala wira awo khanwerya... Mmosa wa ahumu awo wala etthu ekina, emosa wa ikereja iyo yalaleya etthu eri mBibiliani ekhanle yoovirikana ni mwiixuttiho owo, yooruma ele awo arinaaya mukereja mmo, owo onimoomoliwa siiso. Ayo, mulopwana. Aмоса-amosa a yaawo oophweeliha saana hata ahinrowaaya ohiya muhakalaliho orwa ekereja ekina vahikhanle wira ti mmosa w'atthu aya. Vano, awo t'o...

¹⁸⁰ Mutthu mmosa emaara emosa aarowa onvaha mulaleyi... Wenno nno elapo yeela, mulaleyi mmosa mwaamukhaani eemenle nno mphironi, okhuwelelaka ni oxontelaka orukunxa murima, ni airaka, "Murwe, mmwaakhele Kristu, musarihiwe Erooho Yoowaarya," n'itthu siiso. Nto mutthu a mutthenkeso wa Pentekosite khurwa khunvaha etoolare emosa mulopwan'owo mmatatani mwawe, ni aahaana olapa okhala wira owo aarooraruwela ekereja awe. Waalavulaka aKatolika! Ti yeeyo. Ni nyuwo moosuwela etthu enihimyaaka, nave; wala ekerej'ela eniiraaya, khula enamuna. Vaareera.

¹⁸¹ Wira yeela, okhootta Soolempwa, okathi ela eniiriwaaya, enoorukunxiwa nto okathi munaacereryaanyu nikano ni wiitakanxa ni mutthenkeso, nyuwo mookupali nikano nanyu noopacerya vaavo vene, okhala wira kehiyo Yoolempwa, vano etthu yaacereriwe. Ni nikano etthu yaacereriwe, "okuxa nipuro na," ninkuxa nipuro na oyariwa. Mwaakupaliki muromolelo, muhaacererya nikano. Vaareera. Okathi eniiriwaaya yeela, vano enoorukunxiwa okhuma "Ekereja mwaha wo oyariwa" khukhala "elooca ni nikano wala eyaaminelo." Maana, moone, nlo nikano nneene, mwaha woohikhala Yoolempwa.

¹⁸² Vano, Yesu khonahimyeke wira, "Murowe mulaponi mothene mwapake miromolelo, murowe mwaathukumanye atthu vamosa." Owo ohimye wira, "Murowe mwaakhalihe awiixutti." Munnaamini? [Muthukumano oniira "Amen."—Mol.] Amen. Tivo, moone, nyuwo muri ota voomalela.

¹⁸³ Nwiriyaane, nwehe va. Nrowe nimalihe mwa etthu ekina va, nikhomakele etthu okathi ene yoola. Akavi arina eleeksiko y'eKreku, *Emphatic Diaglott* ya elepelo ya khalayi,

Ekreku? Vaareera. Musome, mumphwanye khula musomi mummutthun'anyu. Murowe mulooa mwa iliivuru mphwanye eleeksiko, eleeksiko y'Ekreku. Musome Wiisuupulula 17, nto mwasoma vo, Etaphulelo ya King James va enihimya wira, nto ela, "Nlo naahikikuxa Muroohoni; nto kaahimoona muthiyana aakilanthe vasulu va nxeni naawanrye sooxeerya, oosareya ma—masina a oveeha." Vano, ti yeeyo King James ohimmy'awe. Masi otaphuleliwa woopacerya ohimmye wira:

. . . naahikikuxa muroohoni . . . nto kaahimoona
muthiyana . . . oosareya masina ooveeha, . . .

¹⁸⁴ Wookhala ovirikana vanci-ene wa "masina a oveeha" ni "masina ooveeha." Vano nwehe. Hiyo othene ninnisuwela ni noosuwela wira ele yaari ekereja y'oRooma ekilaanthe vasulu va miyaako mithanu na miili, yeetiheryaka owerya wa molumwenkuni. Vano owo iihaniwa "namuttombe," ni owo aari "mai a anamararuwa." Exeeni? Exeeni namararuwa? Vaamuweryaneya okhala mulopwana? Ohaana okhala muthiyana. Tivo vakhala wira owo muthiyana, ehaana okhala ekereja; owo aari mai a anamararuwa, siiso ntoko owo saary'awe. Nto nkawehani, nwehe, "Mwa yoowo!" Ekele. "Mwa yoowo yaahikhala masina ooveeha." Exeeni iyo? Vano, arumeyi va mufiitani, nrowe nimaale. Exeeni masina awo ooveeha? Metotista, Patista, Prespiteriyaano, Luterano, aPentekosite, makina. Masina ooveeha, okhala wira iyo mitthenkeso, enamuttombe wa Muluku, siiso ntoko owo saary'awe.

¹⁸⁵ Nto awo, muhina mwa makhuru awo, athu aniira, "Vano, owo Mmetotista, ni wira *ela*. Owo muPentekosite, ni oniira *ela*. Owo ti muPrespiteriyaano, ni oniira *ela*." Awo anniira sothene mukalentaariyuni, nyuwo moosuwela eyo. Nto exeeni iyo? Awo masina yaathuneya okhala ntoko Kristu ni wiihaniwa ni nsina na muKristu, nto masina ooveeha! Iyo khasihiyo ikereja. Voowoothererya iyo siniihaniwa "ekereja." Iyo ilooca! Vano munnoonna mwaha wa xeeni miyo okhanlyaaaka oovirikanya mutthenkeso? Kahi athu, eyeettihelo ya mutthenkeso, moone, nsina, masina ooveeha (nwehe) a ilooca, siniihaniwa ikereja voowoothererya. Ekereja Metotista, ekereja Patista, ekereja Prespiteriyaano, ekereja ya Pentekosite, ekereja Luteraana, Ekereja y'Axinna Oowiiwanana, khekhanle etthu ene eyo. Eyo ti yoohilempwa.

¹⁸⁶ Eri Ekereja emosa paahi, ni khamukhanle wiitakanxa Yeeyo. Nyuwo munooyariwa—Mo. Nyuwo munoothomeliwa wa Yeeyo. Erutthu ya siiri ya Yesu Kristu. . . Erutthu ya siiri, kiireke, ya Yesu Kristu elapo ya vathi va, ni Masu yooniheriwaka. Aana alopwana n'athiyana a Muluku, awo khaniira mpanthe wa hata emosa. "Mukhume eriyari aya," Owo oohimya. Ayo.

¹⁸⁷ Nwehe, naakuvaka vano. Miyo nkinthuna owooceihani, masi mwakivahru minuutu vakhani paahi vano, kinoorowa

kaakuvaka ntoko sinwery'aka, masi kintthuna wira mukupali wira munimwiiwa saana, wira muhialele. Munnona?

¹⁸⁸ Muupuwele, mai Rooma, yaahiphwanyiwa mwa yoowo, oosareya masina ooveeha, mai a anamararuwa. Vano, vakhala wira awo t'anamararuwa, exeeni namararuwa? Namuttompe exeeni? Etthu emosaru ntoko namararuwa. Owo muthiyana onikhala voohiroromeleya ni natiri awe a moothelanani. Ni khula ekereja enihimya okhala Ekereja ya Kristu, ni okhootta Masu a Muluku, eyo enikhala voohiroromeleya ni natiri aya a moothelanani! Vano eyo enooraruwa mwaha wo waacererya nikano, onamuttompe ni olumwenku ni osuwela waya, ohiya omukupali Kristu ni owerya w'ohihimuwa Wawe ni Erooho Yoowaarya. Ni owo ti mai a anamararuwa iirale etthu emosaru. Mwaapu khoniihana epirikha "yoonuna," moosuwela; moone, thanu na mosa ya emosa, ni etuusiya nuusu ya ekina. Atthu kamosa-kamosa ala animweetta paahi yaatheyaka aKatolika, ni yiraka mpantte w'etthu emosaru yaawo ene. Owo aari mai a opatiiso woowootha mmaasini. Owo ti mai a eyooniheryo yoowootha ya Erooho Yoowaarya, ni nyuwo munoomutthara paahi. Vano nrowe noone.

¹⁸⁹ "Eyo ekeekhai, Munna Branham?" Mukhale oomaala okathi vakhani paahi.

¹⁹⁰ Moone, owo ti mai a masina ooveeha, a ilooa atthu aniitakanxaaya, ni oruua oveehiwa, okhala khula enamuna, waawara akaputtula, athiyana ni maihi oometthiwa, oowiipintari, aniipa mukoraaleni, anaavura asikaro, anaakhela ekomunyawu, inamuna sothene sa itthu soonanara sa molumwenkuni, nto nlo nluku nookwattula wa ole oohaamini. Timoteyo khohimmye yeeyo, Erooho Yoowaarya? Nwehe. Moone, owo, Rooma, ti maama a khula mmosa wa seiyo. Munnona? Nyuwo vekeekhai mwiirale mmutthenkesoni mwanyu siiso ntoko owo siiraly'awe, okeliha makano ohiya Masu, okhala wira nikhuru n'atthu arookhaliha, mahumu ni mapixipu n'akina khwira wira yaahaana okhala *siisa*, nto ti yeeyo vekeekhai yaairaneieye oRooma. Nto nyuwo mwehererye o, munn'aka pastore, okupali Masu a Muluku othene, nto, nwehe otthu onrow'anyu, ota wa mukhora! Vano ninrowa woota sinto Muluku ohaaleela wira yiire, wala nnari, muhina mwa minuutu vakhani. Munnona? Vaareera.

¹⁹¹ Moone, owo ti maama a khula emosa, okhala wira owo t'opacenyere okumiha ilepeliwo sa Soolempwa ni waacererya nikano, okhala wira owo ohaakhoota maprofeta oottikittheliwa, ni Masu. Mwaha w'osuwela waya, mutthu mulavilavi, Mamwene aRooma, ni sikina, yaakupanli oKristu, masi antthuna . . . okupali mwa enamuna aya yaawo. Munnona? Ti yeeyo. Awo antthuna eyo mwa enamuna aya.

¹⁹² Nahama aatthuna wiihuluxa maretta awe mmaasini a elapo awe, owo khiyaamusivela maasi a marove a Yordani.

Masi vakhala wira owo aahinto wiuhuluxa maretta awe, owo aahaana orowa iwe mmaroveni mmwe siiso ntoko profeta saamuhimenry'awe. Moone, Muluku khommuthanla mutthu.

¹⁹³ Nwehe, owo aari muromolelo woopacerya. Nkaaweheni an'awe axithiyana, yaahiira etthu emosaru, khwaacererya iyaaminelo ni makano ohiya Masu. Muhikileele; mukoonihe emosa ehikumme wa Yaawo. Mukoonihe pastore mmosa onrowa okupali Ekeekhai, awo ahinrowaaya owoomolani mwaha wa yeeyo, vahikhanle wira munookhala oosuweliwa wira, moosuwela, awo ahaana woovarelelani mwaha wo osuweliwa wanyu wala etthu. Vaareera.

¹⁹⁴ Vano nkawehani Wisuupulula 18, minuutu vakhani paahi, eversiikulu enttharelana, ekapiitulu enttharelana, vaamanlyaawe Wiisuupulula 17 waavyavya ni—oonihalyaawe mwiiriirya wa Muhano Papilooniya ola. Kapiitulu 17 ya Wiisuupulula onnileeliherya wira eyo ekereja ekilaanthe vasulu va miyaako mithanu na miili, Muttetthe wa oVatikano, eyo enaaruma mamwene othene a mulaponi (eyo vekeekhai t'ile eri yoolikana), ni Makhulupale nave, n'akina. Uh-huh. Tivo, masi eyo eri iwe, evarelaka muhakhu wa molumwenkuni mmatatani mwaya. Eyo ekeekhai. "T'ani onwerya owana ekhotto n'uwo?" Ti yeeyo. Hiyo othene noosuwela eyo. Masi zeeni mwaarowaanyu wira mpantte ni etthu ephitaanne n'uwo? Vano nwehe kapiitulu 18, ekapiitulu enttharelana mwiiriirya awe vammalaaya oleeliheriwa. "Onikilaathi mpaani mwa Muluku." Vano, nno, nihiku nlo . . .

¹⁹⁵ Zella Braitman, muri vaava ohiy'ula, Zella? Owo ooruuha, eri mpaani mmwe naanaano, *Muletto Ahu a Ttiminku*, epaphelo ya ihapari y'eKatolika. Nto epaphelo y'eKatolika yaamwaakhula murumeyi mmosa. Khwira, "Muhimnye, reverendu, wira e...Mwa mammeru a oRooma oVatikano, ahiiso veehici na Paapa, elempwe, 'Vicarivs Filii Dei,' yeeyo nihimya, wira eyo," mutiyoseese eeKatolika mme, "wira nle nu—nummero na nxeni na Wiisuupulula?"

¹⁹⁶ "Vano," owo khwira, "vekeekhai, ti siiso. Vekeekhai ti siiso, nintaphuleliwa imiya thanu na mosa ni miloko mithanu na mosa ni thanu na mosa. Vekeekhai ti yeeyo." Nto tiyoseese a oRooma onnikupali, wira ti yeeyo. Masi va eri yoowaakhula aya, oocencera, oosareya osuwela, khwira, "Masi, moosuwela, nsina nanyu mwa nntaava khata pooti otaphulela etthu emosaru."

¹⁹⁷ Mulopwan'ola khwira, "Nawaka, ntoko etthu emosaru mwa nntaava nimosa." Owo khutaphulela. Khwira, "Moone, kiri ntoko imiya thanu na mosa ni miloko mithanu na mosa ni thanu na mosa, nave." Khwira, "Annikhalaka imiya sene a yaawo." Khwira, "Khula okathi etthu enkhumelelaaya, ookhala mutthu onkhalana imiya thanu na mosa ni miloko mithanu na mosa ni thanu na mosa." Nto khwira, "Reverendu, mwaahisuwela

wira mwa nntaava nimosana nsina nanyu pooti ohimiyaka nwanani a Kristu?” Khwira, “Muniweherya-ni itthu iyo?” Nkawehani osuwela.

¹⁹⁸ Masi Erooho Yoowaarya ennisuwela oratta-ene. Nwehe. Siiso eyo ekhalaka, nsina naka pooti otaphuleleya imiya thanu na mosa ni miloko mithanu na mosa ni thanu na mosa, masi nkimmaliherya sootthuneya sikina. Miyo nkinkilaathi vasulu va mwaako. Nkinihimya itthu *iya*. Miyo nkihiyo kuvernatooro, moone. Ti yeeyo. Owo t’ule Owo onimuhimyaawe. Vano osuwela wanyu wa molumwenkuni kah’itthu, mulopwana, ti yeeyo, Ohoolo wa Erooho Yoowaarya. Miyo nkimmaliherya sikina saya, masi owo onnimaliherya. “Onikilaathi mpaani mwa Muluku, aisooniha wira owo Mulukuu, ni onikilaathi vasulu va miyaako mithanu na miili.” Nkinkilaathi vasulu va miyaako mithanu na miili, vakhala wira entaphulela imiya thanu na mosa ni miloko mithanu na mosa ni thanu na mosa. Miyo nkimmaliherya iye sikina, masi owo onnimaliherya. Moone, eyo eri vo. Munnona? Tivo mulipane Erooho Yoowaarya paahi, “Muhivelavele etthu enrow’anyu ohimya, okhala wira khamuhiyo nyuwo munrowa olavula; t’Atithi.”

¹⁹⁹ Vano vanweryaneya sayi osuwela wanyu ni Oyariwa wanyu vasya okhuma Osulu ophiyerya olikana ni itthu iya mulaponi mu, ala—anamaxintta ala oowerya mwa yeeyo? Vano, awo annisuwela khula ewokelo ni nlootho. Aawerya sayi Moise weemela owo waatthanre-awe Sooruma sa Muluku, wira omurihele ttootto awe vathi khuthatuwa enowa, nto wa khurwa anamaxintta khwiira etthu emosaru? Masi Moise aari oomaala, osuwelaka wira aahithariha Masu a Muluku, nto enowa awe yaahikhuura iye sikina. Munnona? Vano nyuwo mwaiwelelaru ni khukhalana. . . Exeeni aakhanlyaawe wiiraka okathi waaweetihenrye-we muttethe wa natiri, ni yaahikhala Ephareya Yooxerya yaakuttelelaka, masi ephiro ya Muluku yaahivira mwa yeeyo. Amen. Khwira, “Mmaale, moone Ovuwa wa Muluku!”

²⁰⁰ Yakhalaru ettharihaka muteko, wo otthara Masu, mukhale vaavo nwehe ethukuwaka. Amen. Miyo kirina iyaakha miloko mithanu ni ttharu, kinnimurumeela Yoowo iyaakha sophiyaka miloko miraru ni ttharu, kaanithhuna kirine-ene iyaakha imilyau muloko wira kimurumele Yoowo. Miyo nkinatoko omoona Owo ovonya nlelo, Masu Awe yaasukiwaka. Ti yeeyo.

²⁰¹ Vano nkawehani, naanaanoru vatthenke-awe, isiiri sawe saahisuweliwa. Ninnikhalanaka eyo okhuma khalayi, hiyo noosuwela.

²⁰² Vano ekapiitulu enttharelana, nkawehani Wiisuupulula 18. Mukitthuniherye paahi kikhunle minuutu mmosa paahi. Pooti okhala etthu yooreera, khenrowa onikuxa masi minuutu vakhani paahi tho, ni pooti woohimeeryani etthu yaamukhaani. Kinroromela wira enimwiira.

203 Vano ninnoona va, kapiitulu 17, versiikulu 5:

*...vayuuci vawe naahilempwa-vo nsina,
MWIIRIIRYA, PAPILOONIYA MUULUPALE, MAI A
ANAMARARUWA, A SOONANARA S'ELAPO.*

Ni nwehe.

*Ni kaahoonu wira muthiyan'owo (ekereja)
aahihapaliwa ephome y'atthu ooreera murima, ni
ephome y'namoona a Yesu:..vamoona-aka,
kaahitikihiwa kixanka vanci-ene.*

204 Moone, omoona, owo aari etthu yuulupale yooreera. Ni owo aari mai a anamittompe, etiini namittompe, miromolelo, vekeekhai etthu owo iiraly'awe, moone, okhala wira awo yaakeliha-mo makano siiso ntoko owo siiralyaawe. Vano nkawehani, nkawehani Wiisuupulula vano, eyo ekapiitulu 17, enimalela ni eversikulu 18. Vano nwehe.

*...nuumala itthu iya (nuumala mwiiriirya awe
osuwelihiwa), nuumala itthu iya kaahoonu nlaikha
nikina nikhuruwaka wirimu, naarino owerya
wuulupale;...*

205 Vano, va onoorwa namitthaka mukina okhuruwaka, ekapiitulu enttharelana, mwiiriirya awe waahisuwelihiwa. Vano, nno vano osuwelihiwa wa mwiiriirya awe ni mwiiriirya w'ana awe. Moone, hiyo ninnisuwela vano oratta-ene exeeni emukhalinhe namararuwa: okhala wira owo ororaruwa voovirikanya Masu a Muluku. Nto ti yeeyo emukhalinhe mutthenkeso. Owo khaakhanle okhalaka ekereja ya Bibilia ni okupali iyo. Ni khonwerya hata mutthenkeso ohinkuxa Masu othene a Yaawo (ntoko Awo silempwaly'aya) okhalakhala okhalaka ekereja ya Bibilia. Ni khuuvo hata mmosa wa seiyo siiso, miyo ensuwel'aka etthu, nnakhala mmosa. Tivo vale, moone, owo omalakaruu wiitthokiha, etthu oiralyaawe, (mwa Soolempwa ni mwa ekeekhayi) owo onookhwa vaavale, owo onkupali nikano. Vano nkawehani, vano eyo t'ile yaakhumelenle.

206 Muluku aahiveleeliha, kapiitulu 18, nlaikha na ikuru, nuumala mwiiriirya owo osuweliwa, nlaikha na ikuru, ahiiso, namitthaka. Nkawehani va.

*...nuumala itthu iya kaahoonu nlaikha nikina
nikhuruwaka wirimu, ni owerya wuulupale; nto elapo
yaamvaleeliwa ni nttitimihonaya.*

*Nlo naahikhuwela...ni nsu noowiituperya,...
Papilooniya (evitikavitika) muulupale oomora,...
ni oothatuwa opuro onkhala axetwani,...nikhuku
na irooho sothene sootakhala, ni nthiyawelo na
othene ooreerela ni onnyokha...axipalame a mwiikho
oohiirya.*

Ni *maloko othene* aawurya *eviinyu ya oviruha ya* oraruwa *wawe, ni mamwene a mulaponi* . . . aararuwa *ni yoowo, nave alipa a nakoso a mulaponi aathaaciri* epweteyelo *awe yoowaatta*.

207 Nkawehani, naanaanoru vamanlyaaya osuwelihiwa mwiiriya awe, ole aaryaawe, etthu owo aary'awe, ale yaari an'awe axithiyana, mwiiriya woosuweliwa, vano Muluku aaveleelinhe nlaikha, namitthaka wira (exeeni?) wiiwthanela ota, "Mukhume!" Mutthaka w'okathi!

. . . *Mukhume eriyari aya, atthu aka, wira muhaataane* ihasara *sawe* . . .

Owo onoorowa omutakhalaha. Nwehe.

208 Mukhume wa yoowo! Muluku oveleelinhe nlaikha noowerya, ahiiso, namitthaka. Ni Waarya wawe khiwaari vanloothoni, Owo waamwaareene mulaponi mothene. Mukhume mwa yoowo! Exeeni? Owo, n'axinn'awe athiyana, nave. Wira omwaleele elapo ya vathi, ni owihane atthu Awe okhuma-mo. Vano, nyuwo moosuwela wira eyo Ekeekhai. Namitthaka aaveleelihiwe okhuma Wirimu, wira owihanele atthu a Muluku ota wa oPapilooniya. Ni Waarya wawe waahimwaleela elapo, Erooho Yoowaarya yuulupale.

209 Nwehe, Bibilia ohimye wira, "Owo ntthyawelo, ni ohaavara axipalame, oohiirya a mwiikho." Kahi axawawe, vano, nnari, nnari, nnari, nnari. Amarepo, "axipalame a mwiikho, oohiirya," ti yeeyo owo onvaraawe varyaawe. Owo ntthyawelo noosareya yaawo, ekayela yothene yoosarya. Ni exeeni? "Masina ooveeha," voovirikana ni Soolempwa. Timoteyo Aneili 3 ohimye wira, Erooho Yoowaarya elavulaka, "Mahiku ookiserya awo anoohiya Waamini ni animwiiwelela irooho soowootoha." Owo nave-tho ohimye wira, Erooho Yoowaarya yoolavula: "Wira mahiku ookiserya awo yaarowa okhala oothipelela, owiisoona." Oonyokha: "Attottopeliwe Muluku, nyuwo muniira mpantte wa hiyo, wala nyuwo khamurina nsina nanyu muliivuruni mwahu, moopweteya." Hmm. Oohiirya! A mwiikho! Hmm. Miyo kinroromela wira nkinsikuliha, miyo kinroromela wira kiniira yooreera. Axipalame oohiirya, a mwiikho, owo aaniwaakhelela.

210 Muupuwele, Muluku Xawawe. Owo Mwaneene ohiisihana Xawawe. Ni Owo aamwiihanne Yakope xawawe. Ni hiyo n'a axawawe Awe axikhaani. Amen. Owo oowiihana maprofeta Awe "axawawe." Nto nlaikha nla nirwiiye wira noonelihe ni wiihanela okhuma!

211 Ntoko mutthaka aka mwaamukhaani wa *Xawawe Ontannya Epuru Awe*. Xawawe ole mwaamukhaani aamuttharelela mwalyakhu ule mweehilini okathi wothene, aretthaka, masi khaawerya olya itthu iye aarinaawe, s'epatthani, ni athiyana oowiipintari wiitho, maihi oomethiwa, ni akapututula. Owo

khaawerya wira yeeyo. Masi khaasuwela hat'etthu ekina woohikhala oretteha wa mwalyakhu ule muulupale. Masi nihiku nimosa maama xawawe khumphwanya. Owo aahikhuwela, amwiihanaka wira okhume, khwira, "Mwan'aka, nyuwo khamuhiyo mmosa a yaawo. Khumani wa yoowo!"

Khwira, "Maama, kiireke exeeni?"

²¹² Khwira, "Mmane mapupha anyu mpacerye." Otupha woopacerya, owo aamanne nipotto, eriyari ene ya mutthenkeso. Khwira, "Mwan'aka, muhaana orwa osulu ovikana eyo ahiiso nkinwerya woovarani. Kihaana okumiha inawo sanyu vatthayani." Owo onrowa omukuxa moovavani. Owo khusuwela wira aaniwerya ovava. Owo aarimoorwa omwiihanela ota. Ti yeeyo.

²¹³ Masi Maama ola Papilooniya owo aahiivarela nikhuru n'alyakhu, alyakhu axikhaani oothererya, oowipintari, maihi oometthiwa, aniiisihana "aKristu." Owo aahikhalana ekayela oosareya yaawo. Nyuwo alaleyi muneemela vapulpitu ni waahiya athiyana awo okhuma ni yeeyo, wuuliha muru, wira mukhalihe muromolelo anyu woowaatta. Muluku onimoovekelani eyo mmatatani mwanju. Mukhume mwa yeeyo! "Ipwittipwitthi Saka sinniwa Nsu Naka." Ntthyawelo n'ale ootakhala, oothipelela, owiisoona, oosiveliwa itthu sa vathi ohiya osiveliwa ni Muluku, yaarowa othanla okhala ntoko olumwenku ohikhanle okhala ntoko Kristu. Nyuwo mwaamoonaka muthiyana oisootihale-ene itthu soowaatta, eyo ennooniherya wira owo t'ohikhal'etthu muhina. Owo t'owooothererya muhina. Eyo ekeekhaii volikana. Muthiyana a...Miyoo kaahimoonaa mmosa nihiku nikina, ni maihi ooripelela, ti yeeyo, ni etthu ile yothene yooripelela mmwe mmaithoni mwaya.

²¹⁴ Vano, nyuwo mwa—mwa—mwahaarina hata maihi, ni—ni munatthuna owara maihi, yaamukhala saana, masi, nware ale ankhala ntoko mutthu. Ni nyuwo mwahaarina hata makwarikhwa, nto—nto munatthuna okhalana makwarikhwa, muhipwanye ale ntoko fixawu ootteela, mphwanye—mphwanye makwarikhwa eekeekhai. Mwaahikhalane hata emosa wa itthu iya, vaareera. Mwahikhalane hata niino, mphwanye mwapakeliwa vale, mukuxe. Masi muhikhule maino anyu nvahiwaanyu ni Muluku mwaha wo wira aroothetemana vakhani, ni maino ooreera, wira mphavele makina. Muhipintari maihi anyu, wala etthu, ni okhala ntoko etthu ekhumme vamaroveni nipuro nlo. Muhi...Mwaahikhalane nthepa, ni munatthuna wiikhaliha ntoko wira mookhalana nthepa vakhani, vaareera, kinnitthokelela. Masi muhiikhalihe oolikana ni Yesapeli, ntoko muruttu nipuro nlo onipintariwa.

²¹⁵ Ni nyuwo axinna aPentekosite, munaahiya athiyana awo omettha maihi aya, Biblia ohimnye-ene wira nlo ntittimiho

nawe! Ni ti yoohilimaleleya hata owo olompa ni maihi awe siiso. Nave nnakhala vo khunamuhiya orwa vapulpitu n'ulaleya Ehapari yooreera, wiipa mukoraaleni, oxuttiha exikola ya Ttiminku. Wuuliha muru! Mwaahaana wuuliwa muru mmansinyu. Xeeni miyo ovirikanyaka mutthenkeso? Nyuwo munuupuwela wira khaamukhalakhala kiweryaka okhaliherya etthu siiso? Miyo koosuwela mwaha muniirelaanyu, munna. Nyuwo munnisuwela saana, masi mwaixuttiharu voovirikanya yeeyo, munoovahereriwa nipuro nuulupale, vano awo anoowoomolani. Avuwihewe Muluku mwaha wo ominyala wanyu mwaira vale. Ti yeeyo. Muluku onimoottittimihani.

²¹⁶ Nlaikha nla naahimye exeeni? “Mukhume!” Ayo, mulopwana. Nlaikha nla naaruule mulaponi, nto nlo naarwiiye oruuha Waarya, nto nlo naahaariha Waarya mulaponi mothene. Nlo naari nlaikha na ikuru. Ni nlo naarwiiye olaleya Mutthaka wa “Mukhume oPapilooniya! Muhikwanye itthu sawe soonanara!”

²¹⁷ Ookhalana ekayela yothene yoosareya yaawo. Khwira, “Owo nthyawelo n'axipalame othene oohiirya.” Ayo, owo orina ekayela oosareya yaawo vano, Mwaataano wa Ikereja sa Mulaponi mothene, ahiiso ilooca. Owo orina nikoto nothene oowaleliwa vano, awo othene anootakanxana. Owo ohiikhaliha ekayela, vaareera, oosareya axipalame oohiirya. Ti yeeyo. Mwehererye olavula ni mmosa aya emaara emosa, mwehererye paahi, mmiravo, oocencerya mwa akhili a mulaponi, masi ahinsuwela-tho sa Muluku onvikana namarokolo osuwelaawe ixapattho sa nnakhutuni. Ti yeeyo. Paahi, ti yeeyo paahi, moone, sothene ansuwel'aya akhili kamosa-kamosa anweryaaya ohela *ela* ni wira *ele* muhina mmwe. Masi yaaphiyeryaka omusuwela Owo? Huh! Ayo, aavariwa mukayelani mwawe ni makano awe. Ikereja prustante soopacerya yeeyo, sookhala an'awe axithiyana, ahiiriha yeela mwaha wo okhootta Masu a Muluku. Owo onikhoottaawe. Owo onikhootta Masu. Nto nyuwo mwaakupaliki etthu ekina ohiya Masu, yeenyu munikhootta Yaawo. Nto nyuwo mwaaitakanxaka emosa wa seiyo, ni nyuwo mookhootta Masu. Muluku khonoothunani siiso, khanivo nipuro na yeeyo mwa Yoolempwa.

²¹⁸ Nwehe, nla nlaikha na Waarya, muupuwele, nlaikha nookiserya, nlo nlaikha mokathi wa ekereja wa Lawotiseya. Owo namitthaka a Lawotiseya, wira, nlo ti nookiserya, okhala wira ekapiitulu enttharelana ti ekapitulu 19, okhanle Mwaakameliwa onoorwa. Nto ti yeela, mwa Yoolempwa, nlaikha nookiserya naarwenle oruuha Waarya ohinatthi orwa wa Mwaakameliwa wira orowe akumane ni Kristu. Waari Okathi wa Ekereja ya Lawotiseya, nto. Aaira exeeni namitthaka a Okathi wa Ekereja ya Lawotiseya? Owiihana okhuma oPapilooniya! Nkawehani! Ikereja soovariwa mukayelani mw'awe ni yoowo, ni makano awe, okhootta Masu ni okupali makano. Nla

nlaikha na Waarya wa ekereja ya Lawotiseya yaamukhontte Kristu ni Masu Awe, mwaha wa nikano, khunhela Owo ota. Nto Owo aari vamukhora, amanaka nsele, atthunaka ovolowa. [Munna Branham ommana vapulpitu—Mol.] Munnona? Okathi wa ekereja waahimukhootta Kristu, ni Kristu ti Masu, nto waahikhootta Yaawo, nto Owo aari ota. Okathi mmosa paahi wa ekereja hiyo orinaahu wa Kristu ota, omanaka nsele, otthunaka ovolowa. [Munna Branham ommana vapulpitu.] Nto Mutthak'ola wa nlaikha, namitthaka aakhumme wa Muluku, aathikela arumihaka Mutthaka awe mulaponi, wira “Mukhume oPapilooniya! Mukhume mmitthenkesoni!” Erooho Yoowaarya olelo, wiisooniherya wa Erooho Yoowaarya ti nlaikha nenlo niphavelaka waaruaha atthu othikela Masu, okhala wira Erooho Yoowaarya enoolipiherya Masu paahi. Eyo khekhanle olipiheryaka makano, khiivo ekumi mwa yaawo. Eyo ti Ekumi. Nwehe, Okathi wa Ekereja ya Lawotiseya yaahimukhootta, khimukhootta, ni awo yaamuhlenle Owo ota.

²¹⁹ Nwehe, nlaikha nla ti namitthaka ookiserya ohinatthi orwa Kristu mukapiituluni 19 ya Wiisuupulula. Nsu na namitthaka ola! Naweha vale, okathi ovahalyaawe Nsu nawe mulaponi, naahikhala Nsu naalavunle-tho Wirimu, eversiikulu 4, mwatthuna osoma, vaareera, eversiikulu 4, kapiitulu 19. Namitthaka ola mulaponi aari oolikanela wa Muluku mpakha, okathi olavunlyaawe elapo ya vathi, Muluku aahitthikela etthu emosaru Wirimu. Exeeni otaphuleliwa iwo wa versiikulu 4? Eyo enihimya exeeni? Nsu na Muluku nilavulaka n'atthu Awe ootthommwa, niiraka, “Mukhume mwa yoowo!” Vekeekhai yeeyo naari Nsu! Owo ookhalana atthu mothene eyo muhina mmwe, oPapilooniya wothene. “Mukhume wa yoowo, wira muhaataane n'itampi sawe,” ayo, mulopwana, ota wa makano awo ni iyaaminelo, mukele mwa Masu ookhalahiwa Erooho ni Ekumi. Amen.

²²⁰ Nwehe, ekapiitulu 19 ti yootharelana, “Nuumala itthu iya.” Mooweha va ekapiitulu 19, “Nuumala itthu iya”? Nwehe exeeni? Nuumala exeeni? Nuumala Mutthaka wa “Mukhume mwa yoowo!” “Nuumala itthu iya,” nwehe, “okhuwela wa atthu oowaarya a Mwaakameliwa, ni Mutheli, onrowa Woothelanani wa Mwaapwittipwitthi.” Naattamenle sayi hiyo nto, munna? T'uvi okhanle wiihana wookiserya? “Mukhume oPapilooniya!”

²²¹ Vano, axinn'aka, mwaha wa yeeyo kikhanlyaaka oovirikanya. Ti yoohilempwa. Ti yoohilikana. Ehoonihiriwa okhala yoowootha. Muluku khokhanle mwa yeeyo, Owo khanakhaleke, Owo khonrowa okhalakhala okhalaka. Vano, nkinihimya wira khakhanle atthu mmutthenkesoni iya, ti mwemmo ekereja epakiwaaya. Masi, mwaakhalakharu muhina mwa eyeettihelo eyo, nyuwo mwa epantte ya yeeyo.

²²² Kakhalaru oStadu Unidu, miyo ka mutthu a wAmerika. Vakhalaru wira ka nammuttettheni wala mutthu a Estadu

Unidu ula, miyo ka epantte ya yoowo. Karowaru wAlemaanya n'ukhootta omempuru aka nno, ahiiso onammuttettheni, kinkuxa onammuttettheni wAlemaanya, nkihiyo-tho mutthu a wAmerika, miyo ka mutthu a wAlemaanya. Ni karowaru oJapawu, wala khula nipuro, Ruusiya, miyo khinkhala nammuttettheni iwe.

223 Nto nyuwo mwaitakaniharu ni nammuttettheni... eyeettihelo, ni munakhala nammuttettheni a eyeettihelo yeeyo, munooniherya ele mukhanlyaanyu. Nto mahiku ala ookiserya, Muluku oniwiiana atthu okhuma mwa yeeyo. Bibilia ohimye siiso, "Mukhume mwa yoowo, wira muhaataane n'awo, nto Miyo kinoowaakhelani. Muhikwanye itthu sawe soonanara, moone, nto Miyo kinoowaakhelani. Ni nyuwo munookhala aana alopwana n'athiyana wa Miyo, ni Miyo kinookhala Muluku wa nyuwo." Munnona?

224 Mwaha wa yeeyo kinlavulaaka kipwapwelaka ekereja, e—elooa. Nkikhanle wiihanaka ekereja. Eri Ekereja emosa paahi, ekhanle Ekereja y'Erutthu ya Kristu. Masi ilooa iya siniihaniwa "ekereja," Bibilia aka onikilela wira awo masina ooveeha, sothene iyo, mitthenkeso sothene. Awo anveeha exeeni? *Oveeha* onkhala "okhala oovirikana ni," wala, "olavula voovirikanya." Muluku aahimya wira, "Murwe muyariwe," vano awo aniira, "Murwe mwiitakanihe." Munnona? Okathi opatiiso wa Erooho onkuxiwaaya voowoothererya nipuro na oostiya mukereja Katolika, ovahana ntata mukereja Prustante, ni wuukhuwa mukereja Pentekosite, ohiya oMutthu wa Kristu orwaaka ni otekiwa wothene iwe wa epiraamite naarin'ahu nihiku nikina.

225 "Mwaacererye mowaaminini mwanyu, ikuru," ni sikina, sothene iya mwa Petru Oopacerya, 1... Petru Aneili, kookupali, ekapiitulu 1, vaavo sothene sinaacereriwaaya moowaaminini mwanyu, itthu iya sothene, othunku, ni oreera murima, ni ereerelo murima, ni itthu sothene, vano nto munootthitiwa ekanyeryo ni Erooho Yoowaarya.

226 Masi eri ntoko mutthu awo...atthu anihimya wira aakhalana ela ahirina, okhala wira awo axuttihiwe voowootha. aMetotista ankhallana moonelo wootikiniha, yaakhalanaka, ni othukumela vakhani, wala—wala wiina Muroohoni. Apentekosite anlavula ilavulelo, wala—wala wira etthu emosa voowuukhuwa. Miyo kinnaamini itthu iyo, vekeekhai, masi itthu iyo sihirina iya sikina khasinreerela etthu.

227 Ntoko saahimalyaaka nihiku nikina, enkhala ntoko mulalampi...wala mwaapalame ooriipa eereryaka owara mapururu a mulalampi mwa yoowo, wala nrepo eereryaka owara mapururu a epompa. Awo khandameleleke vale, owo orimwiihela mmansawe. Awo aarophatteiwa, awo muromolelo. Masi okathi Muluku onihel'awe etthu mmo, ti y'ephattu. Nyuwo munihiimihiha wira, "Miyo kiihitakaniha mukereja

nsana ohiyu. Nkikhanle orowaka-tho, nkikhanle owuryaka-tho, nkikhanle wiiraka *ela*. Miyo kihitakaniha mukereja.” Moone, nyuwo muneererya ohela mapururu a mulalampi mweerutthuni mwanyu ya nrepo. Ti yeeyo. Munnona? Munnona? Muhaana oyariwa vasya! Muhaana omwaakhela Kristu. Nto mwamwaakhela Kristu, khamukhanle omwaakhelaka Kristu muhaakhanle Masu Awe, okhala wira Owo ti Masu. Nto nyuwo mwakhalaru oowooneya ntoko oothunku, n’ukhootta Yaawo, vano miyo kinnitikiniwa. Munnona? Nto nyuwo nlelo pooti wira mpantte wa mutthenkeso wothene muntthun’anyu ni wooneya ntoko oothunku, nave nlelo muhirina Eyo.

228 Vano, eyo vo, apatthani. Vo eri etthu yothene. Muluku ooreeriheni. Muluku ookhaliheryeni. Miyo nkinihimya *ela* wira kikhale oovirikana. Miyo kiniitaphulela mmansaka. Okhalaka wira ala mahiku oomalihia ekhotto, miyo nkimpaka mwaataano wa murettele ni nyuwo arumeyi, hata vakhani, miyo kinoona wira nyuwo mwaahaana orwa ovarihana ni miyo; kahi ni miyo, masi ni Muluku, Masu. Ti yeeyo. Ti yeeyo. Muhimye ele Bibilia enihimya’awe, muhimyeke Eyo enamuna Eyo enihimya’aya. Okhala wira Bibilia ohimmye wira, “Ole onrowa okumiha wala wuncererya mwa yaawo.” Nto moone, mutthenkeso ti woohilempwa, nto okathi munaakhelaanyu nikano noopacerya vanreerela mutthike voomalela, okhala wira mootupha mukaano vaavo vene. Mwahokolowela vale oyariwa vasya, vano munoorowa weetta mwa Yoolempwa.

229 Vano munookela mmuromoleloni, eniiriwa, “Miyo koosuwela, wira khaninaamini *Ila*. Mapixipu ahu mukereja mwahu aniixuttiha wira hiyo na emosa wa ikereja sa khalaixa. Hiyo khaniniixuttiha . . .” Miyo khenikicala etthu awo ahiniixuttiha-aya. Vakhala wira Bibilia onniixuttiha, Erooho Yoowaarya mwa nyuwo Eyo enrowa olya Masu. Hata wira mutthu ori oosuwela moota xeeni ni moota owo okhanlyaawe weereryaka otaphulela Yaawo, awo anweryaaya otaphulela. Mutthu oohaamini onniwerya omukuxa Bibilia ni omutaphulela oohuluxakani wa Muluku.

230 Tivo, khaavo mutthu orina ehaakhi y’olaleya Ehapari yooreera ehikhanle wira aahikhala, ntoko Moise, ottuli wu vamithaakani vale sooreerihwa weiwo owo aaryaawe ni Muluku paahi, mpakha mutthu oyariwa vasya ni weemela vale niitho nniitho ni Muluku, ni osuwela. Khokhanle hata mutthu oohaamini, khiivo hata pisikoloxiia, khiivo hata etaphulelo, khuuvo hata musomi mulaponi onwerya okumiha Yeeyo mwa nyuwo. Nyuwo mwaari weiwo okathi yiireiye aya! Ayo, mulopwana. Moosuwela yaakhumelenle.

231 Nto nyuwo muniira, “Miyo kaahikhalana enamuna yeele ya musuwelelo, ni miyo kookhalana erooho mwa miyo.” Nto owo wakhoottaru Masu mwa khula enamuna, nyuwo murina erooho yoovonyeya. Nyuwo muniira, “Miyo—miyo nkikhanle

wiiraanaka ni etthu ela ntoko Yeela. Miyo koosuwela, masi ekerej'ahu..." Uh-uh, yookhala erooho yoovonyeya. Vo ti vari ekanyeryo anyu yo osuwanyeihiwa-no. Kayini, nyuwo mootthittiwa. Ayo, mulopwana.

²³² Hawa aahovenrye paahi Nuulumo nimosa naamukhaani; kahi othene Muluku aahimyyaawe, Nuulumo nimosa naamukhaani paahi, nto eyo yopaceriha khula owereya murima ni oxanka, ni okhwa, ni etampi, ni ikhotto, ni itthu sothene sikina, khula ekhapuri, khula ampulansiya otonko wunla, khula exipiritaali etekiwe mwaha w'aretta. Ohoverya wawe omosa vakhani Nuulumo nimosa naamukhaani na Muluku, yopaceriha etthu yothene ela. Nto owo khuheliwa ota, okathi ela nnakhala yahaarowaaya wira yiiraneiyeyi. Munrowa okela sayi, muhoveyaka Nuulumo nimosa na Yaawo? Muniira, "Koosuwela wira Awo anihimya Yeeyo, masi Awo..." Awo anihimya Yeeyo tu!

²³³ Vano nkawehani. Muluku ohaana olamula olumwenku n'itthu. Khivanweryaneya nyuwo okhalana olamula vookhkhala wira mookhalana nlamulo toko. Ehaana okhala etthu, muhaana ohonona etthu wira mulamuliwe. Munnona? Vano nto khivanweryaneya okhala olamuliwa, voolikana-ene, ehikhanle ehukumu. Vano, moone, khamukhanle okhalanaka nlamulo mpooma nnihimya wira "muulutha wa itoolare thanu mwaha wo onvira luuxu ooxeerya," nto nlamulo noottharelana wira "nnari, owo pooti orowa vootaphuwa." Moone, khamukhanle wiiraka yeeyo. Tivo khivanweryaneya okhala malamulo maili ankhala okathi mmosaru. Nto nri nlamulo nimosa, Muluku mmosa, Eliivuru emosa, Kristu mmosa. Ti yeeyo tu. Waamini omosa, nrromelo mmosa. Ti yeeyo tu. Owo Bibiliaa, Kristu.

²³⁴ Nwehe vano, mwa yeela, vaakhanle-ene wira ekhale etthu enaacereriwa mwa Yeela, ehaana waacereriwa ni mutthu. Khekhanle okhalaka-tho ovikana . . .

²³⁵ Nto vakhala wira Muluku onrowa olamula olumwenku ni ekereja, ntoko sinihimy'aya aKatolika, vano ekereja Katolika xeeni Owo onrowaawe olamula-no? Sookhala sinci-ene sayi; yookhala emosa, y'oRooma; emosa, Ekereku; ni, oh, sookhala mithinto sothene soovirikana. Ekereja Katolika xeeni Owo onrowaawe olamula-no? Wala, khino Owo onrowa olamula ni Luteraana? Ahe, nto, ni khino Owo onrowa olamula ni Prespiteriyaano? Munnona? Owo onrowa wira exeeni? Owo khonrowa olamula ni ekereja. Owo onrowa olamula ni Masu Awe. Ahe, nto, Owo khona . . .

²³⁶ Moone, Owo khokhanle osukaka nikhuru n'atthu, ntoko yoowoona ya munna muthiyana ohiyu mukina, Erooho Yoowaarya yaamwarenyaaya-mo, Eyo yaavinre olukama ekaaxa ele. Tthiri, khiivo envarelela Eyo. Ti mutthu mmosa. Eyo envaheriwa oreeriha ekereja, masi khonwerya ovarelela

Eyo. Khuuvo mutthenkeso onwerya ovarelela. Ti yeeyo tu. Khekhalele wiiraka tu. Mookhalana sothene mwemmo, nave khamunwerya wira. Mutthenkeso khonwerya wira. Masi ti mutthu orina Erooho Yoowaarya. Vano nwehe.

²³⁷ Vano vakhala wira Muluku onrowa olamula olumwenku ni Masu Awe, nto Owo vekeekhai ookhapelela Awo ni oosuka Yaawo vooreerela. Wala, vakhala wira Othene tootepanyeya, Owo onrowa oruuha sayi ehukumu? Munnona? Ehaana okhala etthu. Ni Owo khonahimyeke wira, “Ole, ni ekereja.” Owo ohimye wira, “Ole onrowa okumiha Nuulumo nimoso mwa Yaala, wala waacererya nuulumo nimoso mwa Yaawo, yoowo onorowa okumiha (mpantte awe) muLiivuruni mw’Ekumi.” Vano, wa miyo, ti Muluku, Masu Awe ni ehukumu. Vano, miyo kalamula ni okupali Masu, ni woona wira Kristu ookikhwela, vano kinoovekela wira Ekumi Awe ekele ni ekihoolele. Nto vakhala wira Ekumi Awe ti Masu, ni Owo oolepa Masu, vanweryaneya sayi Ekumi Awe okhala mwa miyo, ni miyo kihimyaka wira kookhalana Erooho Yoowaarya, ni waacererya makano ohiya Masu? Khiyaarowa ovara etthu tu. Kinwerya sayi miyo waacererya muromolelo Owo okhanlene oovirikanya, ni oolipiherya, ni ohooniherya moovirani mwa wahala, wira khula okathi awo aniiromola-aya awo animookhwa, muroohoni? Oh, awo annaacerereya mamempuru, vekeekhai. Eyo ekeekhai. Awo annaacerereya mamempuru. Masi, muroohoni, awo khanrowa hata nipuro. Mukoonihe, mukileele mwa wahala vatthu ekereja etonko... Numala wiithokiha, eyo ekhwiiye vaavo vene, Erooho Yoowaarya khuhiya. Khasivo-tho miiriirya ni ithoonyeryo, vano eyo erookelela ohoolo paahi ekelaka mweevitikavitikani paahi.

²³⁸ Vekeekhai ti yeeyo yiireiye ni ikereja sahu sa Pentekosite. Iyo siirale siiso ele maama aya iiralyaawe. Wopaceryani, awo yaahikhuma, atthu yaakhoottale miromolelo. Vano, akina wa nyuwo axinna muniwa efiita ela, akina wa nyuwo alopwana atokweene, moosuwela wira miyaakha sivinre, miyaakha miloko mixexe, miloko mithanu sivinre, awo yoohimeenryeni sa mutthenkeso, nyuwo mwaamuhimya wira waari ooveeha. Masi olelo nyuwo muniira mpantte wa etthu nyuwo muupuwelaanyu wira waari ooveeha. Nyuwo axithiyana munimetta maihi anyu n’upintari wiitho wanyu, amey’anyu yaari oovirikanya eyo, santu ule—mupentekosite mulweene ooreera murima. Exeeni yookhumelenleni? Paulo ohimye wira, “Nyuwo mwaanitthimaka saana, exeeni yookhoottinheni?” Munnona? Ottuli wu nyuwo mwaari ootaphuwa wa itthu iyo, masi mwaatthuna okhala ntoko akina aya.

²³⁹ Siiso ntoko Samuweli aahimmy’awe. Isarayeli aahikhalana Mwene, nto owo aari Muluku. Nto awo khwira, “Samuweli, nyuwo munimuuluvala. Munithanlele mwene, ninthuna nikhale ntoko atthu akina a molumwenkuni. Ninthuna nikhale ntoko

ilapo sikina. Nimmutthuna mwene wira aniroiheke okhottoni, nimmutthuna mwene onwerya owana ikhotto sahu.” Vano eyo khiyaamusivenle Samuweli.

²⁴⁰ Owo khwira, “Kootoko okuxa etthu p’itthu wa nyuwo? Kootoko okuxa musurukhu anyu wa nyuwo? Kootoko woovekelani enyompe wala etthu p’itthu? Kootoko woovekelani etthu?”

Awo khwira, “Nnari. Nyuwo khamunatoko onivekela hat’etthu.”

²⁴¹ Wala wira, “Kootoko olavula etthu p’itthu mwa Nsina n’Apwiya yahaatonko wiiraneya?” Eyo ekeekhai? Owo khwira, “Vano muhimwaaakhele mwene owo, okhala wira onrowa okhala mattattha wa nyuwo.”

²⁴² Vano kintthuna kookoheni etthu emosa, Tapernakulu Branham. Munihalela wunnuwa wira mukhale etapernakulu yuulupale vano. Miyo pooti okhala ottaiwene okathi vakhani. Miyo pooti orowa nipuro nlo. Ti voolipa ohimya vatthu Apwiya anrow’aya okiihana; khino okikumihya vanlakani, khino otthikela vapuwani, khino Awo pooti okiihana orowa mothakoni. Nkisuwenle nipuro Awo onrowaaya okiihanelawo mpakha Yesu orwa. Kintthuna kookoheni etthu emosa. Kootoko woovekelani etthu? [Muthukumano oniira, “Nnari.”—Mol.] Kootoko woovekelani musurukhu anyu? [“Nnari.”] Miyo kootoko wooleelani etthu p’itthu, wa itthu ikonto sene miyo koohimenry’akani mwa Nsina n’Apwiya, masi, ehinatoko okhumelela? [“Amen.”] Vano muhikhalakhale mwiitakanxaka ni mutthenkeso. Ti woovirikanya Masu a Muluku. Mukhume-mo vakhala wira muri mwemmo, ni mwiivalaanihe mwaakhele Masu a Apwiya.

Nrowe nuuramihe muru ahu.

²⁴³ Muluku muulupale a maprofeta, Muluku a Abrahamu, Isakhi, ni a Isarayeli, muncererye ikuru, Pwiya, Mutthak’ola mwaamukhaani woothikilaseya waari vamurimani vaka okathi munci-ene, wira orowe w’axinn’aka. Anci-ene wa awo ari ota iwe, Pwiya, arina moonelo woovonyeya wa miyo. Awo anuupuwela wira kintthuna kikhale oovirikana. Awo anuupuwela wira kineererya okhala namasuwela sothene. Awo annaaleelaka atthu wira miyo kinaawoka atthu, vanci-enexa wa myaha iyo ntoko *opatiiso wa mmaasini* mwa Nsina na Pwiya Yesu, ni *epyo y’enowa, namararuwa muulupale*, ni mwa ifiita iyo sinci-ene sinkhuma ni hat’etthu woohikhala Ekeekhai yoohihononiwa. Ni kinnaavekelaka awo, “Amosamosa a nyuwo murwe mukoonihe nipuro vanttheke-aka, wala ohaamini wala otaphulela voovonyeya Masu.” Ni khaavo mmosa okoonihe. Miyo kinoovekelani Nyuwo, Tithi, mwaatthuniherye atthu ala esuwele wira anoovonya woona ewoora. Awo

anoorowa olipelela voolekelaxa, awo yaahiwehe vale. Awo, khula mmosa . . .

²⁴⁴ Pwiya, miyo kookupali ela, murim'aka waamunyaanyeya Yoolepwa ela yahaakhanle y'ekeekhai wa miyo, okathi Nyuwo muhimaly'anyu wira, "Othene ole Atithi akivahaly'aya, onimoorwa. Ipwittipwitthi Saka sinniwa Nsu Naka." Vano, Pwiya, kinoona wira Omwene vekeekhai ti siiso Nyuwo muhimaly'anyu, koosuwela wira ti siiso, ori ntoko mutthu aakunxe ntthavi khurowa onthiyani, khuriha ntthavi khupurula khula muthinto. Yaahikhala, vekeekhai, ihopa soothola, yaahikhala akasa, aranttasi a mmaasini, inowa, itthu sothene ntthavi na Ehapari yooreera naattontte-aya. Masi vookiserya, ohoolo waya, mwiikhampa waahitthikela okelatho mmaasini, kasa aahihuluwa, enowa yaahopa muturi khutthikela mmwiitheni mwa marove, ntoko mwalapwa vamarapheyoni vawe wala ekuluwe entthikela vamaroveni vaya. Masi yaahikhala ehopa y'ekeekhai vale, Pwiya. Nto miyo kookhalana ohakalalihiwa nno, w'osuwela, wira hata ntthavi nihinatthi waarowela, iyo saari ihopa nto. Iyo saari ihopa, sooyariwa soothommwa. Nto ti siiso nikhanlyaya ntthavi na Ehapari yooreera ninvara mmihakalalihoni. Nyuwo munnaasuwela Awinyu. Etthu emosa paahi erin'aka othokorerya, Tithi, ntoko sinsuwel'aka, okhala ooromeleya ni Masu ala. Nyuwo mwa Ole onihimya t'ani okhanle aani. Ni koosuwela wira kasa khaakhanle orukunuwaka khukhala nikhupa, siiso khaakhanle mulopwana wala mutthu, orina maaru oohiwa wa Ehapari yooreera, aarowa okhalakhala osuwelaka Ekeekhai. Maana Atithi yaahoono ela khalayi ene, ni Nyuwo moohimya wira othene ole Awo yoovanhe-ayani Nyuwo aamoorwa.

²⁴⁵ Tithi a Wirimu, miyo kinnoovekelani Nyuwo wira khula mutthu oniiwa Mutthak'ola mwaamukhaani, wira Waarya olaleeriwaaya-mo, ni yoohimya erinaaka mmurimani mwaka wa mukhwaaka, atthu Nyuwo mwaakhwenle-anyu. . . Nto atthu, akina wa awo ota iwo, Pwiya, ntoko nikhuru na Kore, atthu ooloka, ooweetiheriwa voowootha, ni muhasa wa erupani wooreerihwa mmatatani mwaya, masi yaahipweteya. Vano, awo khiyaatthuniherya hata muhasa wa erupani ovolowa ni yaawo; mwaana a Aroni, Eleasar, aahaana okuxa. Vano awo yaahipaka epantera ya waltaari ni makapu ale, nikula, wira yooniherye, ni okhala muupuxeryo wa etthu ile yootakhala, Kore erenryaawe opaka niira noothokihwiwa noonvirikanya namitthaka a Muluku. Ekhale ottaiwene wa hiyo, Pwiya. Erooho Yoowaarya okathi wothene enikhapelele.

²⁴⁶ Hiyo ninnooxukhuruni Nyuwo, Pwiya, wira ekerej'ahu yaamukhaani, esantuwaariyu ela yaamukhaani yooreerihwiwa. Miyaakha sinci-ene sivinre, miyaakha miloko miraru n'itthu, miyo kaahikokhora vanthiyani va voosareya malaxi ni othowwa, ni hiyo naahivahererya ethhaya ela wa Nyuwo,

ethhokihelo ela yaamukhaani. Ni vanloothoni vale va etapernakulu eri yoowoona yeeyo. Yeeyo yiiraneeye voolikana. Nlelo vaavale. Awo khanrowa opwexakasa, Pwiya, awo anrowa paahi o...nlo ninkhala na khalayi, ni awo anrowa paahi osuka ehelaka nimosas vasulu vaya. Muluku, nvaherye wira Ehapari yooreera ela ya weero elempewe mmakukhuni va, Eyo ehikhalakhale ekhumaka ekereja ela yaamukhaani mpakha Kristu orwa. Wira khula mumpuru, khula mumpuru a Erutthu ya Kristu, awo anrwa mu okhuma elapo yothene ni molumwenkuni mothene, wira khula mmosa a awo yaakhele Waarya, Ehapari yooreera, ni yeetteke mwa Yoowo nto ni emwaakhele Kristu.

²⁴⁷ Ni wira ekhale y'ekeekhaixa wira Masu Awe yiiraneeye, "Miteko Miyo sinvar'aka, nave-tho awo anoovara. Ole oniiwa Masu Aka, ni onimwaamini Ole okirumme, ookhalana Ekumi Ehinimala." Nto okathi Ekumi Ehinimala enkelaaya, awo aniyariwa okhuma Osulu, ni miteko sa Muluku sinimwiisooniherya mmansaya, okhala wira Ekumi emosaru yaari mwa Yoowo. Khekhanle wiiraka etthu ekina.

²⁴⁸ Tivo Tithi, ekerej'ela ehilipiherye ekiseryo aya Yoohimala vasulu va moonole wii, vasulu va mutthenkeso, vasulu va etthu p'itthu ohikhanle Kristu Mwaneene okhalaka mwa yaawo, olipiheryaka Masu Awe mwa yaawo ni natiri Awe. Wira, okhuma mwaana mwaamukhaani va ohiy'ula, mpakha mutthu oowuuluvalaxa, aakhele musuwelelo ola. Ni wira khula mulopwana wala muthiyana, mmiravo wala mwaaruusi, oniiwa efiita ela, ekhale siiso ni yaawo, Pwiya, ni mwaavahe osuwela saana wira miyo kimphavela paahi olopola ni wiihanela okhuma, maana ewoora ela ti vooxa ovikana sinuupuwelaahu.

²⁴⁹ Ni hiyo ninnimoona Papilooniya, maama namuttompe, ni an'awe othene axithiyana anamittompe ethukumanaka vamosa. Muluku, hiyo ninnisuwela wira Yoolempwa enihimya wira nthakathaka mmatta mwa etriku ninrowa otthukiwa toko, mahuta. Nto awo ahiitthuka mahuta, yiisiihanaka masina ooveeha vekeekhai ahikhanle awaya, ahikhanle a Ekereja, hata vakhani; iyo ilooa, kahi ikereja. Eri emosa wa seiyo, Tithi, nto eyo ti Emosa Nyuwo mukhwenlyaanyu.

²⁵⁰ Nto kinvekela, Tithi, noonaka iyo sothene sitthukiwaka vano mwaha wa mooro w'atomu vahilekenle, kinvekela, Pwiya, wira Nyuwo muhiye etriku ekhale yoosareya ni yoolemela. Munivahe, Pwiya. Wira ninnuwe ni naarye Waarya, ni nikhale ntoko Yesu, "Kaahivareke itthu Muluku okirumme-awe wira kivare, weeso nkirina Ekumi mwa Miyo. Masi Muluku aalavulaka ni wooniherya Ekumi Awe, vano Eyo ennilavula Mmansaya." Munivahe, Pwiya. Miyo kinnivahererya Mutthak'ola wa Nyuwo, ni wira Nyuwo mukhapelele Yoola, ni waaruuhe ikonto miloko sene, Pwiya, wala, an'Inyu othene atthomeliwe Ehapari yooreera. Mwa Yesu Kristu, Yoowo okhanle Masu, mwa Nsina Nawe kinnivekela. Amen.

Miyo kinnimphenta . . . , miyo . . .
 Okhala wira . . . t'opacenyre okiphenta miyo
 Nto oothuma woopowa waka
 Vamwirini w'oKalvario.

²⁵¹ Kinrowa okoha etthu. Akavi ohiy'ula vamuthukumanoni ola onooneya va, wa ekerej'ela yooreera yuulupale y'atthu, wala empa y'atthu, kiireke, nipuro nenla n'okokhorela-vo, munaamini ni murim'anyu wothene, makhalelo anyu anniphimeya ni yooruma (nyuwo) ya Muluku ni Bibilia, ni munnaamini yeeyo, nwehaka makhalelo anyu, ni munoona enamuna Erooho enneettaaya mwa nyuwo, wira ennaamini Masu othene enamuna Awo alempwalyaaya, ni ennisuka Yaawo? Munnaamini Yeeyo? Muluku ooreeriheni. Owo okathi wothene akhalihe Erooho Awe mwa nyuwo.

²⁵² Ni wa mpatthani aka mufiitani, kaanithuna nwenrye-ene oweha va vamuthukumanoni va ohiy'ula, kinoona wira ipursento miloko mithanu na mixexe s'atthu mano yaahivenxa matata, wira aamwaamini ni aanweha Bibilia, (kahi ele ekereja enihimy'aya) ele Bibilia enihimy'awe, (kahi ele elooca enihimyaaya) ele Bibilia enihimy'awe, ni awo annoona Ekumi ya Kristu yoonihereyaka mwa Yoowo.

²⁵³ Moosuwela, mahiku a khalayi awo ehinatthi okhalana ipa soototoxa-mo, mu—mulipa oohana eweero aamanaka ni enyutto. Kinoona wira nyuwo muhiwa yeeyo. Ehinatthi orowa wa mulipa-oototoxa, awo yaamma. Nto eweero etthu yoolemelaxa, ti yoolemelaxa ovikana ecumpwi. Nto siiso miyo kootoko othokosa, nto nyuwo munoowerya okuxa mmithaakani mmukhukwini mothakoni, ni ottikittha ntata nanyu vasulu va nthaaka, vano nto, “phew,” wiiseela *siiso*, nto ntthupi ni itthu sothene sinoovava, maluku, masi eweero ti yoolemela saana enoohala vaavo. Vano nto mwakuxa eweero eyo, eyo yoophirikeya vatthayani mpakha ethukumanyeiye-aya vanci-ene. Ni moovirani w'okathi wa ivulkawu okathi yaathukumanyeyaaya, yookhalana marove ni sothene, epirita ya eyuuma ni itthu sikina sootakanxeya ni yeeyo. Mulipa-oomana aakuxa nipattuusa nla na eweero n'umana n'urukunxa, n'umana n'urukunxa, mpakha owo omana khukumihia ipaphala sothene. Nto moosuwela moota owo aasuwelaawe wira aahikumihia ipaphala sothene? Owo aaniwerya woona elatarato awe yoowo yooneelaka mwemmo.

²⁵⁴ Nto ti siiso Muluku oniirih'awe Ekereja. Owo onoomana khula eyaaminelo, khula muromolelo, khula nikano noopakiwa ni mutthu, mpakha Owo woona Ekumi Awe Yoowo wooneeleya mwa nyuwo. “Kaahivareke miteko s'Atithi Aka, muhikaaminiki.” Munnona? Vakhala wira ele elaiheriwe Ekereja, Ekumi yaari mwa Kristu khenooneeleya mwa nyuwo, muhikhale ooweemela mwaahikhalane ovilela, ikuru, itthu iya sothene, ni wiisumaaliha, ni—n'itthu, ni othunku, ni oreerelana

murima w'axinna, ni itthu iya sothene sinvekeliwa wa nyuwo. Hata wira mwiirale exeeni, hata wira mukhuwenle sayi, ikereja kavi mwiitakanxale-anyu, mapururu makavi mwiihelenle-anyu, muhiire. Mulipelele mpakha vooloka-vo, mmurimani mwanyu, nyuwo nwerwe olevelela, mpakha mmurimani mwanyu mukhalane oreerelana murima w'axinna. Khivancala vakhala wira awo anooropocola nikuphwi na ireru epantte emosa, munoowerya orukunxa nlaku nikina ni mmaaleleyo, moone, mpakha maneema awo, hata wira awo anoohimeeryani exeeni.

²⁵⁵ Okathi awo yaahenlyaaya nttapwatta wiitho Wawe khummana vamuru, khwira, "Vano, kinileeliwa wira Nyuwo mwa Profeta." Vano khukumiha nttatpawatta mwa Yoowo, nto mmosa aya ovarenle-ene ekopo, khwira, "Taani a hiyo oomanne? Muhimye ni munileele, mwa enamuna ekina, nto hiyo nnoowaaminini wira Nyuwo mwa Profeta." Owo khonatoko otthukula eyano Awe.

²⁵⁶ Mwaamwiiwaka profeta ovenyaka, orina soowaakhula sothene sa khula ethepyelo mukhanlyaanyu oruhaka, muupuwele, owo kahiyo profeta. Olelo awo ahaana osuwela sothene, mwaarowaka okhalana owereya wa niino ni mwaarowaka okhalana owereya mmirimani, ni sothene sikina, ni wooleelani sothene ya yeeyo. Owo kuhiyo mukhalelo wa Muluku ahu. Nkaaweheni maprofeta, nkanweheni Yesu.

²⁵⁷ Nkanweheni Paulo, okathi owo aawerye-awe omukhaliha mutthu ohoona, ni omuhiya mulipa-oohana omoomola elapo eyo, "Kinoona wira owo waahimpweteya owerya wawe wo okhaliha ohoona."

²⁵⁸ Yesu, Yoowo aawerya waahihimuxa alipa-ookhwa, nnakhala vo khwira... Nakhotto namuhapaliwa aahisenyela wiitho Wawe, ni natoropa khusenya khuroropocola ireru wiitho Wawe, khummana Owo vamuru, ni nttapwatta anvitikelenle Yoowo, khwira, "Muhimye ni munleele oomanneni." Ni khuhitthukula eyano Awe.

²⁵⁹ Muhaawehe anamathepya awo othene. Masi muupuwele, awo anoolavula paahi, etoolare yoowothererya enihimya paahi wira yookhala emosa y'ekeekhai nipuro nlo. Moonakar uethu ila ya mutthenkeso yinnuwaka ni ekelelaka ohoolo, ntoko ehimalyaaya "woototha onimwaacerereya mmatatani mwawe," muupuwele paahi, yookhala Ekereja yaamukhaani ya Muluku nipuro nlo, vekeekhai ekhanle yoosareya Erooho Yoowaarya, yooloka, eneetta ewelaka exikatta. Muhiweheke mutthenkeso muulupale.

²⁶⁰ Ekereja xeeni yuulupale enihimmwa mBibiliani ehikhanle okathi wa ekereja ya wEfeso? Nto okathi Paulo oviraly'awe mmittettheni sa wEfeso, khurwa ekerej'ela, yaahikhala atthu muloko n'anli mwemmo. Ti yeeyo. Ni othene aya yaari atthu ooreera murima, yaanikhuwela ni yaaniviriha okathi muulupale,

masi khiyaakhanle Erooho Yoowaarya nlelo. Paulo khwira, “Muhaakhela Erooho Yoowaarya okhuma okathi mwaaminni anyu?”

Awo khwira, “Vano, hiyo khanaasuwela wira yaahikhala Erooho Yoowaarya.”

²⁶¹ Owo khwira, “Vano mpatisiwe sayi?” Vakhala wira khiyaavirikana, exeeni owo aahimenryaawe ekerej’ele iwe?

²⁶² Awo khwira, “Hiyo noopatisiwa ni mmosa w’axilopwana aalupalexa atonko okhala mulaponi, Yohani Mpatisa, yoowo ompatinse Pwiy’ahu. Opatiiiso owo kuhiyo wooreera voophiyerya?”

²⁶³ Owo khwira, “Nnari, mulopwana. Muhaana opatisiwa, okhala wira Omwene otthittiwe wa etthu ekina.” Nto awo vaiwaly’aya yeela... Khwira, “Yohani aapatisa mwaha wo orukunuxa murima paahi, kahi oleveliwa wa itampi, ahimiyaka wira mwaahaana omwaamini Ole aarowa orwa, eyo ti wii, Yesu.” Nto awo vaiwaly’aya yeela, awo yaahipatisiwa-tho mwa Nsina na Yesu Kristu. Ti yeeyo. Vekeekhai. Awo yaahitthara Yoolempwa.

²⁶⁴ Nyuwo moosuwela, woovahereryani voosiis’ula, Moise aathanrinhe ettharihelo oonaly’awe Wirimu, nto khupaka eheema wira ethoonyerye. Okathi Salomoni aatenk’awe empa moolompa, owo (owo iirale exeenii?) aattharinhe ettharihelo Moise, ni eheema, asukaka Yoolempwa oratta-ene.

²⁶⁵ Ni okathi Muluku onrwaawe Mpaani mw’Awe wa mahiku ookiserya, Empa yeela, Erooho Yoowaarya, “Nyuwo mookuupela erutthu,” Erooho Yoowaarya yaahimora Nihiku na Pentekosite, mutthaka waari, “Murukunxe murima, khula mmosa a nyuwo, mpatisiwe ni Nsina na Yesu Kristu wira muleveliwe itampi, nto munimwaakhela yoovaha ya Erooho Yoowaarya. Tthiri natiri t’awinyu ni awaya an’inyu, n’ale ankhala ottaiwene, othene ale Apwiya Muluku ahu anthhun’aya owiihana.” Nyuwo mwatthunaru omwiihana murumeyi anyu tothoro, Tothoro Simoni Petru aahilepa epaphelo ya murette, epaphelo ya murette Ehinimala. Ti yeeyo enaavoniha aretta.

²⁶⁶ Mwaahiye akina w’anafarmaasiya awo oohimya-himya, ni muromolelo, ehele enamuna ekina, mwaha wa yeeyo awo arinaaya... Moosuwela, nyuwo mwaahaacererye e... mwaacereryaru voowaatta elepeliwo, nyuwo pooti... eveneno yoowaattaxa, pooti omwiivaka murette. Mwaahihele woophiyerya, nyuwo...kahi wa murette, mwaahiire, khonimureerela etthu murette. Meetiku anyu onnisuwela saana moota w’olepa murette.

²⁶⁷ Ni Kristu, Erooho Yoowaarya, ti Mulipa-oolepa Murette, ni Owo oolepa. Muhaacererye-Vo wala okumiha-Vo, mukuxe paahi Murette ntoko owo siryaaya. Ti Openuwa wa iretta sothene. Muluku ooreeriheni. Nyuwo munnimphenta Yoowo? Amen.

Miyo kinnimphehta Owo, miyo... [Nipuro
vahiitthu mufiitani—Mol.]
Okhala wira Owo t'opacenyre okiphenta miyo
Nto oothuma woopowa waka
Vamwirini w'oKalvario.

268 Vano niipaka muhina-muhina, vano murukunuwe nvahane
matata ni namwaattamanani anyu vo. Oh, owo nawetta nave,
onivira.

Miyo kinnimphehta Owo, miyo... (...? ...eyo
ti yuulupale.)
Okhala wira Owo t'opacenyre okiphenta miyo
Nto oothuma... woopowa

(Murwe munvireloni mu. Ayo, kooxukhuru, munn'aka.)

Miyo kinnimphehta Owo, miyo kinnimphehta
Owo
Okhala wira Owo t'opacenyre okiphenta miyo
Nto oothuma woopowa waka
Vamwirini w'oKalvario.

Miyo kinnimphehta Owo,

Nrowe niipe vano.

Miyo kinnimphehta Owo
Okhala wira Owo t'opacenyre okiphenta miyo
Nto oothuma woopowa waka
Vamwirini w'oKalvario.

269 Vano nrowe nuuramihe muru, niphunye maitho
ahu, ninvenxerye matata ni masu ahu Muluku vano,
koovahereryakani wa pastore. Hiyo ninnitthapa okhala ni nyuwo
va. Hiyo khanihiyo muromolelo. Hiyo khanrina hata nlamunlo
woohikhala ophenta, hata eyaaminelo woohikhala Kristu, hata
eliivuru yoohikhala Bibilia. Hata omempuru; opatthana paahi
mwa Ephome ya Yesu Kristu ennirapiha ohaamini wothene.

270 Vaareera, othene vamosa vano.

Miyo... , Miyo...

Muluku ooreeriheni. Mutthike munixekurye-tho.

Okhala wira Owo t'opacenyre ophenta...

Vaareera, pastore. Moolikana? Muluku ooreeriheni.

Ni...



MWAHA KIKHALENLYAAKA OOVIRIKANYA
ETIINI YOOTTHOKIHIWA EMK62-1111E
(Why I'm Against Organized Religion)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yeettaka 11 mweeri wa Novembro, 1962, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org